

Ceityih

Jesu Khanna A Kaainaak

¹ Theophila, maa nakaw cauk lamma awh, Jesu a them saikhqi ingkaw a cawngpyinaak, ² amah ing ak tyh ceityihkhqi venawh Ciim Myihla ak coming awi yyn nawh, khawk khana kaaina a awm hlan dy awhkaw awi ak kqawn peek khqi ce qee law hawh nyng. ³ Khuikhanaak a huh co-engawh, vawhkaw thlangkhqi venawh hatnaak khawzah ing amah taw hqing hy tice dang sak hy. Khawngghi phlikip khuiawh dang pe nawh a mingmih a venawh Khawsa qam akawng ce kqawn pehy.

Ciim Myihla Awikam

⁴ Hypboet taw a mingmih mi buh ami ai haih awh vawhkaw awi ve pehy: “Kai ing kak kqawn law za uhyk ti, Pa ak awikam ce qeh unawh taw Jerusalem ve koeh cehtaak kawm uk ti. ⁵ Ikawtih Johan ingtaw tui ing baptisma ce pehy, cehlai khawngghi iqyt a dii hlanawh nangmih ing Cii Myihla ing baptisma ce hu kawm uk ti,” tinak khqi hy. ⁶ Cedawngawh kutoet na ami awm awh doet uhy, “Bawipa, Israel qam ce tuh nang dyih hly sak hawh nawh nu?” tina uhy.

⁷ Cekkhi venawh: “Pa ing amah ak coming a taak atym ingkaw khawngghi ce nangmih nami sim am ngaih hy. ⁸ Cehlai Ciim Myihla ce nangmih ak khanawh a pha law awhtaw thaawmnaak ta kawm uk ti; cawh nangmih taw Jerusalem, Judah qam boeih ingkaw Samari qam khawmdek a dytnaak dyna kai a dyihthing na awm kawm uk ti,” tinak khqi hy.

Khanna A Kaainaak

⁹ Ve ak awi ak kqawn coengawh, a mingmih a mik huh awh khawk khan na zoek nace awm nawh, a mami huh thainaak dyna myi ing khyn zip hy. ¹⁰ Ceamyihna zoehna a awm ce a mi toek huiawh thlang pakkhih, hik baawk bai ing, ami venawh dyi law hy. ¹¹ Cekkqawi ing, “Klili thlangkhqi, ikawtih khanna mang unawh naming dyih khing? Khanna a kaai nami huh amyihna amah qoe a hu voei law tlaih kaw,” tinak khqi hy.

Juda Zyngna Matthia Tyh

¹² Cekoengawh, Olive tlang ami ti awhkawng Jerusalem khawna voei uhy; ce tlang taw Jerusalem khaw kengawh awm nawh, Sabbath nynawh khin cehnaak khoek ni a hla hy. ¹³ Ami pha awh, ami awmnaak khawi ipkhan na ce kaai uhy. Cawhkaw ak awmkhqi taw, Piter, Johan, Jakob ingkaw Mathai, Alpheaus a capa Jakob ingkaw Zealot tinawh amik khy Simon, Jakob a capa Juda, vetloek ve awm uhy. ¹⁴ Cekkqhqi ingkaw nukhqi, Jesu a nu Meri ingkaw a naakhqi mi kawlung kutoetna thahlynaak ing cykcah unawh kutoetna awm uhy. ¹⁵ Ce nyn awh ak cangnaak thlangkhqi ak khuiawh Piter taw dyi nawh, (ami cu boeihna siim ingkaw a thong law uhy), ¹⁶ “Koeinaakhqi, thlang a kut awh Jesu ak peekung Juda akawng awh, syn awh Ciim Myihla ing David am khaawh anak kqawn Cakciim awi ce a soep aham awm hy- ¹⁷ anih ce ningnih anglakawh paa lawt nawh ve a bibi awm ana bi lawt hy,” tinak khqi hy. ¹⁸ (Cek thlang ing a khawboe seet phu a huh ing lo hun ce thlai hy; cawh ce ak chut tling na tla nawh, ak phoen ce pawk nawh ak khqikhqi awm a lengna cawn boeih hy. ¹⁹ Jerusalem awh ak awmkhqi boeih ing ce awithang ce za unawh, ce a lo hun ce a mimah ak awi na, 'Akeldama,' ti unawh, cetaw, 'Thi khawhun, tinaak ni.)

²⁰ Saam cauk aw h vemyihna qeena awm hy, 'Anih a awmnaak ce thlang ing cehta seitaw ak khuiawh uawm koeh awm seh nyng,' ti ingkaw, 'Sawikung anihnaak thlang chang ing ham seh nyng,' ti ce.

²¹ Cedawngawh Bawipa Jesu ning lakawh a ceh a awm khuiawh, ²²Johan a baptisma ak kqannaak aw hkawng Jesu khawk khan na a kaai dy nangmih anglakawh ak awm poepa ak khui aw hkaw a thawhtlaihnaak anik sim pyi khqi hamna thlang pynoet a awm ngaih hy,' ti hy.

²³ Cedawngawh thlang pakkhih: Joseph ami ti Barsabas (Justa tinawh awm khy bai uhy) ingkaw Matthia, ce hoep uhy. ²⁴ Cekcoengawh, "Bawipa, nang, thlak kawlung boeih ak simkung, ve ak thlang pakkhih ak khuiawh nang ing nak tyh ce nim huh khqi lah, ²⁵ Juda ing a cehtaak vawhkaw ceityih bibi ak bi hamna," tinawh cykcah uhy. ²⁶ Cekcoengawh cekqawi ing taicung ce zyk nih saw Matthia ak khanawh tla hy; cedawngawh anih ce ceityih thlanghqa hlaioet ak noet sih uhy.

2

Pentekos Nyn

¹ Pentecost nyn a pha aw h hun pynoet aw h kutoet na awm boeih uhy. ² Kawlhkalh aw h khawhli awi amyihna khan nakawng awi ce law nawh a mingmih ang ngawihnaak ipkhui ce be khyp hy. ³ Cawh thlang pynoet qip ak khanawh lai amyihna ak awm mai ce hu uhy. ⁴ Cekkhi boeih ce Ciim Myihla ing be unawh Myihla ing a pau sak amyihna awihchang na pau uhy. ⁵ Cawh khawngghi ak kai aw h ak awm Khawsa ak kqih Juda thlangkhqi boeih boeih ce Jerusalem aw h awm uhy. ⁶ Cek awi ce a ming zaak aw h thlang khawzah cun law unawh, thlang boeih ing ce amik awi pau ce amimah ak awina aming zaak aw h amik kawpoekna ky i hy. ⁷ Thlang boeih ing kawpoek

kyi ngaihang doena, “Toek lah uh, vawhkaw awikhqi ve Galili awi boeih am nu? ⁸ Ikawtinawh ni thangpyi awi amyihna ning zaak hy voei? ⁹ Thlang vang Parthia khaw, Media ingkaw Elam khaw awhkaw ak awmkhqi; thlang vang taw Mesopotamia, Judah ingkaw Kapadocia, Pontus ingkaw Asia qamawh ak awmkhqi, ¹⁰ Thlang vang bai taw Phrygia ingkaw Pamphylia, Izip ingkaw Libya qam Cyqene khaw keng awhkaw thlangkhqi, Rom khawawh ak awmkhqi ingkaw ¹¹ (Judakhqi ingkaw Juda phung ak hqutkhqi); Crete ingkaw Arab thlangkhqi na ni awm hlai uhy – Khawsa ak kawpoek kyi ik-oeih sai ve nimah ak awi na ning za boeih thai ve!” ti uhy.

¹² Thlang boeih amik kawpoek kyi ing, a kawnglam am zasim thai unawh, “Veve ikawmyih hly hy voei nu? ti unawh doet qu uhy. ¹³ Cawh thlang vang ingtaw qaihnakkhqi unawh, “Misur zuk thai ak quikhqi ni,” ti uhy.

Piter Ak Awithangleek

¹⁴ Cehlai Piter taw thlanghqa hlaioet khqi mi dyi unawh, anih ing khawteh na ak awi y nawh awi kqawn hy, “Nangmih Juda khawkthlangkhqi ingkaw Jerusalem awh ak awm thlangkhqi boeih aw, ve ve sim unawh kak kqawn ve ngai lah uh. ¹⁵ Vekkhqi ve nangmih ing namik poek amyihna, zu am qui uhy. Tuhawh mymcang khawnoek kow ni a law hun hy! ¹⁶ Vetaw tawngha Joel ing anak kqawn ceni:

¹⁷ “Khawngghi a dyt tym awh ce, Khawsa ing, thlang boeih ce kang Myihla ing syp kawng nyng saw, nami capakhqi ingkaw nami canukhqi ing awi khypyi kawm uh.
Cadawngkhqi ing hatnaak hu kawm usaw, pacawngkhqi ing mang han kawm uh.

¹⁸ Ka tamnaa pakhqi ingkaw ka tamnaa nukhqi ak
khan awhawm
kang Myihla syp kawng nyng saw, ka awi kqawn
kawm uh.

¹⁹ Khawhii awh kawpoek kyi themkhqi ingkaw,
deklai kaiawh hatnaakkhqi ce nim huh kawng nyng;
Thi, mai ingkaw maikhu ing dang sak kawng nyng.

²⁰ Bawipa a khawngghi bau ingkaw boeimangnaak ce
a pha hlanawh,
Khawmik ce than kawmsaw, pihla ce thi na thoeng
kaw.

²¹ Cawh u awm Bawipang ming ak khy boeih taw
hulna awm kaw,' a tice ni.

²² “Nangmih Israel thlangkhqi aw, ve ve ngai lah uh:
Nazareth Jesu ce Khawsa ing dyihpyi nawh nangmih a
venawh kawpoek kyi them ing hatnaakkhqi ce sai law sak
hy, namimah ingawm sim uhyk ti. ²³ Anih ce Khawsa
ing khaw khan oepchoeh nawh a sim oepchoeh hawh
amyihna, nangmih a kut awh peek nace awm hy; cawh
nangmih ing thlakchekhqi ak bawngnaak ing anih ce
thinglam awh kxing nawh him uhyk ti. ²⁴ Cehlai anih ce
Khawsa ing thihnaak awhkawng thawh sak tlaih nawh,
thihnaak ingkaw khy am kqangnaak ak khuiawh kawng
loet sak hawh hy, kawtih thihnaak ing anih ce am tu khak
thai hy.

²⁵ David ing ak awi kqawn nawh,
“Ka haiawh Bawipa ce hu poepa nyng.
Ka ngai ama hangnaak aham kak tang benawh awm
hy.

²⁶ Cedawngawh kak kawlung ve zeel nawh kam lai ve
ak kaw zeel hy;
Ka pum awm ngaih-unaak ing hqing kaw,

²⁷ Ikawtih nang ing phyi khuiawh am nik khawng hyt kawm tiksaw,
Nak thlang ciim ce thuh zip aham am ngaih kawp ti.

²⁸ Nang ing hqingnaak lam ce nani sim sak hawh a dawngawh;

Na haiawh zeelnaak ing ni be sak kawp ti,” tinawh kqawn hy.

²⁹ Koeinaakhqi, pakdam David a kawng ve akkqih kanaa nami venawh kqawn law nyng; anih ce thi nawh, phyi khui byihna awm hawh hy, ak phyi awm tuhdy ni venawh awm poe hy. ³⁰ Anih taw tawngaha na awm nawh, Khawsa ing a venawh awikam nawh amah a ngawihdoelh awh a cadil thlang pynoet ngawih sak kaw tinawh awi a taak ce sim hy. ³¹ Ni hai benawh ak awm law hly kawi ik-oeih ce a sim oepchoeh a dawngawh, anih ce phyi khuiawh am khawng hyt kawmsaw, a pum awm am thu kaw, tinawh Khrih a thawh tlaihnaak akawng ce anak kqawn oepchoeh hawh hy. ³² Cawhkaw Jesu ce Khawsa ing thawh sak tlaih nawh, cawhkaw ik-oeih ak simpyikung dyihthing na kaimih ve awm unyng. ³³ Pa ak tang benawh zoeksangna awm nawh, Pa ing awi ataak Ciim Myihla ce hu hawh hy, nami huh naming zaak ve ing syypna awm nawh ni.

³⁴ David ce khawk khan na am kaai hy, anih qoe ing,
“Bawipa ing ka Bawipa venawh:

'Kak tang benawh ngawi lah.

³⁵ Na qaalkhqi ce na khawtloeng na ka taak hlan dy,” tinawh anak kqawn hy. ³⁶ Cedawngawh Israel thlangkhqi boeih ing ve ve sim lah uh: Nangmih ing thinglam awh nami taai Jesu ce Khawsa ing Boei ingkaw Khrih na sai hawh hy,” tinak khqi hy.

Khrih Khawboe

³⁷ Thlangkhqi ing ce ak awi ce a ming zaak awh, amik kawlung awh sun amyihna za unawh, Piter ingkaw

ceityihkhqi venawh, “Koeinaakhqi ikawmyihna nu ka mi ti kaw?” tinawh doet uhy.

³⁸ Piter ing, “Thawlh zut unawh taw, thawlh qeenkhaw ngainaak aham, Jesu Khrih ang ming aw h baptisma hu boeih uh. Cawhtaw Ciim Myihla themzoe peek ce hu kawm uk ti. ³⁹ Vawhkaw awikamnaak vetaw na mimah aham, nami cakhqi ham ingkaw ak hla nakaw ak awm thlangkhqi boeih – Bawipa nangmih a Khawsa ing ak khy thlangkhqi boeih aham ni,” tinak khqi hy. ⁴⁰ Awih chang khawzah ing a mingmih a venawh ngaihtaaknaak awi kqawn pek khqi hy; a mingmih a venawh, “Vawhkaw ak plam cadilkhiq anglak aw hkawng na mimah ingkaw na mimah ce hul qu lah uh,” tinawh kqawncaih pek khqi hy.

⁴¹ Anih ak awih kqawn ak dokhqi boeih ing baptisma ce hu uhy, ce a nyn aw h ce thlang thong thum ing sap khqi hy.

Ak Cangnaakkhqi A Pawlneengnaak

⁴² Ceityihkhqi a cawngpyinaak awi ce ngai unawh pawlnengnaak ce ta uhy, phaihpi thek unawh cykcah uhy. ⁴³ Thlang boeih kqihnaak ing be unawh ceityihkhqi ing kawpoek kyi hatnaakkhqi ce sai uhy. ⁴⁴ Ak cangnaak thlangkhqi boeih ing them pynoet na cuut uhy. ⁴⁵ Ami khawhthemkhqi ce zawi unawh, ak voethlauh thlangkhqi ce pe uhy. ⁴⁶ Myngawi na bawkim aw h cun poepa uhy. Im aw h phaihpi ce teei unawh kawlung kutoet cana zeelnaak ing ai haih uhy, ⁴⁷ Khawsa ce a mim kyihcah coengawh thlang boeih ak kawngaih na khaw sa uhy. Hulnaak ak hukhqi ing Bawipa ing a mingmih ce myngawi na sap khqi hy.

¹ Khaw hypoet awhtaw Piter ingkaw Johan taw khawmy ben khawnoek pakthum, cykcah tym a pha awh bawkim na cet hy nih. ² Cawh a nu ak phoen khui awhkawng ak kheemna ak thang thlang pynoet ce bawkim na kawt unawh ak leek soeih chawmkeng a keng awh ta uhy, anih ing ce myngawi bawkim khuina ak cethqhi venawh kut dun poepa hy. ³ Anih ing Piter ingkaw Johan bawkim khui ani lut tawm awh ce hu qawi nawh, cekqawi a venna tangka thoeh hy. ⁴ Piter ingkaw Johan ing anih ce toek ceet nih nawh Piter ing, “Kainih ve ni toek qawi lah!” tina hy. ⁵ Ce ak thlang ing ik-oeih ani pek hly ngaih-uu doena hak toek hy. ⁶ Cehlai Piter ing, “Sui ingkaw tangka am ta nyng, cehlai ka taak dyn ve ni pe vang nyng: Nazareth Jesu ang ming ing na khaw ing cet,” tina hy. ⁷ Cawh ak tang ben kutawh tu nawh thawh saw a khaw ingkaw am khuk ce nep pahoei hy. ⁸ A khaw ing pet nawh cet pahoei hy. Cekqawi mi bawkim khuina ang pet doena Khawsa ce kyihcah nawh lut pahoei hy.

⁹ A ceh doena Khawsa am kyihcah ce thlang boeih ing ami huh awh, ¹⁰ ak leek chawmkeng a kengawh ngawi nawh kut ak dun thlang ni, tice sim unawh, ak khan awh them ak pha law ce ami huh awh kawpoek kyi sak unawh aming ngaihna aa sak uhy.

Piter Ing Awikqawn Hy

¹¹ Cawhkaw kut ak dun thlang ing Piter ingkaw Johan ce am tu huili awh, thlang boeih amik kawpoek kyi nawh, Solomon Imhloeih benna kawng dawng law uhy. ¹² Cekkhi ce Piter ing a huh awh, a mingmih a venawh, “Israel thlangkhi aw, kawtih naming ngaih a kyi hy voei? Kainih ing ka nimah a saithainaak, am awhtaw, Khawsak thlang na kani awm a dawngawh, vawhkaw thlang ve ak ceh sak thai amyihna nami ni toek uh? ¹³ Abraham, Isaak,

Jakob ingkaw pakdamkhqi a Khawsa ing a tyihzawih Jesu ce zoeksang hawh hy. Nangmih ing anih ce him aham nami peek, Pilat ing anih ce hlah aham ngaih hlai hy, nangmih ing anih a haiawh maa uhyk ti. ¹⁴ Thlak ciim ingkaw thlak dyng ce qoeng unawh, thlang ak him ce hlah aham thoeh lat uhyk ti. ¹⁵ Hqingnaak kung ce him hlai uhyk ti, Khawsa ing anih ce thihnaak khui awhkawng thawh tlaih hawh hy. Kaimih ve dyihthing na awm unyng. ¹⁶ Ang ming cangnaak ak coming, vawhkaw thlang nangmih ing nami huh nawh nami sim ve qoei hawh hy. Jesu ang ming ing amah a venawh kawng ak law cangnaak ak coming ing ve ak thlang ve, nangmih boeih ing nami huh amyihna, qoei hawh hy.

¹⁷ Koeinaakhqi, nangmih anik hquikungkhqi ing am sim unawh ami sai amyihna, nangmih ingawm a sim kaana sai uhyk ti, tice sim nyng. ¹⁸ Cehlai Khawsa ing a tawngkhqi boeih a venawh anak kqawn hyt, Khrih ing khuikhanaak hu kaw, tice vemyihna soep sak hy. ¹⁹ Cedawngawh nami thawlhnaak a ciimnaak a hamna zut unawh taw, Khawsa benna hlat lah uh, cawh ni Khawsa ven nakaw simqunaak ce pha law thai kawm saw, ²⁰ Jesu Khrih, nangmih aham a hoep ce awm a tyih law hly thai hy. ²¹ Syn awh a tawngha ciimkhqi venawh awi atak ce hawh amyihna, Khawsa ing ik-oeihkhqi boeih a sai pangnaak a tym a pha hlan dy taw, anih ce khawk khan awh awm hyn kaw. ²² Ikawtih Mosi ing, 'Bawipa nangmih a Khawsa ing nangmih aham kai amyihna ak awm tawngha pynoet ce nangmih anglak awhkawng awm law sak kaw; anih ing ak kqawn law boeih ce ngai pe kawm uk ti. ²³ U awm anih ak awm amak ngai ak thlang taw ak thlangkhqi ak khui awhkawng qoeng bat kaw,' tinawh anak kqawn hy. ²⁴ Oeih, Samuel awhkawng kqan nawh tawngkhqi boeih

ing, ami nak kqawn hawh amyihna, tuh tloek awhkaw ik-oeih ve anak kqawn oepchoeh hawh uhy. ²⁵ Nangmih ve Khawsa ing tawnghakhqi ingkaw nami pakdamkhqi mi ami na sai awikamnaak qo ak pangkungkhqi na awm uhyk ti. Abraham a venawh, ‘Nang a cadilkhqi ak coming khawmdek thlang boeih ing zoseennaak hu kawm uh,’ ana tina hy. ²⁶ Khawsa ing a bibikung ce am thawh tlaih awh, thawlh lam awhkawng nangmih ce ning hlat sak khqi nawh zoseennaak peek aham lamma cyk na nangmih a venawh tyi law hy,” tinak khqi hy.

4

Pitr Ingkaw Johan Amim Tunaak

¹ Piter ingkaw Johan ing thlangkhqi venawh awi anik kqawn hui awh, khawsoeihkhqi, bawkim temkungkhqi ingkaw Sadiusikhqi ce law uhy. ² Thihnaak awhkawng ak tho tlaih Jesu ak coming ceityih qawi ing thlang cawngpyi nih nawh awi anik khyppyi ce am ngaih uhy. ³ Cedawngawh Piter ingkaw Johan ce tu unawh, khaw a my hawh adawngawh a khawngawi mymcang dy thawngim khuina thla qawi uhy. ⁴ Cehlai awi amak ngai thlang khawzah ak khuiawh ak kuum ngai ing cangna unawh; thlang mi na thongnga tluk pung uhy.

Piter, Johan Ingkaw Judah Boei

⁵ A khawngawi awh ukkungkhqi, a hqamcakhqi ingkaw anaa awi qeekungkhqi ce Jerusalem awh cun uhy. ⁶ Khawsoih boei khyt Ana, Kaiapha, Johan, Alexander ingkaw khawsoeih boei khyt a cakaw paqeng thlak changkhqi awm cawh awm lawt uhy. ⁷ Piter ingkaw Johan ce khy sak unawh doet uhy: “Hana kaw saithainaak, a u ang ming ing nu ve a themkhqi ve na ni sai?” tina uhy.

⁸ Cawh Piter taw Ciim Myihla ing be nawh: “Ukkungkhqi ingkaw a hqamcakhqi! ⁹ Tuhngawi aw hawkkhem a venawh qeennaak sainaak aw h ikawmyihna a qoeinaak tice kqawn aham nami nik khy awhtaw, ¹⁰ nangmih ingkaw Israel thlangkhqi boeih ing sim lah uh: Nangmih ing thinglam aw h tai hlai uhyk ti, Khawsa ing thihnaak aw hkawng am thawh tlaih, Nazareth Jesu Khrih ang ming ing, nangmih a hai aw hkaw ak dyi ve qoei hy. ¹¹ Anih taw, nangmih im ak sakungkhqi ing nami qoeng lung ce, a kil aw hkaw lung khoeng a phu tlo soeihna coeng hy,” a ti ceni. ¹² “Hulnaak ve hana aw m am aw m qoe qoe hy, khawng h ak kaiaw h nangmih hul thainaak aham thlang hqing anglakaw h ming qoe qoe am aw m hy,” tina hy. ¹³ Piter ingkaw Johan a qaal leeknaak ce ami huh aw h, ca amanik sim, thlang mailai ni, tice ami sim aw h amik kawpoekna kyi hy, cehlai cekqawi ce Jesu venaw h anik aw m ni, tice sim uhy. ¹⁴ Cehlai khawkkhem ak qoei thlang caw h ak dyi ce ami huh aw h ikaw aw i aw m ap kqawn uhy. ¹⁵ Cekqawi ce Sunhedrin ak khui aw hkawng ami ceh sak coengaw h, a mimah ce doet qu uhy. ¹⁶ “Vekqawi ve ikawmyihna nu ni sai lah voei? Jerusalem khaw k khuiaw h ak aw mkhqi boeih ing vaw hkaw kawpoek kyi them ani sai ve sim haw h uhy, ningnih ingaw m amni oelh thai hy. ¹⁷ Cehlai ve ak aw i a thang khawng h hlanaw h, ve ang ming ing aw i ama nik kqaw nnaak voel aham kham pe u sih,” ti uhy. ¹⁸ Cekcoengaw h cekqawi ce khy tlaih unaw h, Jesu ang ming ing aw i kqawn naw h thlang ama cawngpyi voel aham kqawn pe uhy.

¹⁹ Cehlai Piter ingkaw Johan ing, “Khawsak aw i ngai anglakaw h nangmih ak aw i ngai ve nu Khawsa haiaw h a thym bet kaw, nangmih ing poek lah uh. ²⁰ Kainih ingtaw ka ni huh ingkaw ka ning zaakkhqi ve ak kqawn kaana am aw m thai ti kawng nih nyng,” tina hy nih. ²¹ Cekkqawi

ce kqih am hqin unawh hlah uhy. Ce akawnglam ak camawh thlang boeih ing Khawsa ce a mim kyihcah dawn-gawh, cekqawi ce ikawm a tina qawi uhy. ²² Cawhkaw khawkkhem ak qoei thlang ce kum phlikip hlai law hawh hy.

Ak Cangnaakkhqi Ak Cykcah

²³ Cekqawi ce ami hlah coengawh, Piter ingkaw Johan taw ani pyikhqi venna cet tlaih nih nawh Khawsoih boeikhqi ingkaw a hqamcakhqi ing amik kqawn peek ce zaak sak khqi hy nih. ²⁴ Cekkhi ing a ming zaak aw h awi pynoet na y unawh Khawsa venawh cykah uhy. “Sawsang soeih Bawipa, nang ing khawk khan, khawmdek, tui-cunli ingkaw ak khuiawh ak awmkhqi boeih ve sai hyk ti. ²⁵ Namah a tyihzawih, kaimih a pa David am kha awhkawng, Ciim Myihla ing nang ingawh:

‘Ikawtih thlangphyn ahoei amik kaw so nawh,
phu amak awmna khaw ami khan hy voei?’

²⁶ Khawmdek sangpahrang khqi ingkaw
ukkungkhqi ing kutoet na Bawipa ingkaw Khrih ce
kalh uhy,’ tinawh awi kqawn hyk ti.

²⁷ Herod ingkaw Pontia Pilat ing Gentelkhqi, Israel thlangkhqi mi kutoet na nang a tyihzawih thlak ciim Jesu, nang ing situi na syp ce him aham ve khawk bau khuiawh hqum unawh teng uhy. ²⁸ Ak awm hly kawi nang a sai thainaak ingkaw ngaihnaak ak awm oepchoeh ce cekkhqi ing sai uhy. ²⁹ Tuh Bawipa, a mingmih am kqih am hqinnaakkhqi ce poek nawhtaw, qaal leek doena nak awi ka mik kqawnaak thai aham na tyihzawihkhqi ve bawng lah. ³⁰ Namah a tyihzawih thlak ciim Jesu ing thlaktlo qoei sak thainaak, kawpoek kyi ik-oeihkhqi ingkaw hatnaakkhqi saithainaak aham na kut ce zyng law lah,” tinawh cykcah uhy.

³¹ Ceamyihna ami cykcah coengawh, a mingmih a awmnaak hun ce tlai lyk lyk hy. Ciim Myihla ing be unawh, Khawsa ak awi ce gaal leeknaak ing kqawn uhy.

Ak Cangnaakkhqi Tangka Qup

³² Ak cangnaak thlangkhqi ing kawlung pynoet na ta uhy. U ingawm a taak them ce amah doeng a koena am poek voel unawh ami taakkhqi boeih ce pynoet na qup uhy. ³³ Thaawmnaak ak bau soeih ing ceityihkhqi ing Bawipa Jesu a thawhnaak akawng ce kqawn uhy, qeennaak khawzah ce a mingmih ak khan awh awm hy. ³⁴ A mingmih anglakawh ak voet ak hlauh thlang am awm hy. Im a lo ak takhqi ing zawi unawh, a phu tangka ce ami haw law coengawh, ³⁵ ceityihkhqi a khawk kaiawh tloeng uhy. Cawhkaw themkhqi ce a ngoe ngaihnaak amyihna thlang a venawh tei ang paa uhy. ³⁶ Kupra qam awhkaw Levi thlang Joseph, ceityihkhqi ing Barnaba tinawh amik khy (ak kqawn ngaihnaak taw Thapeek capa, tinaak) ing, ³⁷ lo a taak ce zawi nawh a huh tangka ce ceityihkhqi a khawkung awh haw law hy.

5

Ananias Ingkaw Sapphira

¹ Ananias ak mingnaak thlang pynoet ing a zu Sapphira ingqawi khawhun ani taak ce zawi hy nih. ² A zu a simpyinaak ing tangka a vang ce amah aham a taak coengawh, a vang ce ceityihkhqi a khawkung awh tloeng hy nih. ³ Piter ing, “Ananias, kawtih setan nak kawlung khuiawh be sak nawh Ciim Myihla ce na thai na latnaak? Khawhun phu tangka a vang ce namah aham ta hyk ti. ⁴ Na zawih hlanawh awm namah a koena ni a awm ka ti koenoek? Na zawih coeng bai awh awm tangka ce namah a ngaihnaak amyihna hawna thai tik saw kaw? Ikaw ing

nu vemyihna nak kawlung aw h bi a bi? Thlang am thaina tiksaw Khawsa ni na thainaak hy,” tina hy.

⁵ Ananias ing ce ak awi ce ang zaak aw h, tlu nawh thi hy. Ce akawng ak zakhqi boeih ing kqih uhy. ⁶ Cawh cadawngkhqi law unawh, a qawk ce ami lawh coengawh, kawt unawh pup uhy.

⁷ Khawnoek pathum tluk a awm coengawh a zu cawhkaw akawng ce am sim kana lut lawt hy. ⁸ Piter ing, “Nim then lah, khawhun ce tangka ve zah doeng na nu nani zawih tang?” tina hy. Anih ing, “Oeih, ve zah doeng ni,” tina hy.

⁹ Piter ing a venawh, “Ikawmyihna Bawipa ang Myihla noek adak aham naning zaak qu? Toek lah ce! na va amik pukkhqi a khaw ce chawmkeng aw h ni a awm hyn ce, nang awm nik kawt pahoei lawt kawm uh,” tina hy. ¹⁰ Cawh Piter a khawkung aw h tlu nawh thi pahoei hy. Cadawngkhqi law unawh, a qawk ce ami huh aw h kawt unawh a va ak phyi keng aw h pup uhy. ¹¹ Ce akawng ce thlangboel ingkaw ak zakhqi boeih ing kqih uhy.

Ceityihkhqi Ing Thlaktlo Qoei Sak

¹² Ceityihkhqi ing kawpoek kyi themkhqi ingkaw hatnaakkhqi sai uhy. Ak cangnaak thlangkhqi boeih ce Solomon Imhloeih aw h cun hoeih hoeih uhy. ¹³ Thlangkhqi ing a mingmih ce kyih am cah khqi hlai uhy, bawng aham taw kqih laklaw uhy. ¹⁴ Cehlai, pa ingkaw nu thlang khawzah ing Bawipa ce cang nak khqoet khqoet unawh thlang pung a tai khqoet khqoet hy. ¹⁵ Piter a ceh aw h ang myihlip ing dah na seh ti unawh, thlaktlokhqi ce lam na law pyi unawh hiphaih ingkaw phakkhqi aw h zaih sak uhy. ¹⁶ Jerusalem khaw a kengsam aw hkaw khawkhqi aw hkawng thlang kqeng law unawh thlaktlokhqi ingkaw

qaai ing am tukhqi ce law pyi uhy, cekkxqi boeih ing qoeinaak hu uhy.

Ceityihkhqi Thawngim Khui Na

¹⁷ Cawh khawsoeih boei ak hqam soeih ingkaw a pyikhqi, Sadusi anglakawhkaw thlangkhqi ce tlai se uhy. ¹⁸ Ceityihkhqi ce tu unawh thawngim khuina thlak khqi uhy. ¹⁹ Cehlai khawmthan awh Bawipa ak khan ceityih ing thawngim chawmkeng ce awng nawh a mingmih ce a leng na sawi khqi hy.

²⁰ “Cet unawh taw bawkim awh dyi unawh thlang boeih venawh ve hqingnaak awi ve vak kqawn uh,” tinak khqi hy.

²¹ Khaw a dai law awhtaw bawkim ak khuina lut tlaih unawh, khan ceityih ing ak qqawn peek amyihna, thlangkhqi ce cawngpyi uhy. Khawsoih boei ak hqam soeih ingkaw a pyikhqi ce ami pha awhtaw Israel a hqamcakhqi ngawih cunnaak – Sanhedrin ce khy unawh thawngim khuiawh kaw ceityihkhqi ce lawh sak khqi ham thlang tyi uhy.

²² Cehlai thawngim ce ami pha awh, thawnguk boei ing cekkxqi ce am hu voel hy. Hlat tlaih unawh, ²³ “Thawngim awm ak nep na khai qu nawh, thawngim ak qehkhqi awm chawmkeng awh ak nep cana awm uhy; cehlai chawh ka mim awng law awhtaw ak khuiawh u awm am awm voel hy,” tina uhy. ²⁴ Ce ak awi ce a ming zaak awh, bawkim ak temkung qaal boei ingkaw khawsoeih boeikhqi ce a mingngaih na kyi hy, “Ikawmyihna a awmnaak hy voei?” ti uhy. ²⁵ Cawh thlang pynoet ce law nawh, “Toek lah uh! Nangmih ing thawng namik thlak ce bawkim awh dyi unawh thlang cawngpyi uhy,” tinak khqi hy.

²⁶ Cawh qaal boei ce a bibikungkhqi mi cet unawh ceityihkhqi ce lawpyi uhy. Thlangkhqi ing lung ing nik

khawng khqi hau kaw ti unawh awih zoei cana lawpyi dym uhy. ²⁷ Ceityihkhqi ce ami lawpyi coengawh, khawsoeih boei ak hqam soeih ing a doet ham Sanhedrin haiawh khy uhy. ²⁸ “Ve ang ming ing am nami cawngpyi aham ni yn khqi ceet ceet hawh unyng. Cehlai ve cawngpyinaak ing Jerusalem nami be sak coengawh ve ak thlang a thi awh kaimih ve thawlh puk aham cai uhyk ti,” tina uhy.

²⁹ Piter ingkaw ak chang ceityihkhqi ing: “Thlanghqing ak awi anglakawh Khawsak awi ni ka ming ngai hly bet hy! ³⁰ Nangmih a pa a Khawsa ing, nangmih ing thing awh tai unawh nami him Jesu ce, thihnaak awhkawng thawh tlaih hawh hy. ³¹ Zutnaak ing thawlh qeenkhaw ngainaak ce Israelkhqi venawh a peeknaak thai aham Khawsa ing anih ce ak tang benawh boei ingkaw hulkung na zoeksang hawh hy. ³² Ve a kawnglam awh ve kaimih taw simpyikung na awm unyng, amah ak awi ak ngaikhqi venawh Khawsa ing a peek Ciim Myihla awm simpyikung na awm hy,” tinak khqi uhy.

³³ Ce ak awi ce a ming zaak awh, amik kaw so nawh cekkhqi ce him aham ngaih uhy. ³⁴ Cehlai Gamaliel ak mingnaak Farasi thlang pynoet, anaa awi cawngpyikung, thlang boeih ing ak kqihchah, ce Sanhedrin anglakawh dyi nawh cawhkaw ceityihkhqi ce a leng na ceh sak aham awi pehy. ³⁵ Cekcoengawh cekkhqi venawh: “Israel thlangkhqi aw, ve ak thlangkhqik khan awh sai aham naming cai ve ak nep na poek lah uh. ³⁶ Ma awh Theuda ak mingnaak thlang pynoet ing, thlang mailai am amyihna kqawn qu nawh, thlang zali ing hquut uhy. Cehlai anih ce ami him coengawh taw a hubatkxqi awm plal a tham unawh, ikaw na awm am awm cawh uhy. ³⁷ Anih a awm coeng bai awh, Juda ak mingnaak Kalili phyn thlang pynoet ce thlangmi noetnaak a awm tloek awh awm bai nawh thlang pynoet ce qaal na thawh sak hy. Anih awm

him bai unawh a hubatkHQi ce plam boeh boeh uhy. ³⁸ Cedawngawh, ve a kawnglam awh ve awi kqawn law lah vang nying: Ve ak thlangkhqi ve ta dym mai uh! Ceh sak khqi mai uh! A mingmih ang cainaak ingkaw ami bibinaak ve thlangHQing a sai na a awm awhtaw plal bit kaw. ³⁹ Cehlai Khawsa a sai na a awm awhtaw, am hqee thai kawm uk ti; Khawsa ak oelh na ni awm kqoeng hau kawm uh,” tinak khqi hy.

⁴⁰ Anih ak awih kqawn ing cekkhqi ce noeng khqi hy. Cekcoengawh ceityihkhqi ce ak khuina khy khqi tlaih unawh vyk khqi uhy. Jesu ang ming ing awi ama mik kqawn voel aham awi amik kqawn peek coengawh hlah khqi tlaih uhy.

⁴¹ Sanhedrin ce ceityihkhqi ing cehta unawh, ce ang ming awh khuikha kyinaak ami huh aham tyng qoe na a awm a dawngawh zeel uhy. ⁴² Khawngghi hypoet coengawh hypoet, bawkim awh, im pynoet coeng pynoet awh ang dym kaana thlang cawngpyi unawh Jesu taw Khrih ni ti awithang leek ce khypy uhy.

6

Thlang Khqih Tyk Uhy

¹ Ce tloek awh hubat a pung a tai hqui voe voe awh, them aming paa awh nuhaikhqi ami hlah phlam adawngawh Greek awi na amik pau Judakhqi ing Hebrai awi na ak pau Judakhqi ak khan awh sai bi uhy. ² Cedawngawh thlangHQa hlaih h tloek ing hubatkHQi boeih ce khy unawh, “Khawsa ak awikqawn plal nawh aawk ai cabawi awh bi ni bi awhtaw am thym kaw. ³ Ceamyihna awmsaw, koeinaakhqi aw, na mimah ak khui awhkaw Myihla ingkaw cyihnaak ing ak be thlang khqih awh tyk uh. Vawhkaw bibi ve cekkhqi venawh pe u sih, ⁴ cawh ni

cykcahnaak ingkaw awikqawn bibinaak benawh ni ngaih hqytnaak hly thai uhy,” tinak khqi uhy.

⁵ Ce ak awi aming zaak awh thlangkhqi amik kaw zeel hy. Cedawngawh cangnaak ingkaw Ciim Myihla ing ak be Stephen, cekcoengawh Philip, Pqokorus, Nikanor, Timon, Parmenas ingkaw Antiok khaw awhkaw Juda phung na ak hawi qu Nikola ce tyk uhy. ⁶ Ce ak thlangkhqi ce ceityihkhqi venna khyn uhy, ceityihkhqi ing ami lu ak khan awh kut tloeng unawh cykcah pek khqi uhy. ⁷ Ceamyihna Khawsak awi ce pung a tai hqui nawh Jerusalem khaw awh hubat thlang thlangmi awm pung hqui khqoet khqoet inawh, khawsoeihkhqi ingawm cangnaak awi ce ngai uhy.

Stephen Amim Tunaak

⁸ Khawsa qeenaa saithainaak ing ak be Stephen ing, thlangkhqi anglakawh kawpoek kyi themkhqi ingkaw hatnaakkhqi ce sai hy. ⁹ Cehlai, anih amak ngaih thlangkhqi Tamnaa Loetkhqi, Cyqene ingkaw Alexandria khaw awhkaw khqi, Kilikia ingkaw Asia qam awhkaw Juda thlangkhqi ing Stephen ce oelh uhy. ¹⁰ Cehlai cekkhqi ing a cyihnaak ingkaw awi ak kqawn sakkung Myihla cetaw am oelh thai uhy. ¹¹ Cedawngawh thlang pynoet venawh, “Stephen ing Mosi ingkaw Khawsa a kqawn seetnaak awi za unyng,” tinawh kqawn aham ang hypna awi yn uhy.

¹² Ceamyihna thlang kqeng ingkaw a hqamcakhqi, anaa awi qeekungkhqi venawh kqawn pe uhy. Stephen ce tu unawh Sanhedrin a haina sawi uhy. ¹³ Simpyikung amak thym ta unawh, cekkhqi ing, “Ve ak thlang ing vawhkaw hun ciim ingkaw anaa awi ce ak che che na kqawn hy. ¹⁴ Vawhkaw Nazareth Jesu ing ve im ve hqe kawmsaw Mosi ing a cehtaak phung alamkhqi awm hqe kaw, tinawh ve ak thlang ing ak kqawn awh za unyng,” tina uhy.

¹⁵ Sanhedrin aw h ak ngawikhqi boeih ing Stephen ce toek ceet uhy, cawh khan ceityih a haai amyihna a haai ce hu uhy.

7

Stephen Awikqawn Hy

¹ Cawh khawsoeih boei ak hqam soeih ing doet hy, “A mingmih a thawlh puknaak ve ak thym aw? tina hy.

² Cawh Stephen ing, “Koeinaakhqi ingkaw pakhqi aw, kak awi ve ngai lah uh! Ningmih a pa Abraham ce Haran aw h a awm hlan Mesopotemia aw h a awm aw h, a venawh boeimang Khawsa ce dang pehy. ³ Khawsa ing, ‘Na qam ingkaw nak thlangkhqi ce cehta nawhtaw kai ing ka ni pek hly qam na ce cet lah,’ tina hy.

⁴ Cedawngawh anih ing Khaldea qam ce cehta nawh Haran aw h ce awm hy. Apa a thih coengawh, tuh nami awmnaak qam aw h ve Khawsa ing tyi hy. ⁵ Khawsa ing anih ce qo amna pehy, khawlehnaak tat zani am pehy. Cawh Abraham ing ca kangna zani ta hlan hlai hy, amah ingkaw a cadilkhqi ing qam ve pang kawm uh, tinawh Khawsa ing awi tahy. ⁶ Khawsa ing vemyihna awi kqawn pehy: ‘Na cadilkhqi ing thlang a qam aw h plam kawm usaw, thlang ing tamnaa na kum zali khuiawh hawna kaw. ⁷ Cehlai a mingmih tamnaa na ak hawnaak qam ce kai ing toel kawng nyng saw, ce a qam khuiawh kawng ami loet coengawh ve a hun aw h kai ve ni baw k kawm uh,’ tihy. ⁸ Cekcoengawh Abraham ce chahhui qeetnaak paipi awikamnaak ce ana sai pyi hy. Abraham ing a ca Isaak ta nawh a thang coeng ak qeet nyn aw h chahhui qeet pehy. Cekcoengawh Isaak ing Jakob tahy, Jakob ing ca pahqa hlaihih tloek ce ana tahy.

⁹ Pakdamkhqi ing Joseph ce ana yt unawh, Izip qam na tamnaa na ana zawi uhy. Cehlai Khawsa ce anih a venawh

awm nawh, ¹⁰ a kyinaak soepkep ak khuiawh kawng hul hy. Joseph a venawh cyihnaak pe nawh Izip sangpahrang Pharaoh a lungnaak ce huh sak hy; cedawngawh Pharaoh ing Izip qam ingkaw a ipkhui boeih ak khan aw h ukkung na tahy.

¹¹ Cawh Izip qam pum ingkaw Kanaan qam pum aw h khawseet khawkhanaak ce pha hy, kyinaak ak bau soeih a pha dawngawh, ni pakhqi ing ai am hu uhy. ¹² Izip qam awhtaw cang awm hy tice Jakob ing ang zaak aw h, ni pakhqi ce Izip qam na lamma cyk aw h tyi hy. ¹³ A hih voeinaak ami ceh aw h, Joseph ing a koeinaakhqi venawh amah ce u nu, tice kqawn pek khqi hy, cawhkawng Pharaoh ing Joseph ipkhui kaw ce sim hy. ¹⁴ Cekcoengawh, Joseph ing a pa Jakob ingkaw a cakaw pagengkhqi boeih ce lawh sak nawh, thlang khqihkip coengawh pumha law uhy. ¹⁵ Cedawngawh Jakob ce Izip qam na cet nawh cawh anih ingkaw ni pakhqi ce thi uhy. ¹⁶ Ami qawkkhqi ce Shqekem aw h Hamor cakhqi venawh tangka ing ak thlaih phyi aw h ce pup uhy.

¹⁷ Khawsa ing Abraham a venawh awi a taaknaak tym ce a soep law tawm awhtaw, Izip qam aw h nik thlangkhqi ce ana pung ana tai uhy. ¹⁸ Cawh Joseph akawng amak sim thlang ce sangpahrang na awm nawh, anih ing Izip qam ce uk hy. ¹⁹ Anih ing nik thlangkhqi ce a ngaih ngaih na ana haw nak khqi nawh, naasen khqi ce ami thihnaak aham ni pakhqi ce khawng sak khqi ngah ngah uhy.

²⁰ Ce tloek aw h Mosi ce thang hy, anih taw naasen mailai na am awm hy. Hla thum doeng ni a pa a im aw h ami khuut hy. ²¹ Anih ce a leng na ami taaknaak kungawh, Pharaoh a canu ing lo nawh amah a capa na hqin hy.

²² Mosi ce Izipkhqi a cyihnaak boeih ce a cawng sak a dawngawh, awikqawn thai nawh saithainaak awm ta hy.

²³ Mosi kum phlikip a law awh, amah a pyi Israelkhqi hqip aham cai hy. ²⁴ Thlang pynoet ce Izip thlang ing a the a khanaak ce a huh awh, ce ak thlang ce hul nawh Izip thlang ce him pehy. ²⁵ Khawsa ing anih hawna nawh cekkhqi hul hy tice ak thlangkhqi ing sim kaw tinawh Mosi ing poek hy, cehlai cekkhqi ing am sim uhy. ²⁶ A khawngawi nyn awh Israel phyn qawi thlang pakkhih anik kqak qu ce hu hy. Cekqawi ce qoep qu sak aham a ngaih a dawngawh, 'Nangnih ve koei a naa nani nani awm hy; kawtih nanik kqah qu?' tina qawi hy.

²⁷ Cehlai a pyi ak khan awh a khawboe ak se ing Mosi ce buk nawh, 'U ing nu kainih ak khan awh ukkung ingkaw awidengkung na ani taak?' ²⁸ Zan awh Izip phyn na him amyihna kai awm ni him vang nati nawh aw? tina hy. ²⁹ Ce ak awi ce Mosi ing ang zaak awh, Midian qam na cen hy, cawh khin na awm khing nawh cakpa pakkhih tahy. ³⁰ Kum phlikip a loet coengawh, Sinai Tlang a venawh kaw kqawng awh thingbup mai na ak kqawng awhkawng khan ceityih ing Mosi a venawh dang pehy. ³¹ Mosi ing a huh awh, ce a huh ce ang ngaihna kyi hy. Ak zoe awhkawng toek vang, tinawh a pan awh, Bawipa ak awi ce zahy; ³² 'Kai taw na pakhqi a Khawsa, Abraham Khawsa, Isaak Khawsa ingkaw Jakob Khawsa na awm nyng,' tina hy. Mosi ing kqih nawh am toek voel hy.

³³ Cekcoengawh Bawipa ing a venawh, 'Na khawmyk ce suut; nang dyihnaak a hun ce hun ciim ni. ³⁴ Izip qam awh kak thlangkhqi ing khuikha ami huh ce hu hawh nyng. A mingmih ang ko ang kqangnaak awi ce za nyng saw a mingmih loet sak aham law nyng. Law lah, Izip qam na ni tyi tlaih vang nyng,' tina hy.

³⁵ Vawhkaw Mosi zani cekkhqi ing, 'U ing nu nang ukkung ingkaw awidengkung na ani taak?' tina unawh ana oelh uhy. Cehlai anih ce thingbup aw h ak dang peek khan ceityih hawnaak ing Khawsa amah qoe ing a mingmih ukkung ingkaw hulkung aham tyi hy. ³⁶ Anih ing Izip qamawh, Tuili Sen ingkaw qamkoh aw h kum phlikip khui kawpoekkyi them sainaak ingkaw hatnaakkhqi ce huh sak khqi nawh amingmih ce sawikhqi hy.

³⁷ Vawhkaw Mosi ing Israelkhqi venawh, 'Nangmih ak khui awhkawng kai amyihna ak awm tawngaha ce Khawsa ing tyi law kaw,' ana tina hy. ³⁸ Anih ce qamkoh aw h thlang kqeng anglakawh, Sinai Tlang aw h a venna awi ak kqawn peekkung khan ceityih ingqawi awm haih hy nih, ni pakhqi mi awm haih uhy; ningnih a venawh kqawn peek patoe aham awih hqing ce anih ing hu hy.

³⁹ Cehlai ni pakhqi ing ak awi ce am ngai pe uhy. Anih ce oelh lat unawh amik kawlungkhqi ce Izip benna hawi sak uhy. ⁴⁰ Aaron a venawh, ningnih a haiawh ak cet aham khawsakhqi sai law. Izip qam awhkawng ningnih anik sawikung Mosi ve – ikawmyihna a awm hy voei amni sim voel hy! tina uhy. ⁴¹ Cawh waitaw ca myihlip ce ana sai uhy. A mimah a kut sai a venawh bulnaak sai unawh awmhlynaak ce sai uhy.

⁴² Cedawngawh Khawsa ing a mingmih ce hawi taak khqi nawh, khawngghi nakaw ik-oeihkhqi baw h aham cekkhqi ce pehy. Tawngkhakhqi a cauk aw h:

“Aw Israelkhqi aw, kum phlikip khui qamkoh aw h kai a venawh bulnaak ingkaw them peek aham nami haw law nawh nu?

⁴³ Nangmih ing baw h aham nami sai,

Molek a bawkthang ingkaw na mimah a khawsa
 Rephah a aihchi ceni nami zoeksang hy.
 Cedawngawh Babilon a voel benna tamnaa na ni tyi
 khqi kawng nyng, tinawh ana qee ingqawi cah qu
 boek hy.

⁴⁴ Ni pakhqi ing qamkoh awh a mimah anglak lawawh
 simpyinaak hi im ce ana ta uhy. Cawhkaw hi im taw Mosi
 a venawh Khawsa ing huh nawh am huh amyihna sa uhy.

⁴⁵ Khawsa ing Josua sawinaak ak coming a haiawh kaw
 qam khuiawh ak awmkhqi ce ahqek peek coengawh, hi
 im ce ni pakhqi ing khyn uhy. David khuk dyna ce hi im
 ce awm hyn hy. ⁴⁶ Ce David taw Khawsak a huhlynaak
 hunawh Jakob Khawsa a awmnaak hun sak peek aham ana
 thoeht hy. ⁴⁷ Cehlai Solomon ing ni im ce a sak peek hy.

⁴⁸ Cehlai sawsang soeihawh ak awm Khawsa ce
 thlanghqing a kut sai im awh am awm hy.

⁴⁹ Khawk khan ce ka ngawihdoelh na awm nawh,
 khawmdek ve
 ka khaw tloengnaak na awm hy.

Ikawmyih im nu nang ing na sak law kaw? tinawh
 Bawipa ing' tihy.
 Am awhtaw kang dymnaak hun ce han awh nu a awm
 kaw?

⁵⁰ Kai a kut ing ni vemyihkhqi boeih ve a sai ka ti my?
 tinawh tawngaha ing ak kqawn amyihna.

⁵¹ Nangmih thinsah, kawktal hakpangkhqi! Nami
 pakhqi amyihna awm boek uhyk ti: Ciim Myihla ce oelh
 quiqah uhyk ti! ⁵² Nami pakhqi ing a mami thekhanaak
 tawngaha u nu a awm? Thlakdyng ak law hly anak kqawn
 oepchoehkhqi ce awm ana him uhy. Nangmih ing anih
 ce thlang a kut awh thak unawh him uhyk ti. ⁵³ Khan

ceityihkhqi ak coming anaa awi ce hu toengloeng hlai uhyk ti, am ngai sai laklaw uhyk ti,” tinak khqi hy.

Stephen Lung Ing Khawng Uhy

⁵⁴ Ce ak awi ce a ming zaak awh amik kaw so nawh Stephen ce ami ha tah sih uhy. ⁵⁵ Cehlai Stephen ce Ciim Myihla ing be nawh, khan ben ang mangawh Khawsa a boeimangnaak ingkaw Khawsa ak tang benawh ak dyi Jesu ce hu hy. ⁵⁶ Stephen ing, “Toek lah, khawk khan awng qu nawh, Khawsa ak tang benawh ak dyi Thlanghqing Capa ce hu nyng,” tinak khqi hy.

⁵⁷ Cawh a mingha ce byp unawh, khawteh na amik khy coengawh, a venna ce dawng uhy. ⁵⁸ Khaw voel na sawi unawh lung ing thlak uhy. Cawh dyihthing na ak awmkhqi ing cadawng Saul a khawkung awh a hibai khqi ce taak pe uhy.

⁵⁹ Anih ce lung ing amik thlak awh, “Bawipa Jesu, kang myihla ve do lah,” tinawh cykcah hy. ⁶⁰ Cekcoengawh koep nawh, “Bawipa vekkhi a thawlhnaak ve koeh thung kawp ti,” tinawh khy hy. Ve ak awi ak kqawn coengawh ip pahoei hy.

8

Thlangboelkhqi Thekhanaak

¹ Saul awm cawh awm nawh, anih a thihnaak ce tyng hy ti pyi khqi lawt hy. Ce tloek awh Jerusalem khaw awhkaw thlangboel ce ami the ami khanaak a dawngawh, ceityihkhqi kqawn kaana thlang boeih ce Juda qam ingkaw Samaria qam na poeng boeih uhy. ² Khawsak thlangkhqi ing Stephen ce pup unawh amik kaw se hy. ³ Cehlai Saul ingtaw thlangboel ce hqe hy. Im pynoet coeng pynoet

awh cet nawh, pa ingkaw nukhqi ce am tu coengawh thawngim na thlak khqi hy.

Samari Awh Philip

⁴ Ak cenhqi ing ami phanaak a hoei awh awi ce khypyu uhy. ⁵ Philip ing Samaria khaw pynoet awh cet nawh Khrih akawng ce kqawn hy. ⁶ Thlang kqeng ing Philip ak awi ce za unawh kawpoek kyi them a sai ce ami huh awh, anih ak awih kqawn ce ak nep cana ngai pe uhy. ⁷ Khy doena qaaichekhqi ce thlang ak kaww khuiawh kawng cawn uhy, ak khawkhqi ingkaw khaw ak khemkhqi ing qoei uhy. ⁸ Ce a dawngawh ce a khaww khuiawh kaw thlangkhqi ce zeel soeih uhy.

Miklet Ak Sai Simon

⁹ Ce a khaww khuiawh Simon ak mingnaak thlang pynoet ing miklet sai nawh Samaria thlangkhqi ce amik kawpoek ana kyi sak lawt hy. Amah ingkaw amah ce thlang mailai am amyihna kqawn qu hy, ¹⁰ cedawngawh thlang boeih, thlak nem thlang sang ing ak awi ce ngai pe unawh, “Ve ak thlang ve khawsa a saithainaak Bau ami ti, ceni ve,” ti uhy.

¹¹ Anih ing miklet ing cekkhqi ce a ming ngaih a kyi sak hawh a dawngawh cekkhqi ing a hu awh hqut uhy. ¹² Cehlai Philip ing Khawsa qam ingkaw Jesu Khrih ang ming ak khypyu ce a ming zaak awh cangna unawh nu na pa na baptisma ce hu uhy. ¹³ Simon amah ingawm cangna nawh baptisma ce hu lawt hy. Cedawngawh Philip a cehnaak a hoei awh ce bat nawh kawpoek kyi them a saikhqi a huh awh ak kawpoek kyi soeih hy.

¹⁴ Jerusalem awh amik awm ceityihkhqi ing Samari awhkaw thlangkhqi ingawm Khawsak awi ce cangna hawh lawt uhy tice a ming zaak awh Piter ingkaw Johan ce tyi uhy. ¹⁵ Cekqawi ce ani pha awh, ¹⁶ Ciim Myihla ce

a mingmih ak khan aw h pha hlan hy; Bawipa Jesu ang ming aw h baptisma doeng ni ami huh hyn hy. ¹⁷ Piter ingkaw Johan ing cekkhqik khan aw h kut tloeng pe nih nawh, cekkhqi ing Ciim Myihla ce hu uhy.

¹⁸ Ceityihkhqi a kut tloengnaak ak coming Ciim Myihla ami huh ce Simon ing a huh aw h, cekqawi a venawh tangka pe nawh, ¹⁹ Kai ing kut ka tloeng peek thlang ing Ciim Myihla a huhnaak lawt aham, cawhkaw saithainaak ce kai a venawh ni pe lawt lah nih,” tina qawi hy.

²⁰ Piter ing, “Khawsa a kutdo ce tangka ing thlaih aham nak poek a dawngawh, na tangka ingqawi plam baw h nih!

²¹ Khawsa haiawh nak kawlung ama thym a dawngawh, ve a bibinaak aw h ve nang a sai kawi ikaw aw m am aw m hy. ²² Vawhkaw them amak leek nak poeknaak ve zut nawhtaw Bawipa venawh cykcah lah. Ceamyihna nak kawlung nak poeknaak ce Bawipa ing qeenkhaw ang ngai law khoem aw h hoeih doeng. ²³ Nainaak kawlung ing be tiksaw thawlhnaak ing nim tu hawh hy tice hu nyng,” tina hy.

²⁴ Cawh Simon ing, “Nak kqawnkhqi ce kak khanaw h a mang tlaaknaak aham, Bawipa venawh cykcahnaak ta law lah,” tina hy. ²⁵ Bawipak aw i ce thlang a venawh sim sak nih nawh anik khypy i coengawh, Samari khaw khawzah aw h aw ithang leek ce anik khypy i doena Piter ingkaw Johan ce Jerusalem na hlat hy nih.

Philip Ingkaw Ethiopia Thlang

²⁶ Bawipa ak khan ceityih ing Philip a venawh, “Khan ben lam na ce cet lah - cetaw qamkoh lam na aw m nawh - Jerusalem aw hkawng Geza na cehnaak lam na aw m hy,” tina hy.

²⁷ Cedawngawh anih ce cet hy, lam aw h Ethiopia khawpa boei ingqawi hqum hy nih, anih taw Ethiopia

sangpahrang nu Kandaki a khawhthem ak khoemkung na awm hy. Anih ce Jerusalem na Khawsa ak bawk aham cet hy, ²⁸ im na ang hlat aw h meqang aw ngawi nawh tawng ha Isaiah cauk ce noet hy. ²⁹ Myihla ing Philip a venawh, “Cawhkaw meqang a venna cet nawhtaw a venawh awm pe lah,” tina hy.

³⁰ Philip ce meqang leng a venna dawng hy, cawh ce ak thlang ing tawng ha Isaiah ak cauk a noet ce za hy. “Na noet ce nak zasim nu? tinawh Philip ing doet hy.

³¹ Anih ing, “U ing amak kqawn caih law ce ikawmyihna kang zaak simnaak thai kaw?” tina hy. Cedawngawh Philip ce khy nawh kutoet na ngawi haih hy nih. ³² Cakciim a noet taw: “Him aham ak awm tuu amyihna sawi unawh, a myi ak vok peekkung a haiawh ak awm dym tuucamyihna, anih ing am kha am ang hy. ³³ Chahqai na amak thym na awideng uhy. U ing nu a cadilkhqi kawng ce ak kqawn thai kaw? Khawmdek aw hkawng a hqingnaak ce ami lawh peek a dawngawh,” a tive noet hy. ³⁴ Ce boei ing Philip ce doet hy, “Qeen naak ing kqawn law lah, tawng ha ing ve u akawng nu ak kqawn, thlang akawng nu ak kqawn?” tina hy.

³⁵ Cekcoengawh Philip ing cawhkaw cak ciim awi ing Jesu ak awithang leek ce kqawn pehy. ³⁶ Lam ani ceh haih aw h ce, tui a awmnaak hun pha nih nawh ce a boei ing, “Toek lah tui vawh awm hy ve. Baptisma am ka hu hly thai nawh nu?” tina hy. ³⁷ Philip ing, “Nak kawlung boeih ing nak cangnaak awhtaw hu hly thai hyk ti,” tina hy. Cawh boei ing, “Jesu Khrih taw Khawsa Capa ni ti cangna nyng,” tina hy.

³⁸ Cedawngawh meqang ce dym sak hy. Cekcoengawh Philip ingkaw boei ce tui a awmnaak na cet nih nawh Philip ing baptisma ce pehy.

³⁹ Tui a awmnaak awhkawng a ni hang law tlaih awh ce, Bawipa Myihla ing Philip ce ak chang na khyn valh hy, cedawngawh ce a boei ing anih ce am hu voel hy, cehlai zeel doena a khaw benna ce cet poe hy. ⁴⁰ Philip ce Azota khaw awh dang tlaih nawh Si a khaw a pha hlan dy lam awhkaw khaw a hoei awh ce awithang leek khypyih hy.

9

Damaska Lamawh Saul

¹ Ce tloek awh, Saul ing Bawipa a hubatkhqi ce him aham teng poepa hy. Khawsoih boei khyt a venna cet nawh, ²Damaska khaw awhkaw sinakaw na ceh thainaak ak ca ce thoeh hy, cawh lam awhkaw thlangkhqi ce a huh awhtaw, nu awm pa awm tu nawh Jerusalem thawngim na khyn aham cai hy. ³ Damaska khaw a pha tawm lam awh, khawk khan nakaw vangnaak ak bau soeih ing anih ce coei qawngtheng hy. ⁴ Dek na tlu nawh awi ing, “**Saul, Saul ikaw tinawh nu kai nani thekhanaak?**” tina hy.

⁵ Saul ing, Nang u nu, Bawipa? tina hy. Awi ing, “**Na thekhanaak Jesu kai ni.** ⁶ **Tuh tho nawhtaw khawk khuina cet lah, cawh na sai hly kawi ce qawn law bit kaw,**” tina hy.

⁷ Saul mi amik cet haih thlangkhqi ce awimyh na dyi hqoeng uhy; awi taw za lawt hlai uhy, thlang taw am hu uhy. ⁸ Dek awhkawng Saul ce tho hy, cehlai a mik dai saw ikaw awm am hu thai hy. Cedawngawh anih ce a kut awh tu unawh Damaska khawk khuina sawi uhy. ⁹ Khaw thum voei a mik hyp nawh buh awm am ai hy.

Saul A Baptisma

¹⁰ Damaska khaw khuiawh Ananias ak mingnaak hubat thlang pynoet awm hy. Bawipa ing anih ce huh saknaak ing, “**Ananias**” tinawh khy hy.

¹¹ Bawipa ing, “Lam dyng awh ak awm Juda a im na ce cet nawhtaw, Tarsu khaw awhkaw Saul ak mingnaak thlang ce doet lah, anih ce tuh cykcah hui hy. ¹² Anih ing huh saknaak awh Ananias ak mingnaak thlang ing a mik ang dangnaak thai aham ak khan awh kut tloeng peek aham a law ce hu hawh hy,” tina hy.

¹³ Ananias ing, “Bawipa, ve ak thlang ing Jerusalem khaw khui awhkaw nak thlak ciimkhqi a thekhanaak akawng a mik kqawn khawzah za nyng. ¹⁴ Khawsoih boeikhqi venawh kawng saithainaak ce lo nawh nang ming ak kqawnkhqi boeih ce tu aham vena law hy,” tina hy.

¹⁵ Cehlai Bawipa ing Ananias a venawh, “Cet! ve ak thlang ve Gentelkhqi ingkaw a sangpahrangkhqi ingkaw Israel thlangkhqi haiawh kang ming ak khypyi aham tyk hawh nyng. ¹⁶ Kang ming ak camawh khuikhanaak iqyt nu a huh kaw, tice kai ing huh bit kawng nyng,” tina hy.

¹⁷ Cekcoengawh taw Ananias ce im na cet nawh ipkhui na lut hy. Saul ak khan awh a kut tloeng pe nawh, “Ka na Saul, vena na law awh lam na na venawh ak dang Bawipa Jesu ing – na mik ang dangnaak tlaih aham ingkaw Ciim Myihla ing na benaak aham kai ve ni tyi hy,” tina hy. ¹⁸ Cawh Saul a mik awhkawng a khel amyihna tla nawh, a mik ce dang tlaih hy. Tho nawh baptisma hu pahoei hy.

Saul Ing Messiah Akong Kqawn Hy

¹⁹ Buh a ai coengawh, ak tha awm tlaih hy. Hubatkhi mi Saul ce Damaska khaw khuiawh khawqyt awm hy. ²⁰ Jesu ve Khawsa Capa ni tinawh sinakawkkhi awh kqawn pahoei hy. ²¹ Anih ak awi a mik zakhqi boeih ce a mik kawpoek kyi nawh, “Anih ve Jerusalem khaw khuiawh ve Jesu ang ming ak kqawnkhqi boeih ak thekhanaak thlang amyihna awm hlai hy ti? Cekkhi ni

khawsoeih boeikhqi venawh thawng awh thlaak aham ni vena a law?" ti uhy.

²² Cehlai Saul taw ak tha awm hqui khqoet khqoet hy, Jesu taw Khrih ni tice dyihpyi nawh, Damaska khaw awh ak awm Judakhqi ce noeng khqi hy.

²³ Khawngghi khawqyt ca a awm coengawh, Judakhqi ing him aham teng uhy, ²⁴ cehlai cekkhqi ang cainaak ce Saul ing sim hy. Khawmthan khawdai anih him thainaak aham vawng chawmkengkhi awh mah uhy. ²⁵ Cehlai a hubatkhi ing khawmthan awh ceh pyi unawh, vawng ak khan nakawng vaihqang awh nuk thla dym uhy.

Jerusalem Awh Saul

²⁶ Jerusalem a pha awh, hubatkhi mi huh qu aham sui hy, cehlai cekhi ing kqih uhy, hubat am tang vani hy voei tinawh poek uhy. ²⁷ Cehlai Barnaba ing ceh pyi nawh ceityihkhi venna khyn hy. Saul ing lam awh Bawipa a huhnaak ingkaw Bawipa ing a venawh awi ak kqawn peek akawng ingkaw Damaska khaw awh kqihnaak a taak kaana Bawipang ming ing awi ak kqawn akawng khqi ce kqawn pek khqi hy. ²⁸ Cedawngawh Saul taw cekkhqi venawh awm nawh Jerusalem khaw khuiawh ngaihding na thoek hy, Bawipang ming ing qaalleeknaak ing awi ce kqawn hy. ²⁹ Greek awi na amik pau Judakhqi mi oelh qu unawh awi ce kqawn pek khqi hy, cehlai cekkhqi ing anih ce him aham ngaih uhy. ³⁰ Koeinaakhqi ing ce akawng ce ami sim awh, anih ce Kaiserea khaw na nu ceh pyi uhy, cekcoengawh Tarsu khaw na tyi uhy.

³¹ Cekcoengawh taw Juda qam, Kalili qam ingkaw Samari qam awh amik awm thlangboelkhi ce ngaihding na awm uhy. Ciim Myihla ing a mingmih ce thaawm sak

hy; tha pe nawh pung a tai khqoet khqoet uhy, Bawipa kqihnaak ing khaw sa uhy.

Aeneas Qoei Hy

³² Piter ce khaw lawngkhqi na cet nawh, Lydda khaw awkhaw thlak ciimkhqi hqip aham cet hy. ³³ Cawh ce Ainea ak mingnaak thlang pynoet, khaw kup kqet amak tho thai khawkkhem ce hu hy. ³⁴ Piter ing a venawh, “Ainea, Jesu Khrih ing ni qoei sak hawh hy. Tho nawhtaw na hi ce khyn hlah,” tina hy. Cawh Ainea ce tho pahoei hy. ³⁵ Lydda ingkaw Shaqon awh ak awm thlangkhqi boeih ing ami huh awh Bawipa benna hawi uhy.

Dorka Hqing Tlaih Hy

³⁶ Joppa khaw awh Tabitha ak mingnaak hubat thlang pynoet awm hy (ve ve Dorka tinawh leh uhy); anih taw ik-oeih leek ak sai ingkaw khawdeng khuikhakhqi ak dawm ak hlaikung na awm hy. ³⁷ Ce tloek awh anih ce tlo nawh thi hy, a pum ce ami silh coengawh ip khanna ta uhy. ³⁸ Lydda khaw taw Joppa khaw awkhawng zoe ca hy; hubatkhi ing Lydda khaw awh Piter awm hy ti a ming zaak awh, thlang pakkhih tyi unawh, “Ang tawinna law cang lah!” tinawh qeennaak thoe sak uhy.

³⁹ Cekkqawi a hu ce Piter ing hqut nawh, a pha awhtaw anih ce ak khan ipkhui na ceh pyi uhy. Nuhaikhqi boeih ing anak chung unawh kqang uhy, Dorka ing cekkhi mi ami awm haih awh a mingmih aham a sai peek quikhqi ingkaw hikhqi ce huh uhy. ⁴⁰ Piter ing cekhqi boeih ce ipkhui awkhawng ceh sak khqi hy; cekcoengawh khuk sym nawh cykcah hy. Nu ak thi benna ce mang nawh, “Tabitha tho hlah,” tina hy. Cawhkaw nu ing a mik ce dai law hy, Piter ce ahuh awh tho nawh ngawi hy.

⁴¹ Piter ing a kut awh tu nawh thawh hy. Cekcoengawh ak cangnaak thlangkhqi ingkaw nuhaikhqi ce khy nawh

cekkhqi a venawh ak hqing na pek khqi tlaih hy. ⁴² Ce ak awi ce Joppa khaw khuiawh thang khawnghak nawh thlang khawzah ing Bawipa ce cangna uhy. ⁴³ Joppa khaw aw h Piter taw mehvyn ak khqui Simon a im aw h khawngghi iqyt nu awm hy.

10

Kornelia Ingkaw Piter

¹ Kaiserea khaw aw hkaw thlang pynoet, Kornelia ak mingnaak ce awm nawh, anih taw Italy qalkap zakhat ak ukkung na awm hy. ² Anih taw a ipkhui kaw boeih ing Khawsa kqih unawh amik baw k thlangkhqi na awm uhy; ak voet ak hlauh thlangkhqi ce bawm khqi nawh Khawsa venawh ak cykcah poepa thlang na awm hy. ³ Hypoet awhtaw khawngkeng khawnoek pakthum a pha aw h hatnaak ik-oeih hu hy. Khawsa ak khan ceityih ce law nawh a venawh, “Konelia!” tina hy.

⁴ Konelia ing ak kqih doena toek ceet hy. “Bawipa ikaw?” tinawh doet hy. Khan ceityih ing, “Nak cykcah-naak ingkaw khawdeng hahqahkhqi na do na dannaak ce Khawsa haiawh simpoenaak ham pha hawh hy. ⁵ Piter tinawh amik khy Simon ce khy tlaih aham tuh Joppa khaw na thlang tyi lah. ⁶ Anih ce mehvyn ak khquikung Simon a im aw h awm hy, anih a im taw tuicunli a keng aw h awm hy, tina hy.

⁷ A venawh awi ak kqawnkung khan ceityih ce a ceh coengawh Konelia ing a tyihzawih thlang pakkhih ingkaw a tyihzawih awi ak ngai qalkap pynoet ce khy hy. ⁸ Ik-oeih a huh ingkaw ang zaak khqi boeih ce ak kqawn peek coengawh Joppa khaw na cekkhqi ce tyi hy. ⁹ A khawngawi nyn aw h cet unawh khaw k bau ami pha tawm khawnghyp aw h lam na ce, Piter taw iptih na cykcah aham kai hy. ¹⁰ Cawh ak phoen cawi nawh ai kawi pynoet

oet ai aham ngaih hy, buh ami lawh peek li awh, huh saknaak ik-oeih ce hu hy. ¹¹ Khan ak awng qu ce hu nawh hi a kil pupthli awh khan nakawng ik-oeih anuk thlaak law peek ce hu hy. ¹² Ce ak khuiawh ce khaw pupthli ak law qamsa soepkep ce awm nawh, dek awh ak cawlh ak tat ingkaw khan nakaw ak ding phakhqi awm awm hy.

¹³ Cawh awi ing a venawh, “**Piter tho, him nawhtaw ai,**” tina hy. ¹⁴ Piter ing, “Am ai hly nyng, Bawipa! Amak ciimcaih ingkaw tuih ak cu ikawm am ai khawi nyng,” tina hy.

¹⁵ Awi ing a hih voeinaak awh, “**Khawsa ing a ciim sak ce nang ing am ciim hy koeh ti,**” tina hy. ¹⁶ Vemyihna thum voei dy a awm coengawh, hi ce khawk khan na dawh pe hy.

¹⁷ Piter ing cawhkaw ik-oeih a huh ce ikaw hy voei nu, tinawh ak poek huiawh, Konelia ak thlang tyihkhqi ing Simon a im ce hu unawh vawng chawmkeng awh ce dyi uhy. ¹⁸ Piter tinawh amik khy, Simon ce im awh ak awm nu tinawh doet uhy.

¹⁹ Piter ing a them huh ce anak poek huiawh, Myihla ing a venawh, “Simon, thlang pakthum ing nang ni sui uhy. ²⁰ Cedawngawh tho nawhtaw ipkai na nuk kqum lah. Cekkhqi hu awh bat aham koeh tawngaa, kai ing ni cekkhqi ce ka tyih law hy,” tina hy.

²¹ Piter ce nuk kqum nawh cekkhqi venawh, “Nangmih ing nami sui ce kai ni. Ikaw cainak ing nami aw?” tinak khqi hy.

²² Cekkhqi ing, “Kaimih ve qalkap zakhat ukkung Konelia a im awhkawng law unyng. Anih taw thlakdyng ingkaw Khawsa ak kqih thlang na awm hy, cedawngawh Juda thlangkhqi boeih ing anih ve kqihchah uhy. Nang ak awihkqawn ngai aham khan ceityih ciim pynoet ing nang khy aham kqawn pehy,” tina uhy.

²³ Cawh Piter ing cekkhqi ce ipkhui na khy nawh pah sak hy. Cedawngawh a khawngawi nyn aw h tho nawh cekkhqi mi cet haih uhy, Joppa khaw aw hkaw koeinaakhqi aw m cet lawt uhy.

²⁴ A khawngawi nyn aw h Kaiserea khaw ce pha uhy. Kornelia ing anih ce a na lamtoen nawh a cakaw paqengkhqi ingkaw a pyipawkhqi boeih ce kutoet na khy khqi hy. ²⁵ Piter ce ipkhui na a lut aw h, Kornelia ing do nawh a khawkung aw h kqihchahnaak ing khuksym pehy. ²⁶ Cehlai Piter ing thawh sak tlaih nawh “Kai aw m thlanghqing lawt ni,” tina hy.

²⁷ Awi anik kqawn coengawh Piter ce ipkhui na lut nawh cawh ipkhui na thlang khawzah ak aw m ce hu hy. ²⁸ Cekkhqi venawh: “Juda thlang ingkaw Gentel thlang aw m haih aham am ciim hy tice sim uhyk ti; cehlai u aw m ciimcaih hy, am ciimcaih hy, niti kawi am ni tice Khawsa ing ni sim sak hy. ²⁹ Ce a dawngawh thlang na minik khy law sak aw hkawng a oelh kana law nyng. Cehlai ni doet khqi nyng, ikaw ham nanu nami nik khy?” tinak khqi hy.

³⁰ Cawh Korelia ing, “Ni hu hitphli aw h ce, ve atym khawngkeng khawnoek pakthum aw h ka mah a im aw h cykcah nyng. Cawh hi ak vang soeih ak bai thlang pynoet ce ka haiawh dyi nawh, ³¹ ka venawh, “Kornelia, nak cyhcahnaak ce sim peekna aw m nawh, thlang venawh na them peek aw m Khawsa ing sim hawh hy. ³² Ceamyihna awmsaw Joppa khaw na thlang tyi nawhtaw Piter ak mingnaak Simon ce khy sak. Anih ce tuicunli a kengawh ak aw m, mehvyn ak khquikung, Simon a im aw h khin na aw m hy,” ni tina hy. ³³ Cedawngawh thlang tyi lawk tlang nyng, law tiksaw leek soeih hy. Tuh Bawipa ing kaimih a venawh anik kqawn sak khqi boeih ce ngai aham Khawsa haiawh cun law boeih unyng,” tina hy.

Thlang Boeih Ham Awithangleek

³⁴ Cekcoengawh taw Piter ing awih kqawnnaak ce qcan hy, “Khawsa ing u a hai awm am toek hy tice tuh sim hawh nyng, ³⁵ amah ak kqih ingkaw ak thymna bi ak sai qampum awhkaw thlang boeih ce do hy. ³⁶ Israel thlangkhqi venawh Khawsa ing awi pehy, thlang boeih a boei, Jesu Khrih ak coming ngaihqepnaak awithang leek ak kqawn peek ce nangmih ing sim uhyk ti. ³⁷ Johan ing baptisma ak khypyi coengawh, Kalili qam awhkawng qcan nawh Judah qam pum awhkaw ik-oeih ak awm ce – ³⁸ Khawsa ing Ciim Myihla thaawmnaak ing Nazareth Jesu a sypnaak akawng ingkaw Khawsa ingqawi a awm haih a dawngawh, qaaiche ak thaawmnaak ak kaiawh ak awmkhqi ce qoei sak nawh them leek a saikhqi ce sim uhyk ti. ³⁹ Judakhqi qam ingkaw Jerusalem khaw khuiawh a sai ik-oeihkhqi boeih ak simpyikung dyihthing na kaimih ve awm unyng. Anih ce thing aw h tai unawh him uhy, ⁴⁰ cehlai Khawsa ing anih ce thihnaak awhkawng am thum nyn aw h thawh sak tlaih nawh thlang a huh aw h dang sak hy.

⁴¹ Thlang boeih ing anih ce am hu hy, cehlai Khawsa amah ing ak tyh oepchoeh dyihthing na ak awm, thihnaak awhkawng a thawh coengawh amah ingqawi buh a an ak ai haih kaimih ing hu unyng. ⁴² Thlak hqing ingkaw thlak thi awideng aham anih doeng ni Khawsa ing a caksak hy, tice khypyi aham ingkaw sim sak aham kaimih ve awi ni pek khqi hy. ⁴³ U awm amah ce ak cangnaak thlang boeih ing amah ang ming ak coming thawlh qeenkhaw ngainaak hu kaw, tice tawnghakhqi boeih ing anak kqawn hawh uhy,” tinak khqi hy.

⁴⁴ Piter ing ve ak awikhqi ve ak kqawn li aw h, awi ak zakhqi boeih ak khan aw h Ciim Myihla ce law hy. ⁴⁵ Gentelkhqik khan aw h awm Ciim Myihla kutdo ce syp sihna a awm aw h Piter ingkaw amik law haih chahhui

ak qeet ak cangnaak thlangkhqi ce amik kawpoek kyi hy. ⁴⁶ Cekkxqi ing amsim awi na pau unawh, Khawsa a mim kyihcah ce a ming zaak awh a mingngaihna kyi hy. Cekcoengawh Piter ing, ⁴⁷ “U ing nu vekkxqi ve tui ing baptisma ama peek aham a kham peek thai kaw? Kaimih ing ka mi huh lawt amyihna a mingmih ingawm Ciim Myihla ve hu hawh lawt uhy,” tina hy. ⁴⁸ Cekcoengawh cekkxqi ce Jesu Khrih ang ming ing baptisma huh aham awi pehy. Cekkxqi ce khawngghi iqyt nu awm pyi cang aham Piter a venawh thoeh uhy.

11

Thlang Boeih Ham Hulnaak

¹ Ceityihkhqi ingkaw Juda qam pum awh ak awm koeinaakhqi ing Gentelkhqi ingawm Khawsak awi do hawh lawt uhy tice za uhy. ² Cedawngawh Piter ce Jerusalem na a ceh awh, chahhui qeet ak cangnaak thlangkhqi ing coet uhy, ³ “Chahhui amak qeet thlangkhqi venna cet nawh a awk a ai,” tina uhy. ⁴ Piter ing cawhkaw ik-oeih akawng ce cekkxqi venawh ak ceet cana kqawncaih pek khqi hy. ⁵ Joppa khaw awh awm nyng saw kak cykcah huiawh, huhsaknaak ce hu nyng. Hi ak bau soeih amyihna ak awm a kil pupthli ak law ik-oeih pynoet ce, kai ka awmnaak hun awh khan nakawng tla law hy. ⁶ Ce ak khui ce ka toek awh dek awhkaw a khaw pupthli ak awm qamsa soepkep ingkaw ak cawlh ak tat qamsakhqi khan nakaw phakhqi ce hu nyng.

⁷ Cawh awi ing ka venawh, ‘**Piter, tho lah. Him nawhtaw ai,**’ ni tina hy. ⁸ Kai ing, “Am ai hly nyng! Amak ciim caih ingkaw tuih ak cu ikawm kam khak khuiawh am lut man hy,” tina nyng. ⁹ Khawk khan nakaw awi ing a hih voeinaak awh, ‘**Khawsa ing a ciim sak ce, ce nang ing am ciim hy koeh ti,**’ ni tina hy. ¹⁰ Cemyihna thum

voei dy a awm coengawh, cawhkaw ik-oeih ce khan na lo law tlaih hy. ¹¹ Cawhce Kaiserea khaw awhkawng a tyih law thlang pakthum ce ka awmnaak im awhkaw vawng chawmkeng aw h d yi uhy. ¹² Ciim Myihla ing kawhaa a taak kaana cekkhqi hu aw h bat aham kqawn hy. Vawhkaw koeinaakhqi thlang kquk awm law lawt uhy. Cekcoengawh amik khy law sakkung thlang a im aw h ce lut unyng. ¹³ Ce ak thlang a im aw h khan ceityih dang pe nawh, 'Joppa khaw aw h Piter tinawh amik khy Simon ce khy sak. ¹⁴ Anih ing namah ingkaw na ipkhuikaw boeih thlang na na awmnaak hly kawi aw ithang ce haw law bit kaw' a tinaak awi ce kaimih a venawh kqawn law hy.

¹⁵ Cawh, awi kak kqawn cyk awhkawng, Ciim Myihla nik khanawh a pha law cyk awhkaw amyihna amik khanawh pha law hy. ¹⁶ Cawh Bawipa ing, 'Johan ing tui ing baptisma ce ni pek khqi hlai hy, nangmih ingtaw Ciim Myihla baptisma hu kawm uk ti,' a tice poek lawt nyng. ¹⁷ Bawipa ing ningnih ani peek khqi lawt amyihna Bawipa Jesu Khrih ak cangnaak cekkhqi a venawh awm cawhkaw kutdo ce a peek awhtaw, kai ve a u na nu ka awm nawh Khawsa ce oelh aham kak poek kaw? tinak khqi hy. ¹⁸ Ce ak awi ce a ming zaak aw h coetnaak taak voel kaana Khawsa ce kyihcah uhy, "Cawhtaw Khawsa ing Gentelkhqi awm hqingnaak huh aham zut sak khqi hawh lawt hy ce," ti uhy.

Antiok Khaw Awhkaw Thlangboel

¹⁹ Stephen thekhanaak awhkawng amik pek qukhqi ce Phonicia, Kupra ingkaw Antiok khawkhqi na cet unawh Juda thlangkhqi ven doeng aw h aw ithang leek ce kqawn pe uhy. ²⁰ Cehlai a mingmih anglakawhkaw Kupra ingkaw Cyqene khaw awhkawng ak law thlang vang tloek ce Antiok khaw na cet unawh Greek thlangkhqi

venawh awm Bawipa Jesu ak awithang ce kqawn pe uhy. ²¹ Bawipa a kut ce a mingmih a venawh a awm dawngawh, thlang khawzah ing cangna unawh Bawipa benna hawi uhy. ²² Amingmih ak awithang ce Jerusalem awh ak awm thlangboelkhqi ang haa awh awithang na za uhy. Cedawngawh Barnaba ce Antiok khaw dy na tyi uhy. ²³ Anih ce pha nawh Khawsam qeennaak ce a huh awh, kawlung boeih ing ak cak cana Bawipa awh awm poe aham zeel doena cekkhqi ce tha pek khqi hy. ²⁴ Barnaba taw thlak leek na awm nawh, Ciim Myihla ingkaw cangnaak ing ak be thlang na awm hy. Cedawngawh thlang khawzah ce Bawipa venna sawi khqi hy. ²⁵ Cekcoengawh Saul sui aham Barnaba ce Tarsu khaw na cet hy, ²⁶ anih ce a huh awh, Antiok khaw na ce law pyi hy. Cedawngawh kum oet khui Barnaba ingkaw Saul ing thlangboel khuiawh thlang khawzah ce cawngpyi hy nih. Hubatkhqi ce Antiok khawawh lammacyk na “Khrihcakhqi” tinawh khy uhy. ²⁷ Ce tloek awh tawngha thlang u tloek nu Jerusalem awhkawng Antiok khawna cet uhy. ²⁸ Cekkhqik khuiawh kaw Agaba ak mingnaak thlang pynoet ce dyi nawh Myihla simsaknaak ing Rom uknaak qam boeih awh khawkhanaak pha law kaw, tinawh khypyti hy. (Cawhkaw khawkhanaak ce Klaudia a boei vengawh pha hy.) ²⁹ Hubatkhqi ing a mimah a mina khoek awh Judah awh ak awm koeinaakhqi ce pyi khqi aham kqawn uhy. ³⁰ Cawhkaw pyinaak kutdo ce a hqamcakhqi ing Barnaba ingkaw Saul a kut awh pat pe uhy.

12

Thawngim Awhkawng Piter Loeih

¹ Ce tloek awh kut thlak aham a ngaih dawngawh, Herod sangpahrang ing thlangboel khuiawh kaw thlang pynoet ce tuhy. ² Anih ing Johan a na Jokop ce cimca ing

him hy. ³ Cemyihna a sai ak coming Judakhqi zeel sak hy tice a huh awh, Piter awm tu aham cai hy. Ce a tym taw hen amak boei phaihpi poei na awm hy. ⁴ Piter ce am tu coengawh thawngim na thla nawh, qalkap bu pupthli, qalkap pupthli pupthli ce qeh sak khqi hy. ⁵ Cedawngawh Piter ce thawngim na tahy, cehlai thlangboel ing Khawsa venawh ak dung soeih na cykcah pe uhy. ⁶ Herod ing awideng aham ang cainaak a nyn a pha tawm a khawthan awh, Piter ce qalkap pakkhih anglak law awh ip hy; thiqui pakkhih ing khit uhy; cekcoengawh chawmkeng awh awm qaltoek ce dyi bai hy. ⁷ Kawlhkalth awh khan ceityih ce a venawh dyih pe nawh thawngim khui ce vangnaak ing coei pheng hy. Piter ce ak pep awh beei nawh thawh hy. “Ang tawna tho,” tina saw ak kut awhkaw thiqui tla pahoei hy. ⁸ Cawh khan ceityih ing, “Na hi bai nawhtaw na khawmyk ce myk lah,” tina hy. Ak kqawn peek amyihna Piter ing sai hy. “Na hi ce bai nawhtaw ka hu awh law lah,” tinawh khan ceityih ing tina hy. ⁹ Piter taw cawn nawh a huawh cet hy; khan ceityih a bibi ve a takna am ngai nawh, ang myimang na ngai hy. ¹⁰ Qaltoek pynoetnaak ingkaw pakkhihnaak ce haih poeng nih nawh khawk khuina cehnaak thi chawmkeng ce pha hy nih. Chawmkeng ce amah poek awh cekqawi aham awng qu nawh cet poe hy nih. Lam pynoet ce ani ceh phat coengawh, khan ceityih ing cehta hy.

¹¹ Piter ing, “Herod a kut khui ingkaw Judakhqi ing kak khan awh ik-oeih soepkep ami sainaak ak khuiawh kawng hul a ham Bawipa ing ak khan ceityih tyi law hy, tice tuh taw ak caih na sim hawh nyng,” tihy.

¹² Khaw a dai awhtaw, Marka tinawh amik khy, Johan a nu Meri a im na ce cet hy, Cawh ce thlang khawzah a nang cun unawh a nak cykcah uhy. ¹³ Piter ing a leng nakawng chawh ce khoeik hy, cawh Rodi ak mingnaak tyihzawih

nuca pynoet ce chawmkeng na va cet hy. ¹⁴ Piter ak awi ce hat nawh, a zeel aih awh a huna dawng lat nawh, “Piter chawmkeng awh dyi hy!” tinawh khy hy.

¹⁵ Cekkhi ing, “Am cyi hyk ti,” tina uhy. Cehlai anih ing a mantang na a tinaak khqi awh, “Ak khan ceityih vani hy voei,” tina uhy. ¹⁶ Cehlai Piter ing chawh ce khoek khing hy, chawh ce a mim awng peek awhtaw, anih ce hu unawh a mingngaih kyi hy. ¹⁷ Piter ing a kut ing cekkhi ce ami awm dymnaak aham hatnaak a peek khqi coengawh, Bawipa ing ikawmyihna thawngim khuiawh kawng a loet sak tice kqawn pek khqi hy. Cekkhi venawh, “Jakob ingkaw koeinaakhqi venawh kqawn law pe uh,” tinak khqi hy, cekcoengawh ak chang na cet poe hy. ¹⁸ Mymcang awh, Piter a loet a dawngawh thawngim amik qeh qalkapkhqi ce awi pung uhy.

Herod A Thihnaak

¹⁹ Herod ing anih ce ak leek cana sui sak nawh ama huh voel awhtaw, thawngim ak qeh qalkapkhqi ce awideng nawh thih sak aham awi pehy. Cekcoengawh Herod ce Judah awhkawng Kaiserea na cet nawh cawh ce awm hy. ²⁰ Tura ingkaw Sidon khaw awhkaw thlangkhqi mi anih ce anang hqo qu khing hawh uhy; cekkhi ce kutoet na bawng qu unawh thlang kqeng mi za qu uhy. Sangpahrang a ypawm tyihzawih Blasta ang dyihpyinaak ce lo unawh, cekkhi ing sangpahrang a qam ce buh a an lawhnaak aham a ming hangnaak na a awm a dawngawh, qoepnaak sai aham thoeu uhy. ²¹ Khawngghi ami taaknaak a nyn a pha awhtaw, Herod ing a boei suisak ing thoei ang cam qu nawh, boei ngawihdoelh awh ang ngawih coengawh a venawh awi kqawn hy. ²² Cawhkaw thlangkhqi ing, “Vawhkaw awi ve Khawsak awi ni, thlanghqi awi amni,” tinawh khy uhy.

²³ Herod ing thang leek kyihcahnaak ce Khawsa venawh ama peek a dawngawh, Bawipa ak khan ceityih ing anih ce vyk pahoei hy, cheng ing ai nawh thi hy. ²⁴ Cehlai Khawsak awi ce pung a tai khqoet khqoet hy. ²⁵ Saul ingkaw Barnaba ing bibi ce ani boeih coengawh taw, Marka tinawh awm amik khy, Johan ce ceh pyi nih nawh, Jerusalem awhkawng hlat hy nih.

13

Barnaba Ingkaw Saul Tyi Uhy

¹ Antiok khaw awhkaw thlangboel ak khuiawh tawng-hakhqi ingkaw cawngpyikungkhqi ce awm uhy; cekkhqi taw Barnaba, Niger tinawh amik khy Simeon, Cyqene khaw awhkaw Lucius, Herod a koeina hly Manen ingkaw Saul vetloek ve awm uhy. ² Cekkhqi ing Bawipa bibi unawh buh zeih cykcahnaak ami taak huiawh Ciim Myihla ing, “Kai aham Barnaba ingkaw Saul ce ka bi ak bi ham ka taak kqawi amyihna ni hoep pe uh,” tina hy. ³ Cedawngawh buh zeih unawh ami cykcah coengawh, cekqawi ak khan aw h kut tloeng unawh amik cykcah peek coengawh tyi uhy.

Kupra Ham Awithangleek

⁴ Cecoengawh Ciim Myihla ing a tyih qawi amyihna Silucia na nu cet nih nawh cawhkawng Kupra benna lawng ing cet hy nih. ⁵ Salamis khaw ani pha aw h, Judakhqi a sinakaw h aw h Khawsak awi ce khypy i hy nih. Johan awm ani bi ak bina ceh pyi lawt hy nih. ⁶ Cawhkaw tuilak cung aw h ce cet phat nih nawh Paphos khaw ce pha uhy. Ce a khaw aw h Juda phyn miklet ak thoem tawng ha qawl Bar - Jesu ak mingnaak thlang pynoet ce hu uhy. ⁷ Anih taw Rom qam ukkung Sergia Paula a venawh awm hy. Cawhkaw qam ukkung cetaw thlakcyi na awm nawh,

Khawsak awi ce zaak aham a ngaih a dawngawh Barnaba ingkaw Saul ce thlang tyi nawh khy sak hy. ⁸ Cehlai Rom qam ukkung ing cangnaak ce ang hawi taak thainaak aham miklet ak thoem Elima (ce ce anih ang ming kqawn ngaihnaak ni) ing cekqawi ce ana oelh hy.

⁹ Cawh Paul tinawh awm amik khy Saul ce Ciim Myihla ing be nawh, Elima ce a toek hqet coengawh, ¹⁰ “Nang ve qaai a cana na awm a dawngawh ik-oeih ak thym boeih a qaal na awm hyk ti! Thailatnaak soepkep ingkaw qaaiqawwnnaak ing be hyk ti. Bawipa a lam ak thym na kawi sak ve amna qoeng hly nawh nu? ¹¹ Bawipa a kut ce nak khan awh awm hawh hy. Na mik hyp kawmsaw, tuhkawng khawkbe ce am hu voel kawp ti,” tina hy. Kawlhkalth aw hawh ingkaw thannaak ce ak khan aw hawh pha pe saw, kutawh tu nawh ak sawi aham thlang thoem hyhy hy. ¹² Qam ukkung ing cawhkaw a them sai ce a huh aw hawh, cangna hy, Bawipa akawng cawngpyinaak aw hawh ak kawpoek na kyi hy.

Antiok Awh Paul Ak Awikqawn

¹³ Paphos khaw awhkawng Paul ingkaw a pyikhqi ce Pamphylia qam khuiawh kaw Perga khaw na ce lawng ing cet uhy, cawh Johan ing cekkhqi ce Jerusalem na hlat taak khqi hy. ¹⁴ Perga khaw awhkawng Pisidian Antiok khaw na ce cet uhy. ¹⁵ Anaa awi ingkaw tawng hawh caukkhqi noetnaak a awm coengawh, sinakaw ukkungkhqi ing cekkhqi venawh, “Koeinaakhqi thapeek awi kqawn aham nami taak awhtaw, kqawn thai uhyk ti,” tinak khqi hy.

¹⁶ Paul ing dyi nawh thlang boeih ce a kut ing zap khqi nawh: “Israel thlangkhqi ingkaw Khawsa ak bawh nangmih Gentelkhqi aw, kak awi ve ngai lah uh! ¹⁷ Israel thlangkhqi a Khawsa ing ningnih a pakhqi ce anak tyk hy; Izip qam aw hawh ami aw hawh cekkhqi ce boei a mang

sak khqi hy, a boeimang thaawm kut ing cekkhqi ce qam khuiawh kawng sawi khqi tlaih hy, ¹⁸ a mingmih a khawboe qamlang ce qamkoh aw h kum phlikip khuiawh yh hy, ¹⁹ anih Kanan qam khuiawh kaw qam khqih ce noeng pe nawh qam ce cekkhqi avenawh qo na pehy. ²⁰ Vemyihkhqi ve kum zali coengawh hakip dii hy. Cek-coengawh Khawsa ing cekkhqi ce tawng ha Samuel a awm hlan dy awidengkungkhi ana pehy. ²¹ Cekcoeng aw hkawng thlangkhqi ing sangpahrang ce ana thoe h unawh, cedawngawh Benjamin kaw ak khuiawh kaw Kish a capa Saul ce ana pek khqi hy, anih ing kum phlikip ak khuiawh ana uk khqi hy. ²² Saul ce a qoeng coengawh, David ce sangpahrang na taak pek khqi hy. David aw h ce anih ing: ‘Kamah ak kawlung amyihna ak awm Jesse a capa David ce hu hawh nyng; kai ing sai sak aham ka ngaih ce anih ing sai boeih kaw,’ tihy. ²³ Ce ak thlang a cadil khui aw hkawng Khawsa ing Israelkhqi venawh awi a taaknaak amyihna hulkung Jesu ce pehy. ²⁴ Jesu a law hlanawh Johan ing zutnaak ing baptisma akawng ce Israelkhqi boeih a venawh anak khypy i hy. ²⁵ Johan ing amah a bibi ak coeng tawm aw h: ‘Kai ve a u nu tinawh namik poek? Kai taw anih amni. Cehlai ka hu aw h ni a law hly hyn hy, anih a khawmyk qui ak hlam peek aham zani am kawih nyng,’ tihy.

²⁶ Koeinaakhqi, Abraham a cakhqi ingkaw nangmih Khawsa ak kqih Gentel thlangkhqi aw, cawhkaw hul-naak aw ithang ce ningnih a venawh pat law haw h hy. ²⁷ Jerusalem khaw aw hkaw thlangkhqi ingkaw a ming-mih ak ukkungkhqi ing Jesu ce am hat uhy, Sabbath a hoeiaw h ami noet tawng hakhqik awi ce a soepnaak aham anih ce thawlh sak kuphlet uhy. ²⁸ Thih sak thainaak aham a thawlhnaak awm am hu hlai uhy, him thainaak

aham Pilat a venawh thoeh uhy. ²⁹ Anih akawng qee hyt na ak awmkhqi boeih ce ami sai peek coengawh, thing awhkawng lo unawh phyi awh pup uhy. ³⁰ Cehlai thihnaak awhkawng Khawsa ing anih ce thawh tlaih hy; ³¹ khawngghi khawzah amah ingqawi Kalili awhkawng Jerusalem na ak cetkhqi mi hu qu uhy. Cekkhqi ce ningnih thlangkhqi venawh simpyikung na awm uhy. ³² Cedawngawh awithang leek ve ka nik kqawn peek khqi: Ni pakhqi venawh Khawsa ing awi ana taak ce,

³³ Jesu a thawh tlaihnaak ak coming, ningnih a cakhqi venawh soep law sak hawh hy. Saam pakkhihnaak: 'Nang taw ka capa na awm hyk ti; tuhngawi awh na pa na awm nying,' tinawh ana qee amyihna.

³⁴ Khawsa ing anih ce ama hawnaak zip qoe qoe aham, thihnaak ak khuiawh kawng am thawh tlaihnaak awh ce vemyihna kqawn hy: 'David a venawh ak ciim ingkaw zoseennaak awikam ka taak ce ni pe kawng nying,' tinawh.

³⁵ Hun ak chang awh vemyihna qee bai hy: 'Nak thlang ciim ce ityk awh awm am thu sak zip kawp ti,' ti bai hy. ³⁶ David ing Khawsa ang cainaak ce amah a khuk khuiawh a bi boeih coengawh thi hy; a pakhqi venawh pup unawh a pum ce thu zip hawh hy. ³⁷ Thihnaak awhkawng Khawsa ing am thawh tlaih thlang cetaw am thu zip kaw.

³⁸ Cedawngawh ka koeinaakhqi, Jesu ak coming thawlh qeenkhaw ngainaak ce nangmih a venawh khypy na awm hy tive sim sak aham ni ngaih khqi nying. ³⁹ Mosi a anaa awi ak coming am hu thai hlai uhyk ti, ak cangnaak thlangkhqi boeih taw anih ak coming dyngnaak ce hu hy.

⁴⁰ Tawngaha ing anak kqawn hyt awi ce nangmih ak khan awh ama pha lawnaak aham ngaihta lah uh:

⁴¹ 'Toek lah uh, nangmih thlang ak hepkhqi,

namik kawpoek kyi sak unawh qeeng uh, thlang ing
 ak kqawn law aw hawm,
 amna mik cangnaak qoe qoe aham, na hqing
 khuiawh ik-oeih sai law kawng nyng,
 tinawh ana qee hyt awi ve,' tinak khqi hy.

Antiok Awh Paul Ingkaw Barnaba

⁴² Paul ingkaw Barnaba ing sinakawk awhkawng ani
 ceh awh, ce akawng ce hai Sabbath nyn awh kqawn peek
 tlaih aham thlangkhqi ing ceei uhy. ⁴³ Thlang kqeng a ceh
 coengawh, Juda thlang khawzah ingkaw Juda phungna
 ak hawi qu Khawsa ak kqih thlangkhqi ing Paul ingkaw
 Barnaba a hu ce hquut uhy, cekqawi mi awikqawn unawh,
 cekkhqi ce Khawsa qeennaak ak khuiawh awm poe aham
 awikqawn pe hy nih.

⁴⁴ Sabbath nyn a pha tlaih awh awm khawk khui
 awhkaw thlang ak kuum ngai taw Bawipa awi ak ngai
 aham law uhy. ⁴⁵ Judakhqi ing thlang kqeng ce ami huh
 awh tlai se unawh amak thym na Paul ak awih kqawn ce
 oelh pe uhy.

⁴⁶ Cedawngawh Paul ingkaw Barnaba ing cekkhqi ce
 qal leeknaak ing awi hlat pe hy nih: “Khawsak awi
 ve nangmih a venawh kak kqawn maa aham awm hy.
 Cehlai nangmih ing oelh u tiksaw na mimah ce kumqui
 hqingnaak ing ak kawih na amna mik poek a dawngawh
 tuh taw Gentelkhqi benna ni ka ming mang hly hawh hy.

⁴⁷ Ikawtih Khawsa ing vemyihna awi ni pe qawi hy:

‘Gentelkhqi vangnaak na nang ve ni sai hawh nyng,
 khawmdek a dytnaak dyna hulnaak ce na khyinnaak
 aham,’ ti ak awi ve,” tina hy nih.

⁴⁸ Gentelkhqi ing ce ak awi ce a ming zaak awh, zeel
 unawh Bawipak awi ce zoeksang uhy; kumqui hqingnaak
 huh aham a hoep thlangkhqi ing cangna uhy. ⁴⁹ Bawipak

awi ce ce a qam pum awh thang hy. ⁵⁰ Cehlai Judakhqi ing Khawsa ak kqih dyih hun ak sang nukhqi ingkaw khawk khuiawh kaw ukkung thlangkhqi ce cuih uhy. Paul ingkaw Barnaba ce the a kha na unawh ce a qam khui awhkawng hqek uhy. ⁵¹ Cedawngawh cekqawi ing cekkhqi a mami ngaih huh saknaak na ani khaw awhkaw dekpli ce khawk sih nih nawh Ikonium khaw na cehta hy nih. ⁵² Hubatkxqi ce Ciim Myihla ing be unawh zeel soeih uhy.

14

Ikonium Khaw Awh

¹ Ikonium khaw ani pha awh Paul ingkaw Barnaba ce ani ceh khawi amyihna Judakhqi a sinakawh awh cet hy nih. Ce a khaw na awi anik kqawn awh Juda thlang ingkaw Gentel thlang khawzah ing ak awi cangna uhy. ² Cehlai cangnaak aham amak ngaih Judakhqi ing Gentelkhqi ce cuuk khqi unawh, cekkhqi ami sawhnaak aham ti pyikhqi uhy. ³ Cedawngawh Khawsa awh qaalleeknaak ing awikqawn nih nawh cawh khawqoet awm hy nih. Noeknaak ingkaw kawpoekkyi them saithainaak khqi ani kut awh pe qawi nawh, a lungnaak awi ce sim sak qawi hy. ⁴ Cawh khawk khuiawh kaw thlangkhqi ce pakkhih na pek qu uhy; thlang vang ing Judakhqi bawng unawh, thlang vang ing ceityih qawi ce bawng uhy. ⁵ Gentelkhqi, Judakhqi ingkaw ukkungkhqi ing aningnih ce chah phiyih sak ham ingkaw lung ing deem aham cai uhy. ⁶ Cehlai cekqawi ing sim nih awh Likonia khaw awhkaw Lustra khaw, Derbe khaw ingkaw a kengsam khawkxqi na cen hy nih, ⁷ ce a qam khuiawh awithang leek ce khypyih hy nih.

Lyhstra Ingkaw Derbe Khaw Awh

⁸ Lustra khawawh, a thang awhkawng a khaw khem nawh, khaw ing amak cet man, thlang pynoet awm hy. ⁹ Anih ing Paul ak awih kqawn ce ngai hy. Paul ing anih ce toek ceet ceet nawh, qoeinaak khoek cangnaak tahy tice sim hy, ¹⁰ cedawngawh, “Na khaw ing dyi lah!” tina hy. Cawh ce pet nawh cet pahoei hy. ¹¹ Paul a them sai ce thlang kqeng ing a huh awh, Likonia awi na, “Khawsa qawi ve thlang hqing amyihna ningnih a venawh law hawh hy!” ti unawh khy uhy. ¹² Barnaba ce Zeus tina unawh, Paul ce awih kqawnkung na a awm a dawngawh Hermes tina uhy. ¹³ Khaw kengawh ak awm Zeus khawsoeih ingawm hyih phum ham a ngaih awh vaitaw ingkaw khqai aawi ce vawng chawmkeng awhkaw thlang kqeng ahaiawh law pyi nawh, ce thlang kqengkhi mi hyihphum hamna cai uhy. ¹⁴ Cehlai ceityih qawi Paul ingkaw Barnaba ing ce ak awi ce a ning zaak awh, ani hi tiik nih nawh thlang kqeng ak khuina lut hy nih: ¹⁵ “Ikaw hamna veve sai usih nami ti? Kainih awm nangmih amyihna thlang hqing lawt ni ka ti, nangmih a venawh awithang leek ni ka ni haw law hy, vemyih a them ikaw na amak coengkhi ve cehta unawh ak hqing Khwsa khawk khan ingkaw khawmdek, tuicunli ingkaw ak khuiawh ak awm a soep ak sykung benna naming hlat aham ni ka nik kqawn law hy. ¹⁶ Ni hu awh ce Khawsa ing, thlangphyn boeih ce amah ak kawngaihnaak amyihna ceh sak hy. ¹⁷ Cehlai ikaw simpynaak a awm kaana amah doeng ce am awm hqoeng hy: Nangmih a venawh khawk khan nakawng khaw aa law sak hy, a tym a tang awh tawi a ankhqi ni pek khqi hy; awk-ai khawzah ni pek khqi nawh namik kawlung ngaih a qep saknaak ak coming am qeennaak ce dang law sak hy,” tinak khqi hy. ¹⁸ Vemyihna awi ak kqawn peek coengawh awm, thlang kqeng ing cekqawi a venawh hyih amak phumnaak aham kham pe tloei hy nih. ¹⁹ Cawh Antiok khaw awhkawng

Judakhqi law unawh thlang kqeng ce noeng uhy. Paul ce lung ing khawng unawh, vawng a ceng na sawi uhy, thi hawh namih hy tina poek uhy. ²⁰ Cehlai hubatkxqi ing amik chung khoep awh, Paul taw tho nawh khawk khuina cet tlaih hy. A khawngawi nyn awh Barnaba ingqawi Derbe khaw na cet hy nih.

Thlangboel Pung Hy

²¹ Ce a khawk khuiawh awithang leek kqawn nih nawh hubat khawzah hu hy nih. Cekcoeng awhkawng Lustra, Ikonium ingkaw Antiok na hlat tlaih nih nawh, ²² hubatkxqi ce tha ani peek coengawh cangnaak awh awm poe aham awi kqawn pe hy nih. “Khawsa qam khuiawh lut aham kyinaak soepkep ve ni huh aham awm qoe hy,” tina hy nih.

²³ Ani cehnaak thlangboel qip awh sawikung ce tyh pek khqi nih nawh, buh zeh cykcahnaak ing ami cangnaak Bawipa venawh pe hy nih. ²⁴ Pisidia qam ce ani poeng coengawh, Pamphylia qam khuina cet hy nih, ²⁵ Perga khaw awh awithang leek anik kqawn coengawh, Attalia khaw na nu cet hy nih. ²⁶ Bibi anik coeng hawh a dawngawh Attalia khaw awhkawng Khawsam qeennaak khuiawh ani awmnaak, Antiok khaw na lawng ing cet tlaih hy nih. ²⁷ Antiok khaw ani pha awh thlangboel ce khy nih nawh cekqawi hawnaak ing Khawsa ing ik-oeih a sainaak ingkaw Gentelkhqi venawh ikawmyihna cangnaak chawh am awng peek, tice kqawn pe hy nih. ²⁸ Ce a khaw awh hubatkxqi mi khawngxi khawqyt ca awm uhy.

15

Jerusalem Council

¹ Judah qam awhkawng thlang ak cawn law ing, “Mosi a cawngpyinaak amyihna chahhui am nami qeet awhtaw

thaawngnaak am hu kawm uk ti,” anawh koeinaakhqi ce ana cawngpyi khqi uhy. ² Ve a kawnglamawh Paul, Barnaba ingkaw cekkhqi ce ak tlon a oelh qu uhy. Ve oelhqunaak ak camawh Jerusalem awh ak awm ceityihkhqi ingkaw ak hqaamcakhqi venna ak cet hamna Paul, Barnaba ingkaw aming lak awhkaw thlang chang thlang vang tloek ce tyk uhy. ³ Thlangboel ing cekkhqi ce thak khqi unawh, Phinicia qam ingkaw Samaria qam khuina ami ceh awh, Gentelkhqi ikawmyihna amik kaw ami thaw ti akawng ce kqawn pek khqi uhy. Cawhkaw awithang ing koeinaakhqi boeih ce zeel sak khqi hy. ⁴ Jerusalem khaw ami pha awh, cekkhqi ce thlangboel, ceityihkhqi ingkaw a hqamcakhqi ing ana do khqi uhy, cekkhqi hawnaak ing Khawsa ing them a saikhqi boeih ce kqawn pe uhy.

⁵ Cawh ak cangnaak thlang khuiawh Farasi benna ak awm thlang vang tloek ing dyi unawh, “Gentelkhqi ce chahhui qeet sak nawh, Mosi a anaa awi ce hquut aham cawngpyi ham awm hy,” ti uhy. ⁶ Cedawngawh cawhkaw awi kqawn aham Jerusalem khaw na ceityihkhqi ingkaw a hqamcakhqi ce cun uhy. ⁷ Awi amik kqawn coengawh Piter ce dyi nawh awi kqawn hy: “Koeinaakhqi, Gentelkhqi ing kai am kha awhkawng awithang leek ce za unawh amik cangnaak thai aham synawh Khawsa ing nangmih ak khuiawh kaw thlang vang ce tyk hy. ⁸ Kawlung ak simkung Khawsa ing, ningnih a venawh ani peek khqi lawt amyihna, cekkhqi venawh Ciim Myihla a peeknaak ak coming cekkhqi ce do hawh hy tice dang sak hawh hy. ⁹ Khawsa ing ningnih ingkaw a mingmih ce am pek am bo hy, cangnaak ak coming cekkhqi ak kawlung ce ciimcaih sak hawh hy. ¹⁰ Cawhtaw ikaw ham ningnih ingkaw ni pakhqi ing zani ni naa tloei phiyihqi ce hubatkqi a hawng awh tloeng pe nawh Khawsa ce noek a dak aham naming cai uh? ¹¹ Amni! Ningmih a Bawipa Jesu

am qeennaak ak cam ing ni, a mingmih amyihna ningnih awm hul na ni awm hy,” tinak khqi hy.

¹² Barnaba ingkaw Paul hawnaak ak coming Khawsa ing Gentelkhqi venawh kawpoek kyi hatnaak ik-oeih a saikhqi ce cekqawi ing anik qqawn awh thlang kqeng ing ngai uhy.

¹³ Anik qqawn boeih coengawh, Jakob ing, “Koeinaakhqi ngai lah uh. ¹⁴ Khawsa ing ikawmyihna ak cyk awh amah aham Gentel thlangkhqi a lawhnaak akawng ce Simeon ing nik qqawn law pek khqi hawh hy. ¹⁵ Ve ak awi ingkaw tawnghakhqi ak awi awm qoep hy:

¹⁶ ‘Vek coengawh hlat kawng nyng saw, David a imca ak tlu ce sa tlaih kawng nyng.

Ak seekhqi ce sa tlaih kawng nyng saw, thawh tlaih kawng nyng.

¹⁷ Thlak chang, kang ming ak phyi Gentelkhqi boeih ing Bawipa

suinaak hamna ce im ce dyih tlaih kawng nyng, ' ti ce.

¹⁸ Khawmdek syncyk awhkawng ve ak awi ak sim-sakkung Bawipa ing tihy, ' tinawh ana qee amyihna.

¹⁹ Cedawngawh, Khawsa benna ak hlat Gentelkhqi ce kyinaak peek aham am awm hy, tinawh awi tlyk nyng.

²⁰ Bulnaak sainaak buh a ankhqi ama ai aham, nupa amak thym na thawlh sainaakkhqi, a hawng awh ak khak mat mehkhqi ingkaw a thikhqi a mami ai aham ca mah pat u sih ti nyng. ²¹ Ikawtih ak cykca awhkawng Mosi ing khaw boeih awh ak awi qqawnpikung tyk khawi lawt nawh, Sabbath a hoei awh anih ak awi ce sinakawk awh noet poepa uhy,” tina hy.

Gentlekhqi Venawh Council Capat

²² Cekcoengawh ceityihkhqi ingkaw a hqamcakhqi ing thlangboel ingkaw a mimah anglakawhkaw thlang vang ce tyk unawh Antiok khaw na Paul ingkaw Barnaba mi tyi haih uhy. Judas (Barnabas a mi tinaak) ingkaw Sila

ce tyk uhy, cekqawi ce koeinaakhqi ak sawikung na awm hy nih. ²³ Cekqawi a kut aw h ak kai aw h kaw amyihna ca pat pe uhy. Ceityihkhqi ingkaw a hqamcakhqi, nangmih a koeinaakhqi ing,

Antiok khaw ingkaw Siria qam ingkaw Kilikia qam aw h ak awm cangnaak cakhqi venawh:

Kut ni tlaih khqi unyng.

²⁴ Kaimih a simpyinaak a awm kaana kaimih a venawh kawng thlang thlang vang nangmih a venawh law unawh nangmih ce kyinaak ni pek khqi uhy, cekkhqi ak awi aw h naming ngaih kyi hy tinawh za unyng. ²⁵ Cedawngawh thlang vang ce tyk unawh taw pyi qawi Paul ingkaw Barnaba mi nangmih a venna tyi haih u sih, tinawh ka ming ha tla boeih hy. ²⁶ Cawh kaw thlangkhqi cetaw ningnih a Bawipa Jesu Khrih ang ming aw h ami hqingnaak amik pekhqi na awm uhy. ²⁷ Cedawngawh kaimih ing ka qee law ce awi ing caksak aham Juda ingkaw Sila ve tyi law unyng. ²⁸ Ak kai aw h kaw ak ngoe ik-oeihkhqi doeng kaa taw ak chang phiyihqi am ka mi phiyih sak aham Ciim Myihla ingkaw kaimih ing nep hy ti unyng. ²⁹ Bulnaak sainaak buh a ankhqi, thikhqi, hawng khak mekhqi koeh ai kawm uk ti, cekcoengawh amak ciim nupa thawlhnaak koeh sai kawm uk ti. Vemyihkhqi amna mi sai awhtaw nep bit kaw.

Nami sa dip seh,” ti unawh pat uhy.

³⁰ Cekkhi ce ami tyih coengawh Antiok khaw na ce cet uhy, cawh thlangboel ce pynoet na cet unawh ca ce pe uhy. ³¹ Ca ce ami noet aw h cawh kaw thapeeknaak awi aw h ce zeel uhy. ³² Juda ingkaw Sila awm, tawngha na ani awm a dawngawh, koeinaakhqi ce tha pe nih nawh awi kqawn pe hy nih. ³³ Khawngghi iqyt nu cawh ani awm

coengawh, koeinaakhqi ing cekqawi ce ngaihdingnaak awi ing cekqawi ak tyikungkhqi venna tyi tlaih uhy. ³⁴Cehlai Sila taw cawh ce awm aham cai hy. ³⁵Paul ingkaw Barnaba ce Antiok khaw awh awm poe hy nih, Bawipa ak awi ce thlang khawzah a venawh cawngpyi nawh kqawn hy nih.

Paul Inkgaw Barnaba Am Qoep Hy Nih

³⁶Khawngghi iqyt dy nu a dii coengawh Paul ing Barnaba na ce, “Bawipak awi nik kqawnnaak khaw a hoei awh cet nih nawhtaw koeinaakkhqi ce hqip tlaih lah sih, ikawmyihna nu ami awm hy voei? tina hy.

³⁷Barnaba ing Marka tinawh awm amik khy Johan ce ceh pyi aham ngaih hy, ³⁸cehlai anih ing cekqawi ce Pamphylia khaw awh cehta nawh bibinaak awh amak bawng poe thai a dawngawh Paul ingtaw anih ce ceh pyi aham am nep hy tinawh poek hy. ³⁹Ce akawng awh ce oelh qu nih nawh kqeng hy nih. Barnaba ing Marka ce khyn nawh Kupra benna cet hy nih, ⁴⁰cehlai Paul ingtaw Sila ce tyk nawh koeinaakhqi ing Bawipa am qeennaak awh ami peek coengawh cet lawt hy nih. ⁴¹Siria ingkaw Kilikia qam benawh kawng cet nih nawh thlangboelkhqi ce thapeeknaak awi kqawn pe hy nih.

16

Paul Ing Timote Tyk Hy

¹Cawhkawng Derbe ingkaw Lustra khaw ce pha hy. Ce a khaw awh a nu Juda nu, a pa Greek na ak awm hubat thlang pynoet Timote ce awm hy. ²Anih taw Lustra ingkaw Ikonium khaw awhkaw koeinaakhqi ing a mim kyih thlang pynoet na awm hy. ³Paul ing anih ce ceh pyi poe aham ngaih hy, cedawngawh cawh amik awm

Judakhqi ak coetnaak ama awmnaak aham cekkhqi ing a pa Greek pa ni tice ami sim boeih a dawngawh anih ce chahhui qeet pehy. ⁴ Khaw pynoet coeng pynoet ami ceh coengawh, thlangkhqi ing Jerusalem khaw awhkaw ceityihkhqi ingkaw a hqamcakhqi ing awi amik tlyh ce ngaih aham kqawn pe uhy. ⁵ Cedawngawh thlangboelkhqi ce cangnaak awh tai unawh pung khqoet khqoet uhy.

Europe Na Awithangleek

⁶ Asia qam awh awi kqawn aham Ciim Myihla ing a kham peek a dawngawh, Paul ingkaw a pyikhqi ce Phrygia qam ingkaw Galatia qam na cet poe uhy. ⁷ Musia qam khawqi ce ami pha awh, Bithynia qam khuina ceh aham cai uhy, cehlai Jesu ang Myihla ing cekkhqi ce am ceh sak hy. ⁸ Cedawngawh Musia qam ce kan unawh Troas khaw na nu cet uhy. ⁹ Cawh a awm awh Paul ing ik-oeih huh saknaak awh Makedonia thlang pynoet ing dyi nawh a venawh, “Makedonia na law unawh taw kaimih ve ni bawm khqi lah.” tinawh qeennaak thoeh hy.

¹⁰ Cawhkaw ik-oeih huh saknaak ce Paul ing a huh coengawh, Makedonia na ceh aham cai pahoei unyng. Khawsa ing cekkhqi venawh awithang leek kqawn aham nik khy khqi hy tice sim unyng.

Lydia Ing Hqingthai Hu Hy

¹¹ Troas khaw awhkawng tuicunli awh lawng ing Samothrace khaw na cet unyng, cawhkawng a khawngawi awh Neapolis na cet poe unyng. ¹² Cawhkawng Rom a uknaak khui awhkaw qam Makedonia qam khuiawh kaw khawk bau na ak awm Philipi khaw na khaw ing cet unyng. Cawh ce khawngghi khawqyt awm unyng. ¹³ Sabbath nyn awh cykcah aham khawk bau vawng chawmkeng a ceng benna kaw long na ce cet unyng. Cawhkaw amik cun nukhqi venawh awi kqawn pe unyng. ¹⁴ Cawhkaw awi

ak ngaikhqik khuiawh Thyatira khaw awhkaw Khawsa ak baw hik thim ak zawi nu thlang pynoet Lydia ak mingnaak ce awm lawt hy. Paul ak awih kqawn do aham Bawipa ing anih ak kawlung ce awng pehy. ¹⁵ Amah ingkaw a ipkhuikaw boeih ing baptisma ami huh coengawh, kaimih ce a im na nik khy khqi hy. “Kai ve Bawipak awi ak cangnaak thlang na nami nik poek lawt awhtaw ka imna pah law uh,” ni tinak khqi hy. Anih ing kaimih ce ni hlawh khqi hy.

Paul Ingkaw Sila Thawngimna

¹⁶ Hypoet taw cykcahnaak aham ka mi ceh awh, ni hai benna kaw ik-oeih ak kqawn thai qaai ak ta nuca tamnaa pynoet ce hu unyng. Hailam ben ik-oeih ak kqawnnaak ak coming a boei aham tangka huh pehy. ¹⁷ Cawhkaw nuca ing Paul ingkaw kaimih a hu aw haw law nawh, “Ve ak thlangkhqi ve nangmih hulnaak ak kqawn lawkung, sawsang khyt Khawsa a tyihzawihkhqi ni,” tinawh khy hy. ¹⁸ Khawngghi cemyihna ce kqawn khing hy. A hukhit na taw Paul ing kaw hul law nawh cawhkaw qaai na ce, “Jesu Khrih ang ming ing vawhkaw nuca ak kaw khuiawh kawng cawn hlah!” tina hy. Cawh qoe qoe aw h ce qaai ing cawhkaw nuca ce cehta hy.

¹⁹ Cawhkaw tamnaa nuca a boeikhqi ing tangka ami huhnaak am awm voel hy tice ami sim aw h, Paul ingkaw Sila ce tu unawh, ik-oeih zawihnaak a hun aw h ukkungkhqi venna sawi uhy. ²⁰ Cekqawi ce awidengkung a venna sawi unawh, “Vekqawi ve Juda phyn qawi ni, ni khaw na law nih nawh awipungnaak sai hy nih, ²¹ ningmih Rom thlangkhqi ing sai hly kawi am ingkaw do hly kawi am phung alamkhqi sai sak aham kqawn hy nih,” tina uhy.

²² Thlang kqeng ing Paul ingkaw Sila ce him aham za qu uhy, cawh awidengkungkhqi ing cekqawi a hi ce suh

sak nawh vyk aham awi pehy. ²³ Cekqawi ce ak tlo na ami vyk coengawh, thawngim na thla uhy, ak nep na doen aham thawngim ak qehkung ce awi pe uhy. ²⁴ Cawhkaw awipeeknaak amyihna anih ing cekqawi ce thawngim khui ak kaina ak thlak coengawh khawceh byn sak qawi bawh hy.

²⁵ Thanlung awh Paul ingkaw Sila ing cykcah nih nawh Khawsa kyihcahnaak laa ce sa hy nih, cawh thlang thawng ang tlaak pyikhqi ing ngai pe uhy. ²⁶ Cawh lipi thloek law nawh thawngim ce tlai law nyk nyk hy. Thawngim chawhkhqi boeih ce awng qu pheng nawh, thlang boeih a thiquikhqi awm hlam qu boeih hy. ²⁷ Thawngim ak qehkung ce hqyng law nawh thawngim chawh ak awng qu boeih ce a huh awh, thawng ak tlakhqi cen boeih hawh hy voei uh tinawh, ak cimca ce phlawng nawh amah ingkaw amah sun qu aham cai hy. ²⁸ Cehlai Paul ing, “Namah ingkaw namah koeh sai qu! Kaimih vawh awm boeih unyng!” tina hy.

²⁹ Cawh thawngim ak qehkung ing mai a vang sak coengawh thawngim khuina dawng nawh Paul ingkaw Sila a haiawh thyn doena khyk sym pehy. ³⁰ Cekkqawi ce thawngim a ceng na a sawi qawi coengawh, “Bawipa qawi, hulna ka awmnaak aham ikaw ka sai kaw?” tina qawi hy.

³¹ Cekkqawi ing, “Bawipa Jesu ce cangna nawhtaw, cawhtaw namah ingkaw na ipkhuikaw boeih hul na awm kawm uk ti,” tina hy nih. ³² Cekcoengawh cekqawi ing Bawipa ak awi ce anih ingkaw a ipkhuikaw boeih a venawh kqawn pe hy nih. ³³ Cawh qoe qoe awh thawngim ak qehkung ing cekqawi ce ceh pyi nawh ani maakhqi ce silh pehy; cawh amah ingkaw a ipkhuikaw boeih ing baptisma hu pahoei uhy. ³⁴ Thawngim ak qehkung ing cekqawi ce amah a im na ceh pyi nawh buh ai sak qawi hy; amah

ingkaw a ipkhuikhaw boeih ing Khawsa ce amik cangnaak hawh a dawngawh anih ce zeelnaak ing be hy.

³⁵ Khaw a dai awhtaw, awi ak tlykkungkhqi ing vawhkaw awipeek ing thawngim ak qehkng a venawh thlang tyi uhy: “Cekqawi ce hlah hlah,” tina uhy.

³⁶ Thawngim ak qehkung ing Paul a venawh, “Awi tlykkungkhqi ing nang ingkaw Sila ve hlah awi ni pe hawh uhy. Cedawngawh cet thai hawh hy nik ti. Ngaihqep cana cet hlah nih,” tina qawi hy.

³⁷ Cehlai Paul ing cawhkaw amik law thlangkhqi venawh: “Rom thlang na awm hlai nih nyng, awi ani deng hlanawh thlang a haiawh ni vyk uhy, cekcoengawh thawngim aw hnik thlak qawi bai hy. Tuh kainih ve ang hyp na tyi dym aham ngaih unawh nu? Amni! A mimah qoe qoe law u seitaw kainih ve ni hlah law u seh,” tina hy.

³⁸ Cawhkaw thlangkhqi ing anih ak awi ce awi tlykkungkhqi venawh qawn pe uhy, Paul ing Sila ce Rom thlang ni tice cekkhqi ing a ming zaak aw h, kqih uhy.

³⁹ Law unawh cekqawi a venawh qeennaak ami thoe h coengawh hlah uhy, ce a khaw ce cehtaak aham cekqawi a venawh qeennaak thoe h uhy. ⁴⁰ Paul ingkaw Sila ce thawngim aw hkawng ani loet coengawh, Lydia a im na cet hy nih, cawh ce koeinaakhqi hqum nih nawh thapeeknaak awi qawn pe hy nih. Cekcoengawh ak chang na cet hy nih.

17

Thesalonika Khaw Awh

¹ Amphipolis ingkaw Apollonia khaw ce ani poeng coengawh Thesalonika khaw ce pha hy nih, cawh ce Judakhqi sinakaw pynoet awm hy. ² A ceh khawi amyihna, Paul taw sinakaw na cet hy, Sabbath thum voei khuiawh cekkhqi mi cauk awi ce qawn uhy, ³ Khrih ing

khuikha kyinaak hu kawmsaw thihnaak awhkawng tho tlaih kaw, tice kqawn caih pehy. “Nangmih a venawh kai ing ka nik kqawn law peek khqi Jesu ve Khrih hawh hy,” tinak khqi hy. ⁴ Juda thlang thlang vang ing cangna unawh Paul ingkaw Sila ce bawng uhy, Khawsa ak kqih Greek thlang khawzah ingkaw nu qypawm khawzah ingawm bawng lawt uhy.

⁵ Cehlai Judakhqi tlai se unawh, ik-oeih ami zawihnaak hun awh thlak che pynoet ceh pyi uhy; thlang kqeng cun khqi unawh khawk khuiawh awipungnaak ce sai uhy. Jason a im ce muk unawh Paul ingkaw Sila ce thlang kqeng a haiawh sawi aham cai uhy. ⁶ Cehlai cekqawi ce a mami huh law awhtaw, Jason ingkaw koeinaa thlang vang tloek ce khawboei a venna sawi unawh, “Kawmdek seetnaak ak sai qawi ce ve pha law hawh hy nih, ⁷ Jason ing cekqawi ce do nawh a im awh pah sak hy. Cekqawi ing Kaisar ak awipeek oelh nih nawh, sangpahrang ak chang Jesu awm hy, tinawh kqawn hy nih,” tinawh khy uhy. ⁸ Ce ak awi ce a ming zaak awh, thlang kqeng ingkaw khawboeikhqi ce so khqoet uhy. ⁹ Jason ingkaw ak changkhqi ce ceh sak uhy.

Berea khaw Awh

¹⁰ Khaw am than awhtaw koeinaakhqi ing Paul ingkaw Sila ce Berea khaw na tyi uhy. Ce a khaw ce ani pha awh Judakhqi a sinakaw na ce cet hy nih. ¹¹ Berea khaw awhkaw thlangkhqi taw Thesalonika khaw awhkaw thlang khqing lak awh cyi khqoet uhy, a mingmih ingtaw Paul ak awih kqawn ce ak nep cana a ming ngai peek coengawh, anih ak awih kqawn ve ak thym tang hy voei nu ti unawh cauk awh ak nep cana sui uhy. ¹² Juda thlang khawzah ing cangna unawh Greek thlak mang nunu papa khawzah ingawm cangna uhy.

¹³ Paul ing Berea khaw awh awithang leek kqawn hy tice Thesalonika khaw awhkaw thlangkhqi ing a ming zaak awh, ce na ce cet bai unawh thlang kqeng ce ami cuih coengawh awipungnaak sai bai uhy. ¹⁴ Koeinaakhqi ing Paul ce tuicunli a keng na thak pahoei uhy, Sila ingkaw Timote taw Berea khaw awh awm hy nih. ¹⁵ Paul ak thak thlangkhqi ing anih ce Atheni khaw na ceh pyi uhy, Sila ingkaw Timote ce a venawh law zy aham awi a yn coengawh cekkhqi ce hlat uhy.

Atheni Khaw Awh

¹⁶ Paul ing cekqawi ce Atheni khaw awh a qeh awh, khawk khui boeih myiqawl bawknaak ing be uhy tice a huh awh ak kawlung khuikha hy. ¹⁷ Cedawngawh sinakawk awh Judakhqi, Khawsa ak kqih Greekkhqi mi Khawsak awi kqawnaak ce tahy, them ami zawihnaak hun awh khaw hypoet coeng hypoet cawhkaw amik awmkhqi mi Khawsak awi kqawn qu pe uhy. ¹⁸ Cawh Epikuria ingkaw Stoik thlakcyikhqi mi ce oelh qu uhy. Cekkhqi anglakawhkaw thlang vang ing, “Vawhkaw ak so thlang ing ve ikaw nu ti ak kqawn lawt?” tina uhy. Thlang vang tloek ing, “Qap chang nakaw khawsa akawngkhqi ni ak kqawn namih hy ve,” tina uhy. Paul ing Jesu ak awithang leek ingkaw thawh tlaihnaak akawng ak kqawn dawngawh cemyihna ce tina uhy. ¹⁹ Areopaga ami ti cunnaak a hun na ceh pyi unawh a venawh, “Vawhkaw cawngpyinaak ak thai nak kqawn ve kaimih a venawh nak kqawn law hly thai nu? ²⁰ Awi nak kqawn ve kaimih ang zaak awhtaw lang hy, cedawngawh zaksim aham ngaih unyng,” tina uhy. ²¹ Cedawngawh Athenis khaw awhkaw thlangkhqi ingkaw khinkhqi boeih awm, ami hoeng tym awh a hoei awh awikqawnaak ingkaw awi doetnaak na hawna uhy.

²² Areopagi cunnaak awh Paul ce dyi nawh: “Athenis thlangkhqi! Ik-oeih soepkep awh bawknaak ak thin tlawhnaak thlang na awm uhyk ti tice sim nyng. ²³ Cet nawh nangmih ing nami bawkkhqi ce ka toek lah awh, “AMSIM KHAWSA HAMNA,” tinawh nami qee ce hu nyng. Nangmih ing a sim kaana nami bawk ce ni, tuh kai ing kak kqawn law hy.

²⁴ Khawmdek ingkaw ak khuiawh ak awm boeih ak saikung Khawsa ve khan ingkaw khawmdek boei na awm nawh kut ing a sai bawkim awh ak awm am ni; ²⁵ them amak sai thai amyihna thlanghqing ing a sai peek ak ngoe Khawsa am ni; amah ing a soep hoei boeih a venawh hqingnaakkhqi, bibinaakkhqi ingkaw ik-oeih boeih ak pekung na awm hy. ²⁶ Thlanghqing ve khawmdek pum boeih awh pynoetna khawsak boeih hamna thlang phyn boeih ce sai nawh, ami ham atym ingkaw amik khawsaknaak ham khawqi khan pek khqi hy. ²⁷ Khawsa sui unawh, thoem unawh, ami huhnaak hqet thai aham anih ing lak am ni hla khqi hy. ²⁸ Amah ak coming ni hqing, ning tat thai unawh ning plaa thai uhy; nangmih awhkaw hla ak phawh thai thlang pynoet ing awm, 'Ningnih awm a cadilkhqi na nik awm ni,' tinawh ak kqawn amyihna.

²⁹ Cedawngawh Khawsa a cadilkhqi na ni awm hawh kawng taw, Khawsa ve thlanghqing ing sui ing aw, tangka ing aw, lung ing aw a sai myiqawl amyihna poek aham am awm hy. ³⁰ Khawsa ing am ni simnaakkhqi ce nim hilh pek khqi nawh; cehlai tuawh ve qam boeih awhkaw thlang boeih zyt aham awi pek hawh hy. ³¹ Ikawtih, amah ing ak tyh thlang ce hawna nawh khawmdek awideng aham khawngghi ce hoep hawh hy. Thihnaak awhkawng anih ce a thawh saknaak ak coming thlang boeih a venawh vawhkaw hatnaak ce dang sak hawh hy,” tinak khqi hy.

³² Thlak thi thawhnaak akawng a ming zaak awh, thlang vang tloek ing qaih na uhy, cehlai thlang vang ingtaw, “Ve ak awi ve ka ming ngai tlahi aham ngaih unyng,” tina uhy. ³³ Cehlai Paul ing a miven awhkawng cehtak khqi hy. ³⁴ Thlang a khoeh Paul a hu awh bat unawh ak awih kqawn ce cangna uhy. Cekhqi anglakawh Areopagi khuiawh kaw thlang pynoet Dionisia ingkaw Damari ak mingnaak nu pynoet ingkaw thlak changkhqi awm pa uhy.

18

Korin Khaw Awh

¹ Cekcoengawh, Paul ing Atheni khaw ce cehta nawh, Korin khaw na cet hy. ² Ce a khaw awh, Akuila ak mingnaak Juda phyn pynoet ce hu hy, anih taw Pontus thlang na awm nawh, a zu Prikilla ingqawi Italy nakawng anik law thaai na awm hy nih. Klaudia ing Juda thlangkhqi boeih Rom awhkawng a hqek khqi dawngawh cekqawi awm law lawt hy nih. Cekqawi a venna Paul ce cet hy. ³ Cekqawi awm anih amyihna hi im ak khquikung na awm lawt hy nih, cekqawi a venawh awm nawh bibi haih uhy. ⁴ Sabbath nyn hoei awh sinakaw na cet nawh Khawsak awi ce kqawn hy, Juda thlangkhqi ingkaw Greek thlangkhqi ce ak dawh ngai ngai aham ngaih hy.

⁵ Sila ingkaw Timote ce Makedonia awhkawng ani law awhtaw, Paul taw awithang leek doeng ni ak kqawn hawh hy, Juda thlangkhqi venawh Jesu taw Khrih ni tinawh kqawncaih pek khqi hy. ⁶ Cehlai Judakhqi ing Paul ce oelh unawh ami the ami khanaak awhtaw a mingmih ce a hi khawk sih khqi nawh, “Na mimah a thi ce na mimah a luk khan awh tla seh! Kai taw ka sai hly kawi boeih ce sai hawh nyng. Tuhkawng taw Gentelkhqi venna ni ka ceh hly hawh hy,” tinak khqi hy. ⁷ Paul ing sinakaw ce cehta nawh ce a venawh ak awm Khawsa ak bawk Titia Justa a im

na cet hy. ⁸ Sinakaw ak temkung Krispa, ing a ipkhuikaw boeih ing Bawipa ce cangna uhy; cekcoengawh ak awih kqawn za nawh ak cangnaak Korin thlang khawzah ing baptisma hu uhy.

⁹ Than oet awh huhsaknaak ing Bawipa ing Paul a venawh awi kqawn pehy: “Koe h kqih nawh, ang dym kaana awi ce kqawn poe. ¹⁰ Kai na venawh awm nyng, nak khanawh u ingawm kut am nik thlak kawm uh; ve a khawawh thlang khawzah ta nyng,” ti hy. ¹¹ Cedawngawh ce a khaw awh Paul taw kumoet awm nawh, Khawsak awi ce cawngpyi hy.

¹² Akhaia qam ukkung Gallio a awm awh, Judakhqi ing Paul ce cuuk sih unawh awidengkungkhi venna sawi uhy. ¹³ “Ve ak thlang anaa awi ing ak kalh na Khawsa bawk aham thlang syk hy,” tina uhy.

¹⁴ Paul ing awikqawn vang a ti awh, Gallio ing Judakhqi venawh, “Nangmih Judakhqi aw, veve amak thym awi mai aw thawlh saknaak mai aw na a awm man, a thanaak kana namik awi ve ning ngaih pek khqi voei nyng. ¹⁵ Cehlai namik awikhqi, mingkhqi ingkaw namik anaa awikhqi na a awm awhtaw namimah ing awitlyk uh; kai ing cemyih awikhqi ce tlyk ham am ngaih hy nyng,” ti hy. ¹⁶ Cedawngawh cekkhqi ce awidengnaak a hun awhkawng ceh sak khqi hy. ¹⁷ Cawh cekkhqi ing sinakaw ak temkung Sosthen ce tu unawh, awidengnaak a haiawh ce vyk uhy. Cehlai Gallio ing cekkhqi ce am ngai am zaak nak khqi hy.

Antiok Khaw Awh

¹⁸ Paul taw Korin khaw awh khawngghi iqyt nu awm hy. Cekcoengawh cawhkaw koeinaakhqi ce cehtaak khqi nawh Siria na ce lawng ing cet hy, Priskilla ingkaw Akuila ing bawng hy nih. Lawng ing a ceh hlanawh awi a taaknaak amyihna, Kenkhrea khaw awh a lu ce voh hy.

¹⁹ Ephesa khaw a mi pha law awh Paul ing Priskilla ingkaw Akuila ce cehta hy. Amah taw sinakaw na cet nawh Judakhqi venawh khawsak awi kqawn pehy. ²⁰ Cekkxqi venawh khawqyt awm aham a mik kqawn peek awh, anih ing tha na hy. ²¹ Cekkxqi ce a cehtaak khqi awh, “Khawsa ing tyng hy a ti awhtaw law tlaih bit kawng nyng” tinak khqi hy.

²² Cekcoengawh Ephesa khaw awhkawng lawng ing cet poe hy. Siria khaw a pha awh, hang cet nawh thlangboel ce kut a hang tlaih khqi coengawh Antiok khaw na ce nu cet poe hy. ²³ Antiok khaw awh khawngghi iqyt nu a awm coengawh ce ahun awhkawng Galatia qam ingkaw Phrygia qam khaw awh hun pynoet pynoet awh cet nawh hubatkxqi boeih ce thapeeknaak awi kqawn pehy.

²⁴ Cawh Apollo ak mingnaak Juda phyn pynoet Alexandria thlang ce Ephesa na law hy. Anih taw awih kqawn ak thoem na awm nawh, cauk awi ak nep na ak sim thlang na awm hy. ²⁵ Anih taw Bawipa a lam awh cuukiik na awm hawh hy, Johan baptisma doeng ni a sim hyn hlai hy, thahly doena Jesu akawng ce ak caih na thlang cuuk am kiik hy. ²⁶ Sinakaw awh qaal leek doena awi kqawn hy. Priskilla ingkaw Akuilla ing anih ak awih kqawn ce a ning zaak awh anih ce im na khy nih nawh Khawsa a lam ce ak nep cana kqawn pe hy nih. ²⁷ Apollo ce Akhaia qam na ceh a ngaih awh koeinaakhqi ing anih ce tha pe unawh, cawhkaw amik awm hubatkxqi ing anih ce ami donaak aham ca qee pe uhy. Anih a pha awh am qeennaak ing ak cangnaak thlangkhqi aham anih taw tha ak pekung na awm hy. ²⁸ Anih ingtaw a haiawh Judakhqi ce oelh khqi pheng pheng nawh, Jesu ce Khrih ni tinawh kqawn caih pehy.

19

Ephesa Khaw Awh Paul

¹ Apollo ce Korin khaw awh a awm awh, Paul ing tlang lam benna kawng Ephesa khaw na ce cet hy. Cawh hubat pynoet ce hu nawh, ² doet khqi hy, Namik cangnaak awhkawng Ciim Myihla namik hu aw?" tinak khqi hy. Cekkhqi ing, "Am hu unyng, Ciim Myihla awm hy ti awm am za khawi unyng," tina uhy. ³ Cawhtaw ikaw baptisma nu nami huh?" Paul ing tinak khqi hy. Cekkhqi ing, "Johan a baptisma ni ka mi huh," tina uhy. ⁴ Cawh Paul ing, Johan baptisma taw zutnaak baptisma ni. Anih a hu awh ak law hly kawi ce cangnaak aham thlangkhqi venawh kqawn pehy, ak law hly kawi Jesu ce cangnaak aham," tina hy. ⁵ Ce ak awi ce a ming zaak awh, cekkhqi ing Jesu Khrih ang ming awh baptisma ce hu uhy. ⁶ Paul ing a mingmih ak khan awh a kut tloeng pek khqi nawh, Ciim Myihla ce a mingmih ak khan awh law hy, cekkhqi ing amsim awi na pau unawh awi ce kqawn uhy. ⁷ Cawhkaw ak awm tloek ce pa thlanghqa hlaihih law uhy.

⁸ Paul ing sinakawk na cet nawh hla thum khuiawh qaal leeknaak ing awi kqawn hy, Khawsa qam awithang leek benna thlangkhqi ce zoek khqi nawh awi kqawn pek khqi hy. ⁹ Cehlai thlang vang tloek taw a mim thin sah soeih nawh; ak awih kqawn ce ama mik cangnaak coengawh lam akawng ce qangpui a haiawh ak che na kqawn uhy. Cedawngawh Paul ing cekkhqi ce cehtak khqi hy. Hubatkhi ce khy nawh Turanna ca cawngnaak im awh myngawi na awi kqawn hy. ¹⁰ Ceamyihna kum hih dy awh sai phat hy, cedawngawh Asia qam awh ak awm Judakhqi ingkaw Greekkhi ingtaw Bawipak awi ce za uhy.

¹¹ Khawsa ing Paul hawnaak ing kawpoekkyi themkhqi sai hy, ¹² cedawngawh Paul a pum awhkaw pavawh ingkaw a hi aawica pateng awm thlaktlokhqi venna khyn pe unawh, ak bikhqi boeih ing qoei unawh kawkkhui awhkaw qaaikhqi ing cawn uhy. ¹³ Juda thlang pynot ing Bawipa Jesu ang ming hawnaak ing sungqaaikhqi hqek aham sungqaai ing am tukhqi venna ce cet uhy, “Paul ing ak khypyti Jesu ang ming ing, cawn aham awi ni pe unyng,” tina uhy.

¹⁴ Juda khawsoeih boei, Skeva ak thlang khqih tloek ing cemyihna ce sai uhy. ¹⁵ Hypoet awhtaw qaaiche ing, “Jesu awm sim nyng, Paul akawng sim nyng, nang ve a u a myih nu?” tina hy.

¹⁶ Cawh qaaiche ak ta thlang ing cekkhqi ce cuuk sih khqi nawh cekkhqi ce noeng khqi hy. Cekkhqi ce khqaak khqi doet hloet nawh ak pum a zal na ami thi ami hai ing cet uhy. ¹⁷ Ce ak awi ce Ephesa khaw awh amik awm Judakhqi ingkaw Greekkhqi ing a ming zaak awh kqih uhy, Bawipa Jesu ang ming ce zoeksang uhy. ¹⁸ Ak cangnaak thlang khawzah ce law unawh a mimah ing them amak leek ami saikhqi ce pho qu uhy. ¹⁹ Kutlam ak toek thai thlangkhqi ingawm a mimah a caukkhqi ce haw law unawh thlang a haiawh caukkhqi ce mai awh phum uhy. Cawhkaw cauk phu ce ami tawh awh tangka thawng sawmnga phu ting hy. ²⁰ Ceamyihna Bawipak awi ce pung a tai nawh taanaak ta hqui hqui hy.

Ephesa Khaw Awhkaw Awipungnaak

²¹ Vemyihna a awm coengawh, Paul ing Makedonia qam ingkaw Akhaia qam nakawng awh Jerusalem na ceh aham cai hy. “Ce ka pha coengawh Rom khaw na awm ka ceh aham awm hy,” tihy. ²² Amah ak bawmkung Timote

ingkaw Erasta ce Makedonia qam na tyi hy, amah Asia qam aw h awm hyn hy.

²³ Cawh lam akawng aw h awipungnaak awm hy.

²⁴ Artemi bawkthang ak saikung, Demetria ak mingnaak, tangka thi ak deep ing bawkthang a sainaak ak coming tangka hu hy. ²⁵ Anih ing a bibi phukhqi ing, ce bawkthang ak zawikhqi ce pynoet na khy khqi nawh, “Ve bibinaak aw hkawng tangka ni hu uhy tice sim uhyk ti.

²⁶ Cehlai vawhkaw Paul ing ve Ephesa khaw ingkaw Asia qam pum aw hkaw thlangkhqi ce, 'Kut ing khawsakhqi ve khawsa tangkhqi am ni,' tinawh thlang khawzah zoek khqi nawh lam hang pyi khqi hawh hy tice za unawh sim hawh uhyk ti; ²⁷ Cedawngawh ni bibi pho kaw tinawh kqih a awm doeng am nawh, khawsanu Artim a bawkim ve awm ikawna am sui law voel kawm usaw, Asia qam aw hkaw thlang boeih ingkaw khawmdek thlangkhqi ing a mi bawk, ak boeimang soeih ve ikawna am sui kawm uh tive kqih awm hy,” tinak khqi hy.

²⁸ Ce ak awi ce ang zaak aw h, amik kaw so nawh, “Ephesa khaw aw hkaw Artemi ve bau khyt hy!” tinawh khy uhy. ²⁹ Kawlhkalth aw h khawk khui pum ce awipungnaak ing be hy. Makedonia nakawng Paul anik bawng law Gaia ingkaw Aristarka ce tu unawh lam aw h ipkhui na ceh pyi qawi uhy. ³⁰ Paul ing tlang kqeng venna ceh aham ngaih hlai hy hubatkhi ing am ceh sak uhy. ³¹ Ce a qam khuiawh kaw boei pynoet, Paul amah a pyikhqi ingawm lamnaak ipkhui na ama ceh aham awi yn uhy.

³² Cawhkaw thlang kqeng ce ngaihang tum ing awm uhy: Thlang vang ing ak chang na amik khy aw h, thlang vang bai ce ak chang na khy toek toek bai uhy. Thlang khawzah ngai ing kawtih ce a hun ami pha, ti awm am sim uhy. ³³ Judakhqi ing Alexandria ce hai benna buuk uhy, cawh thlang vang ing anih ce khy sih noe noe uhy. Anih

ing thlang kqeng ce awm sap aham a kut ing zap khqi hy. ³⁴ Cehlai thlang kqeng ing anih ce Juda phyn ni, tinawh a mi sim awh khawnoek pakkhih khuiawh awi kutoet na, “Ephesakhqi a Artemi ve bau khyt hy!” tinawh khy uhy.

³⁵ Khawk khuiawh kaw caqekung ing thlang kqeng ce ang dym sak coengawh: “Nangmih Ephesa thlangkhqi aw, Ephesa khaw ve ak bau Artemi bawkim ingkaw khawk khan nakawng anuk hlah law a myi a mee ak khoemkung na awm hy, tice khawmdek thlangkhqi boeih ing am sim uhy nami ti nawh nu? ³⁶ Ve ak awi ve u ingawm ama oelh thai a dawngawh ikaw awm ang tawn tawna a sai paqap kaana nami awm dym aham awm hy. ³⁷ Vekqawi ing bawkim awhkaw them am qu hy nih, khawsanu awm am kqawn seet hlai hy nih vena sawi law uhyk ti. ³⁸ Demetria ing a pyikhqi ing u ak khan awh awm amik kaw ama law awhtaw, awih kqawnnaak a hun ce awng hyt na awm nawh, awih kqawnkungkhqi awm awm uhy. Cawh ce amik kqawn aham awm hy. ³⁹ Cawhkawng kqawn tlaih aham nami ngaih bai awhtaw, cunnaak khawi awh ce kqawn aham awm hy. ⁴⁰ Tuhngawi awhkaw awipungnaak ve, awipungnaak ak saikung amyihna awm nik puk hau kawm uk ti tive kqih awm hy. Ve awipungnaak awh ve a kung a dawng awm am nik kqawn thai laklaw hy,” tinak khqi hy. ⁴¹ Ve ak awi ak kqawn boeih coengawh thlang kqeng ce hlat sak khqi hy.

20

Makedonia Awh Paul

¹ Awipungnaak a sit awh, Paul ing a hubatkhi ce khy nawh thapeeknaak awi kqawn pehy, Cekcoengawh cekkhqi ce kut tlaih nawh Makedonia qam na cet hy. ² Ce a qam ce hqil nawh, thlangkhqi venawh thapeeknaak awi kqawn pek khqi hy, cekcoengawh Greek qam ce pha hy,

³ cawh ce hlak thum awm hy. Siria qam na cet vang ti hlai hy, Judakhqi ing ang hypna a mimah a dawngawh, Makedonia qam benna ceh aham cai hy. ⁴ Berea khaw awhkaw Pyrrha a capa Sopater, Aristarka ingkaw Thessalonika khaw awhkaw Sekumda, Derbe khaw awhkaw Gaia, Timote, Asia qam awhkaw Tykhika ingkaw Trophima mih khqi ing bawng uhy. ⁵ Vekkhqi ve lamma na haina a na cet unawh kaimih ce Troas khaw awh ni na qeh uhy. ⁶ Cehlai hen amak Boei Phaihipi Poei a boeih awh Philipi khaw benna kawng lawng ing cet unyng, hqanyn a di awh cekkhqi mi Troas khaw awh hqum qu unyng, ce a khaw awh khqih nyn awm unyng.

Troas Khaw Awh Eutuka Hqing Tlaih Hy

⁷ Khawngghi khqih nyn khui awhkaw lamma cyk a nyn awh phaihipi thek haih aham cet unyng. Paul ing thlangkhqi venawh awi kqawn pek khqi hy, a khawngawi nyn awh cet hlah vang a ti hawh dawngawh thanlung dy awh awi kqawn hy. ⁸ Ka ming cunnaak ip khan awh ce mai khawzah vang uhy. ⁹ Cawh Eutuka ak mingnaak cadawng pynoet taw hlalang awng awh ngawi hy. Paul ing awi khawqyt ak kqawn awhtaw anih ce ip hy. A mik ih a tui huili awh im dawt a pakthumnaak awhkawng dek na tla nawh a qaawk na cung uhy. ¹⁰ Paul ing nuk kqum nawh cadawng pa ce ak khan awh cuksih nawh a kut ing zuut hy. “Koeh ly uh. Hqing hyn hy!” tinak khqi hy. ¹¹ Cekcoengawh ip khanna kai tlaih nawh phaihipi ce thek unawh ai hy. Myncang khawdai dy awi ak kqawn awh cekkhqi ce cehta hy. ¹² Thlangkhqi ing cadawng ce ak dip na im na ceh pyi unawh, a ming ngaih qep hy.

Paul Ing Ephesa Awhkaw Ahqamcakhqi Kut Am Tuunaak

¹³ Kaimih taw lawng ing lamma na Asso Khaw na cet unyng, ce a khaw awhkawng Paul mi kutoet na lawng ing

ceh aham cai unyng. Ce a khaw dy awh Paul amah taw khaw ing law aham cai hy. ¹⁴ Asso khaw awh ka ming hqum coengawh, Mitulene khaw na anih ce lawng ing ceh pyi unyng. ¹⁵ A khawngawi awh ce a khaw awhkawng cet unyng saw Kios tuilak cung pha unyng. Cawh a khawngawi nyn awh Samos tuilak cung ce poeng unyng saw Mileta tuilak cung ce pha unyng. ¹⁶ Asia qam awh a tym hawnaak ham ama ngaih a dawngawh, Paul ing Ephesa khaw ce cehtaak aham ngaih hy, ang coeng thai awhtaw, Pentekost nyn awh Jerusalem ce ang tawnaa pha aham ngaih hy.

¹⁷ Mileta awhkawng Ephesa khaw awhkaw thlangboel a hqamcakhqi ce Paul ing khy sak hy. ¹⁸ Cekkhqi ami pha law awh, cekkhqi venawh: “Asia qam na ka law cyk awhkawng nangmih a venawh ikawmyihna khaw ka saknaak tice sim hawh uhyk ti. ¹⁹ Judakhqi ing him aham ni teng loet hlai uhy, kawdungnaak ingkaw mikphli ing Bawipa bi ka bi ce sim uhyk ti. ²⁰ Nangmih nami hawihkhangnaak aham kawmyih awm khypyti aham am tawngaa nyng, im pynoet coeng pynoet nangmih ce ni cawngpyi khqi nyng. ²¹ Khawsa venawh zutnaak kawlung ing voei unawh ningnih a Bawipa Jesu Khrih awh cangnaak ami taaknaak aham Judakhqi ingkaw Greekkhqi venawh awm awithang leek ve khypyti nyng.

²² Ciim Myihla a ceeinaak amyihna, tuh Jerusalem na cet kawng nyng, ce ka pha awh kak khan awh ikaw a pha law kaw, tice sim hlan nyng. ²³ Ka cehnaak khaw a hoei awh Ciim Myihla ing thawng tlaknaak ingkaw kyinaak ka huh hly kawi ce kqawn law loet nyng. ²⁴ Cehlai, ka hqingnaak ve ikawna awm am sui voel nyng, vawhkaw bibi Khawsam qeennaak awithang leek khypyti, teei qunaak bibi Bawipa Jesu ing ani peek ve kak coeng mak awhtaw ti doeng ni kak poek hy.

²⁵ Qam awithang ak khypyí nangmih ak khui awhkaw u ingawm kai ve amni hu voel kawm uk ti, tice sim nyng. ²⁶ Cedawngawh, thlang boeih a thi aw h ce kai taw ciimcaih nyng, tice tuhngawi aw h nangmih a venawh kqawn law nyng.

²⁷ Kawtih Khawsa a ngaihnaak boeih ce nangmih a venawh khypyí aham am yih nyng. ²⁸ ngaihta unawh, Ciim Myihla ing ak khoemkung na ani taak khqi hawh amyihna nami tuukhqi ce ak nep na khoem law uh. A thi ing ak thlaih, Khawsa a thlangboel ak khawl ak cuikung na awm law uh. ²⁹ Kai ka ceh aw h, nangmih anglakawh ngentangkhi kun law kawm usaw tuukhqi ce am tak khqi poek poek kawm uh tice sim nyng. ³⁰ Na mimah ak khuiawh zani amah benna hubatkhi dawk aham awitak ak pleng pyikung thlangkhi awm law kaw. ³¹ Cedawngawh naming ngaihta uh; kum thum khuiawh khawmthan khawkdai mikphli tui ing nangmih ka ni cawngpyikhqi ce koeh hilh law uh.

³² Tuh nangmih ve Khawsa kut ingkaw am qeennaak awi ni khoem sak khqi nyng, ce ak awi ing nangmih ce ni taai sak khqi kawmsaw, a ciim sak thlangkhi boeih a venawh qo ce ni pek khqi bit kaw. ³³ Kai ing u a tangka awm, sui awm, suibai awm am nai nyng tice sim uhyk ti. ³⁴ Vawhkaw ka kut qawi ing kamah a ngoenaak ingkaw ka pyikhqi a ngoe ngaihnaak huh aham bibi hy tice na mimah ing sim uhyk ti. ³⁵ Ik-oeih ka sai a hoei aw h, Bawipa Jesu amah qoe ing, 'Huhnaak anglakawh peeknaak ing phu ta bet hy,' tinawh ak kqawn ce poek doena, vemyih bi kyí binaak ing ak voethlaukhqi bawm aham awm hy, tice nim huh khqi hawh nyng," tina hy.

³⁶ Ve ak awi ak kqawn boeih aw h, cekkhqi boeih mi khuk sym unawh cykcah uhy. ³⁷ Cekkhqi ing kawp uhy, mawk unawh kqang uhy. ³⁸ Ka haai am hu voel kawm uk

ti, a tinaak khqi dawngawh amik kaw se hy. Cawh lawng a awmnaak na ce thak uhy.

21

Jerusalem Na

¹ A mingmih mi ka ming kqeng awa, Kos tuilak cung na tuicunli awa am dyng na cet poe unyng. A khawngawi awa Rhodes tulak cung na cet unyng, cawhkawng Patara na cet unyng. ² Cawh Phonicia benna ak cet lawng ce hu unyng saw, cawh ka ming ngawih coengawh cet pahoei unyng. ³ Cuprus tulak cung ce haih dan hqoeng unyng saw ak kai benna kawng Siria qam na cet unyng. Tura khaw awa dym unyng saw, cawh lawng awkhaw ik-oeihkhqi chet unyng. ⁴ Cawh hubatkhi hu unyng saw, cekkhqi venawh khaw khqi nyn awm unyng. Myihla ak coming Paul ce Jerusalem na ama ceh aham hlawh uhy. ⁵ Cehlai khawngghi ce a boeih awhtaw, cekkhqi ce cehtaak khqi unyng saw lamceh cawng tlaih unyng. Cawh amik awm hubatkhi ingkaw a mizu ami cakhqi ing ceng dyna ni thak khqi uhy, cekcoengawh tui keng awa khuk sym unawh cykcah unyng. ⁶ Sadip na boe, ti qu unawh kqeng unyng, kaimih taw lawngawh ngawi unyng saw a mingmih taw im na hlat uhy.

⁷ Tura khaw awkhawng lawng ing cet poe unyng, Ptolemai awa dym unyng, cawhkaw amik awm koeinaakhqi ce kut tlaih unyng saw hypoet awm unyng. ⁸ A khawngawi nyn awa cet tlaih bai unyng saw, Kai khaw pha unyng, awithang leek ak khypyikung thlang khqi ak khui awkhaw pynoet Filip a im awa pah unyng. ⁹ Anih ing vaa ak ta hlan canu pupthli awi amik khypyikhqi tahy. ¹⁰ Cawh ce khawngghi iqyt nu ka mi awm coengawh, Agaba ak mingnaak tawngaha pynoet ce Judah nakawng law hy. ¹¹ Kaimih a venawh a law awa, Paul ing ak cawi a zeennaak

ce lo nawh, amah a kut ingkaw a khaw ce pin hy, “Ciim Myihla ing, ‘Jerusalem awkhaw Judakhqi ing vemyihna vawhkaw cawi zeennaak ak takung ve pin kawm usaw Gentelkhqi venawh pe kawm uh’ tihy,” tina hy.

¹² Ce ak awi ce ka ming zaak awh, kaimih ingkaw cawhkaw ak awmkhqi ing Paul ce Jerusalem na ama ceh aham hlawh unyng. ¹³ Cawh Paul ing, “Ikaw ham kqang unawh namik kaw nami seet sak? Pin ham doeng am nawh, Bawipa Jesu ang ming awh athih ham dy awm a oepchoeh na awm nyng kaw,” ni tinak khqi hy. ¹⁴ Anih ce hlawh na ama law awhtaw, plal unyng saw, “Bawipa ak kawngaih seh nyng,” ti unyng.

¹⁵ Cekcoengawh, tho unyng saw Jerusalem na cet unyng. ¹⁶ Kaiserea khaw awkhaw hubat thlang vang ing kaimih ce nik bawng khqi nawh ka mi pahnaak hly kawi Mason a im awh ce ni kai pyi khqi hy. Anih ce Kupra thlang na awm nawh maa awh ni hubat thlang na a awm hawh hy.

Paul Jerusalem Na

¹⁷ Jerusalem khaw ce ka mi pha awh, koeinaakhqi ing ni ym khqi uhy. ¹⁸ A khawngawi nyn awh Jakob a venna Paul ingkaw kaimih ce cet unyng, a hqamcakhqi boeih ce cawh awm uhy. ¹⁹ Paul ing cekkhqi ce kut ami tlaih coengawh bi ami binaak awh Khawsa ing Gentelkhqi venawh ikawmyihna them a sainaak tice kqawn pek khqi hy.

²⁰ Ce ak awi ce a ming zaak awh, Khawsa ce kyihcah uhy. Cekcoengawh Paul a venawh: “Toek lah, Juda thlang a thawng a sang ing cangna hawh uhy ce, a mingmih boeih taw anaa awi ak lungnaak thlangkhqi nani ami awm hy. ²¹ Gentel khqi anglakawh amik awm Judakhqi ing Mosi ce hlat taak unawh, ami cakhqi चाहhui ama qeet voel aham

ingkaw nimah phung na khaw amni sak qoe voel aham nang ing cawngpyi hyk ti, tinawh a mingmih a venawh kqawn pe hawh uhy. ²² Ikawmyihna ni ti lah voei uh? Nang law hy tice za ngai hawh kawm uh, ²³ cedawngawh kaimih ing ka mik kqawn law amyihna sai. Kaimih a venawh awi ak kam thlang pupthli awm hy. ²⁴ Vekkhqi ve ceh pyi nawh ciimcaihnaak ce sai lawt, a mingmih a lu voh phu ce peek pe. Cawhtaw thlangkhqi ing nang akawng amik kqawn ve a hqawng ni, ti bit kawm uh, cehlai namah ingawm anaa awi ing ak kqawn amyihna sai. ²⁵ Khawsa ak cangnaak Gentelkhqi venawh bul qunaak buh a ankhqi ama ai aham, thi ama ai ham, hawng khak meh ama ai ham ingkaw amak ciim nupa thawlhnaak ama sai aham awi tlyknaak ca ce pat pe hawh uhy,” tina uhy.

²⁶ A khawngawi nyn awh Paul ing cekkhqi ce ceh pyi nawh cekkhqi mi ciimcaihnaak ce sai haih uhy. Cekcoengawh ciimcaihnaak khawngghi boeih nawh cekkhqi boeih aham ciimsaknaak tym ce sim sak aham bawkimna cet hy.

Paul Amim Tunaak

²⁷ Khaw khqih nyn a boeih tawm awh, Asia qam awhkaw Juda thlangkhqi ing bawkim khuiawh Paul ce hu uhy. Cawhkaw thlang kqeng ce cuih unawh Paul ce tu uhy, ²⁸ “Israel thlangkhqi aw, ni bawm lah uh! Ve ak thlang ing hun qoek awh nik thlangkhqi ingkaw anaa awi ing ve a hun ve kalh nawh thlang cuk am kik hy. Cek coeng bai awh, Greekkhqi ce bawkim awh lut pyikhqi nawh vawhkaw hun ciim ve am caih sak hawh hy,” tinawh khy uhy. ²⁹ (Ephesa khaw awhkaw Trophima ce Paul ingqawi lamma na khawk bau khuiawh hu hawh unawh, anih ce Paul ing bawkim ipkhui kawngma na ceh pyi namih hy, tinawh poek hau uhy.)

³⁰ Cawh khawk bau pum awh awipuungnaak ce awm hy, cedawngawh hun boeih nakawng thlangkhqi ce dawng law uhy. Paul ce tu unawh, bawkim awhkawng amik dawh awh vawng chawh ce khai pahoei uhy. ³¹ Paul ce him ham na cai uhy, cawh khawk bau khui pum awh awipuungnaak awm hy tice Rom qaalboei ing za hy. ³² Anih ing qaalboei pynoet ingkaw qalkapkhqi ce ang tawnaa khy nawh thlang kqeng a venna ce dawng uhy. Thlang kqeng ing qaalboei ingkaw qalkapkhqi ce ami huh awh, Paul ami vyk ce noen uhy.

³³ Qaalboei ing cet nawh Paul ce am tu awh thiqui pakkhih ing khiih aham awi pehy. U aw ang mingnaak, ikaw a sai dawngawh nu, tice doet hy. ³⁴ Thlang kqeng ak khuiawh kaw thlang vangkhqi ing ak chang na khy toek toek uhy, cawhkaw awipungnaak awh ce a qaalboei ing awitak ce am sim thai hy, cedawngawh Paul ce qalkapkhqi awmnaak im na ceh pyi aham awi pehy. ³⁵ Paul ing thlaak kainaak a pha awh, thlang kqeng ing ami phawp ami seh aih awh qalkapkhqi ing Paul ce zoek unawh pawm uhy. ³⁶ Cawh thlang kqeng ing a hu hu awh, “Him uh, him uh,” tinawh khy uhy.

Thlangkqeng Haiawh Paul Awikqawn Hy

³⁷ Qalkapkhqi ing Paul ce qalkapkhqi awmnaak na ami ceh pyi tawm awh, qaalboei a venawh, “Awi kak kqawn hly thai aw? tinak khqi hy. Anih ing, “Greek awi na aw na pau?” ³⁸ Nang ve Izip pa maana thlang thongli kqawng damiah na ak ceh pyi ce aw? tina hy.

³⁹ Paul ing, “Kai taw Kilikia qam Tarsu khaw awhkaw Juda thlang ni, khaw mailai awhkaw thlang am ni. Thlang kqeng a venawh awi nik kqawn sak cang,” tina hy.

⁴⁰ Qaalboei ing awi kqawn thainaak ce a peek awh, Paul ing thlaak awh dyi nawh thlang kqeng ce a kut ing zaap hy.

Thlang boeih ami awm sap awhtaw, a mingmih a vanawh Aqamaic awi na awi kqawn pek khqi hy.

22

¹ Koeinaakhqi ingkaw ka pakhqi aw, kak cangnaak awi tuh kak kqawn ve ngai lah uh, tinak khqi hy.

² Aqamaic awi na awi ak kqawn ce a ming zaak awh ngai sap uhy. Cawh Paul ing, ³ “Kai ve Kilikia qam Tarsu khaw awh ak thang Juda thlang pynoet na awm nyng, cehlai ve khawk khuiawh taai nyng. Gamaliel a kut khuiawh ni nu ni pa anaa awi ak leek na ana cawng nyng saw tuhngawi awhkaw nangmih amyihna Khawsa ak lungnaak thlang na awm lawt nyng. ⁴ Ve a lam awhkaw thlangkhqi ve ami thihnaak aham the a kha na nyng, nu awm pa awm tunyng saw thawngim na thlak khqi nyng. ⁵ Khawsoih boei khyt ingkaw awi ak tlykkungkhqi ingawm ni sim uhy. Damaska khaw awh amak awm koeinaakhqi aham a mingmih a venawh ca ce lo nyng ve ak thlangkhqi ve thawng ak tlakhqi amyihna tu nawh Jerusalem awh toel aham cet nyng.

Paul Ak Awikqawn

⁶ Khawnghyp awh Damaska khaw ka pha tawm awh, khan benna kawng vangnaak ing nik coei pheng hy. ⁷ Dek na kang tluk awh awi ing, “Saul! Ikawtih nani thekhanaak,” ni tina hy.

⁸ Kai ing, Bawipa, nang a u nu? tina nyng. Anih ing, “Kai taw nang ing na the na khanaak, Nazareth khaw awhkaw Jesu,” ni tina hy. ⁹ Ka pyikhqi ing vangnaak ce hu hlai uhy, ka venawh kaw ak kqawn law awi cetaw am zasim uhy.

¹⁰ Kai ing, ‘Ikaw ka sai hly, Bawipa?’ tina nyng. Cawh Bawipa ing, ‘Tho nawhtaw, Damaska khawk khui na cet. Na sai hly kawikhqi boeih cawh nim then bit kawm uh,’ ni tina hy. ¹¹ Ak vang soeih ing ka mik ce a hyp law sak

khoep hawh a dawngawh, ka pyikxqi ing ka kut awh ni sawi unawh Damaska khaw na ni ceh pyi uhy. ¹² Cawh Ananias ak mingnaak thlang pynoet ce ka venna law hy. Anih taw anaa awi ak hquut thlang ingkaw ce a khawk khuiawh ak awmkxqi Juda boeih ing amik kqihchahnaak soeih thlang na awm hy. ¹³ Anih ce ka venawh dyi nawh, ‘Ka naa Saul, na mik dai hlah seh!’ ni tina hy. Cawh ka mik dai nawh anih ce hu pahoei nyng.

¹⁴ Anih ing, “Ni pakxqi a Khawsa ing amah ak kawngaih sim sak ham ingkaw Thlak Dyng ce huh sak nawh am kha awkhaw awi ce zaak sak aham nang ve nik tyk hawh hy. ¹⁵ Nang zaak ingkaw na huh ce thlangkxqi boeih a venawh simpyikung na awm kawp ti. ¹⁶ Kaw na qeh bak bak? Tho, batisma hu nawhtaw na thawlhnaakkxqi ce sil lah, ang ming ce khy lah,’ ni tina hy.

¹⁷ Jerusalem na hlat tlaih nyng saw bawkim awh kak cykcah awh huhsaknaak ce hu nyng, ¹⁸ Bawipa ing awi ak kqawn law ce hu nyng. Anih ing, “**Ang tawwna, Jerusalem ve cehta hlah; kak awithang nak kqawn hly ve do ham am ngaih uhy,**’ ni tina uhy.

¹⁹ Kai ing, “Bawipa, nang anik cangnaak thlangkxqi ce thawng thlak aham ingkaw vyk aham sinakawk pynoet coeng pynoet awh cet nyng, tice vekkxqi ing sim uhy. ²⁰ Na ceityih Stephen a thi ang lawngawh, cawh dyi nyng saw a mingmih ce dyih pyi nyng, anih a mik himkxqi a hi ce ana qeh pek kxqi nyng,” tina nyng.

²¹ Cawh Bawipa ing, “**Cet; ak hla na Gentelkxqi venna ni tyi vang nyng,**” ni tina hy.

Paul Rom Thlang

²² Ve ak awi ak kqawn dy taw thlang kqeng ing ngai pe hlai uhy. Cekcoengawh taw, “Ve ak thlang ve Khawmdek

awh koeh hqing sak uh! A hqing aham am tyng hy,” tinawh khy uhy.

²³ Khy unawh ami hikhqi ce khan na ami khawng coengawh dek pli ce khan na theh uhy. ²⁴ Cawh qaalboei ing Paul ce qalkap a awmnaak hun na ceh pyi aham awi pehy. Ikawtih thlang kqeng ing vemyihna a mik khy sih tice sim aham a ngaih adawngawh quiboeng ing vyk nawh doet aham awi pehy. ²⁵ Vyk aham hi ami suh peek awh, cawhkaw ak dyi qalkap zakhat ak ukkung a venawh Paul ing, “A thawlhnaak awm huh hlan awh Rom thlang ve vemyihna na vyk hly thai sawhqat nawh nu?” tina hy.

²⁶ Qalkap zakhat ak ukkung ing ce ak awi ce ang zaak awh, qaalboei a venna cet nawh kqawn pehy. Anih ing, “Ikawmyihna sai vang na ti? Ve ak thlang ve Rom thlang ni,” tina hy.

²⁷ Cawh qaalboei ce Paul a venna cet nawh doet hy, “Nang ve Rom thlang aw, kqawn lah?” tina hy. Paul ing, “Oeih, Rom thlang na awm nyng,” tina hy.

²⁸ Cawh qaalboei ing, Kai ingtaw Rom thlang na awm thainaak ham tangka khawzah pe nyng,” tina hy. Cehlai Paul ing, “Kai taw Rom thlang qoe qoe na thang nyng,” tina hy.

²⁹ Anih doet aham ak caikhqi ce thoeih bat uhy. Rom thlang na ak awm Paul ce thiqui ing ak khieh dawngawh qaalboei awm ly hy.

Khawsoihkhqi Haiawh Paul

³⁰ A khawngawi nyn awh Judakhqi ing Paul ve thawlh puk uhy tice sim aham a ngaih dawngawh Paul ce a hlah awh khawsoeih boeihqi ingkaw Sanhedrin ce khy sak hy. Cekcoengawh Paul ce khy nawh cekkhqi haiawh dyih sak hy.

23

¹ Paul ing Sanhedrinkhqi ce toek khqi ceet ceet nawh, “Ka koeinaakhqi, tuhngawi dy awh kawpoek dyngnaak ing Khawsa bi ce bi nyng,” tinak khqi hy. ² Ce ak awi ce ang zaak awh khawsoih boeikhyt Ananias ing Paul a venawh ak dyikhqi venawh Paul ce am kha awh vyk aham awi pehy. ³ Cawh Paul ing, “Nang ak baawkna amik thuut vawng, Khawsa ing namah ni vyk kaw! Anaa awi amyihna kai awideng aham cawh ngawi hyk ti, cehlai namah ing kai vyk aham awi pe tiksaw anaa awi ce hqe nawn hyk ti! tina hy.

⁴ Paul a venawh ak dyikhqi ing, “Khawsa a khawsoeih boei khyt awm na ziyh hy? tina uhy. ⁵ Paul ing, “Koeinaakhqi, anih ve khawsoeih boei khyt tinawh am ka sim dawngawh ni; ‘Nak thlangkhqi ak ukkung ce awih che ing koeh ziy,’ tinawh a qee awm zawk hy,” tinak khqi hy.

⁶ Cawhkaw amik awmkhqi ak khuiawh thlang vang taw Sadusikhqi na awm nawh, thlang vang taw Farasikhqi na awm uhy, tice Paul ing a huh awh, cawhkaw Sanhedrinkhqi venawh, “Koeinaa khqi, kai ve Farasi capa na ka awm dawngawh Farasi na awm nyng. Thlakthi thawh tlaih ngaih-uunaak ka taak dawngawh tuh awidengnaak hun awh dyi nyng,” tinak khqi hy. ⁷ Ce ak awi ce ak kqawn awh, Farasikhqi ingkaw Sadusikhqi ce oelh qu unawh, pakkhih na pek qu uhy. ⁸ (Sasusikhqi ingtaw, thlakthi thawh tlaihnaak am awm hy, khan ceityih awm am awm nawh myihla awm am awm hy, ti uhy, cehlai Farasikhqi ingtaw vemyihkhqi boeih ve awm hy, ti uhy.)

⁹ Cawh a mimah ce hqo unawh, a mingmih anglak awhkaw anaa awi ak qeekung Farasi thlang vang ce dyi unawh oelh uhy. Cekkhqi ing, “Ve ak thlang awh ve a thawlhnaak ikaw awm am awm hy. Myihla ing nu khan ceityih ing nu awi ak kqawn peek mai mantaw

ikawmyihna ni ti hly?” ti uhy. ¹⁰ A ming oelh qu khqoet khqoet awh qaalboei ing Paul khqaak kawm uh a ti awh, qalkapkhqi ce tyi khqi nawh Paul ce a mingmih a venawh kawng qalkapkhqi awmnaak na lawh sak khqi hy.

¹¹ Khawmthan awh Bawipa ing Paul a venawh dang pe nawh, “Nam thin cak sak! Jerusalem khawk khuiawh kai akawng nang dyih pyi amyih na, Rom awh awm kai ve ning dyih pyi hly bai hyk ti,” tina hy.

Paul Him Ham Teng Uhy

¹² A khawngawi mymcang awh Paul him hlan dy taw buh a an ama ai aham Juda thlangkhqi ing awi kam uhy. ¹³ Vemyihna Paul him aham ak tengkhqi ce thlang phlikip hlai law uhy. ¹⁴ Cekkhi ing khawsoeih boeikhqi ingkaw a hqamcakhqi venna cet unawh, “Paul am ka mi him hlan dy taw buh an am kami ai aham awi kam unyng. ¹⁵ Cedawngawh tuh nangmih ingkaw Sanhedrinkhi ing ve akawng ve ak caih na sim thainaak aham anih ce nangmih a venawh ami tyih law tlaihnaak aham qaalboei a venawh thoeh uh. Cawh ve a pha law hlan awh lam lakawh kaimih ing him vang unyng,” tinak khqi uhy.

¹⁶ Cehlai cawhkaw awi ce Paul a koeinanu a capa ing za nawh, qalkapkhqi awmnaak na a ceh awh Paul a venawh kqawn pehy. ¹⁷ Cedawngawh Paul ing qalkap zakhat ak ukkung thlang pynoet ce khy nawh, “Vawhkaw cadawng ve qaalboei a venna ceh pyi lah; awi pynoet kqawn peek aham ngaih hy,” tina hy. ¹⁸ Cedawngawh anih ing ce ceh pyi hy. Qalkap ukkung ing, “Thawngim ak tla Paul ing vawhkaw cadawng ve na venawh awi kqawn aham a ngaih dawngawh ceh pyi tinawh law pyi nyng,” tina hy. ¹⁹ Qaalboei ing cadawng ca ce a kut awh tu nawh ak chang na sawi nawh doet hy, “Kawmyih ak awi nu kqawn aham na ngaih?” tina hy. ²⁰ Anih ing, “Khawngawi awh

Judakhqi ing Paul ve Sanherdrin haiawh awi ak caih na doet aham tina unawh nang a ven awhkawng thoeh u sih, tinawh awi kqawn hawh uhy. ²¹ Cekkhqi venawh Paul ve koeh tyih pek khqi, ikawtih thlang phlikip hlai ing lam awh mah uhy. Paul a mami him hlan dy taw buh am ai aham awi kam hawh uhy. Tuh nang ak awi ni ami lamtoen hawh,” tina hy.

Kaiserea Na

²² Qaalboei ing cawhkaw cadawng ca ce a ceh sak coeng awh, “Ve ak awi nak kqawn law ve u a venawh awm koeh kqawn moe,” tina hy. ²³ Anih ing qalkap zakhat ak ukkung pakkhih ce khy nawh, “Qalkap zanhah ingkaw, meqang awh ak ngawi thlang khqihkip ingkaw cai ak pawm thlang zanhah ce tawh khawthan khawnoek pakow awh Kaiserea na ceh aham a oepchoeh cana ta lah. ²⁴ Qam ukkung Felix a venawh ak cym cana pha thainaak aham Paul ang ngawihnaak aham meqang ce hoep pe uh,” tina hy.

²⁵ Ak kai awhkaw amyihna ca qee pehy: ²⁶ Klaudias Lisias ing, Qam uk boei ak leek khyt Felix a venawh, “Kut ni tlaih nyng.

²⁷ Ve ak thlang ve Judakhqi ing tu unawh him u sih ami ti awh, Rom thlang ni tice ka sim dawngawh, kai ing qalkapkhqi mi cet nawh hul nyng. ²⁸ Ikawtih thawlh amak puk hy voei tice sim aham ka ngaih dawngawh a mimah a Semhedrin a haiawh dyih sak nyng. ²⁹ Cawhkaw thawlh amik puknaak ce a mimah a anaa awi ben ni tice sim nyng, cedawngawh thawng thlak aham ingkaw thih hly kawi dyna a thawlhnaak am awm hy, tinawh hu nyng. ³⁰ Anih ce him aham ang hyp na mah uhy tice amik kqawn law dawngawh, nang a venna ang tawwna tyi law nyng. Anih thawlh amik pukkhqi awm anih akawng kqawn aham tyi law pahoei nyng,” tinawh.

³¹ Cedawngawh qalkapkhqi ing, awipeeknaak amyihna, khawmthan awh Paul ce Antipatris dyna ceh pyi uhy. ³² A khawngawi awh meqang awh ak ngawikhqi mi Paul ce ami ceh sak haih awh, a mimah taw qalkap a awmnaak im na hlat tlaih uhy. ³³ Meqang awh amik ngawikhqi ce Kaiserea khaw ami pha awh, qam uk boei venawh ca ce pe unawh, Paul ce ap uhy. ³⁴ Qam uk boei ing ca ce a noet coengawh han benna kaw thlang hy voei nu tice doet hy. Kilikia qam awhkaw thlang ni, tice a sim awh, ³⁵ a venawh, “Nang thawlh anik pukkhqi ami pha law awh na kawng ve kqawn sih nyng,” tina hy. Cekcoengawh Paul ce amah a awmnaak Herod a im awh ak nep na taak aham awi pehy.

24

Paul Thawlh Puk Uhy

¹ Khaw hqa nyn a awm awh khawsoeih boei khyt Ananias ce a hqamca thlang pynoet mi awi kqawn ak thoem Tertulla ce law pyi unawh, qam uk boei a haiawh Paul ce thawlh puk uhy. ² Paul ce ak khuina ak khy awh ce, Tertulla ing Felix a haiawh Paul akawng ce kqawn pehy. “Nang a uknaak ak khuiawh ngaihqep cana awm poe unyng saw, nang a khawkhan thainaak awh ve a qam awm tlaih a vawng na awm hy. ³ Ak leek khyt Felix, a hun hoei awh ikawmyihna a awm, nang a leeknaak ve zeelnaak ing ym unyng. ⁴ Cehlai nang huunaak kawina awm am ngaih unyng, kawdungnaak ing awi khangoet ca kamik kqawn law ve naming ning ngaih peek khqi ham qeennaak ni thoe law unyng.

⁵ Khawmdek pum awh Judakhqi ak hqee ingkaw, awipungnaak ak sai ak thlang na ve ak thlang ve awm hy tice sim hawh unyng. Anih ve Nazarethkhqi ak sawikung na awm nawh, ⁶ ‘bawkim amak ciim sak na awm hy; cedawngawh tu unyng saw, ka mimah a anaa awi amyihna

awideng aham cai unyng. ⁷ Cawh qaalboei Lysia ing thaa hawna nawh kaimih a kut khui awhkawng anih ve qawt valh nawh, ⁸ anih thawlh ak pukkhqi ce nang a venawh ceh aham awi pehy. Namah ing awi na deng awh cawhkaw ak thym anih ak khan awh kaimih ing ka mik kqawn ve hu noe noe bit kawp ti,” tina uhy.

⁹ Judakhqi ing cawhkaw thawlh puknaak ce bawng unawh, vawhkaw ve thym hy tinawh dyih pyi uhy.

Paul Ing Oelh Hy

¹⁰ Qamuk boei ing Paul ce awi kqawn aham hatnaak a peek awh Paul ing, “Kum khawqyt ve a qam ak ukkung na awm hawh hyk ti tice sim nyng; cedawngawh zeel doena kak cangnaak ce kqawn law nyng. ¹¹ Khawngghi pahqa hlaihah zani a di hlanawh Jerusalem khaw na Khawsa bawk aham cet nyng tice ak zoei cana sim kawp ti. ¹² Kai tuh thawlh anik pukkhqi ing bawkim khuiawh u mi awi ka pung awm am hu uhy, sinakawkkhqi awh awi pungnaak ka sai awm am hu unawh khawk bau khui han a hun awh awipungnaak ka sai awm am hu uhy. ¹³ Tuh nang a venawh han a hun awh nu awipungnaak ka sai maqee tice ap kqawn thai uhy. ¹⁴ Cehlai kai taw ka mimah a pakhqi a Khawsa ak bawk lam ak hquutkung pynoet na awm nyng, cehlai a mingmih ingtaw bawknaak chang na ak pleengkhqi tinawh kqawn uhy. Anaa awi awh ak awmkhqi boeih ingkaw tawngaha caukkhqi awh a qeekkhqi boeih ce ak cangnaak thlang na awm nyng, ¹⁵ vekkhqi amyihna, thlakdyng ingkaw thlakthawlh thawh tlaihnaak awm kaw, tinawh Khawsa awh ngaih-unaak ak ta thlang na awm lawt nyng. ¹⁶ Cedawngawh Khawsa ingkaw thlanghqi a haiawh vawhkaw kawlung ciimnaak ing tha y poepa nyng.

¹⁷ Kum khawzah a di awh, khawdeng hahqahkhqi aham kak thlangkhqi a do a dannaak them khyn aham ingkaw

Ceityih Sainak 24:1882Ceityih Sainak 24:27

them peek aham Jerusalem na law nyng. ¹⁸ A mingmih ing bawkim khuiawh vemyihkhqi ka sai ami ni huh awh zeihnaak benawh kai taw ciim nyng. Thlang kqeng awm ka venawh am awm hy, ikawmyih awipungnaak awm am sai bai nyng. ¹⁹ Cehlai cawh Asia qam awhkaw Juda thlangkhqi ce awm uhy, a mingmih ce tuh nang a hai awhkaw kai thawlh puk aham ami ngaih awhtaw ami law lat aham awm hlai hy. ²⁰ Ce am bai awhtaw vekkhi ing ve ikaw thawlhnaak nu Sanhedrin a haiawh kang dyih awh ka sai, tice a mik kqawn aham awm hlai hy – ²¹ ve ak awi pynoet doeng ni a mingmih a haiawh khy doena kak kqawn hlai: ‘Thlakthi thawh tlaihnaak a dawngawh ni tuhngawi nangmih a haiawh awidengnaak ka huh,’ tinawh,” tina hy.

²² Lam akawng ak leek cana sim nyng. Felix ing, cawhkaw awih kqawnaak ce thoeih pehy. “Qaalboei Lysia a law awh nang akawng ve kqawn bit kawng nyng,” tina hy. ²³ Qalkap zakhat ak ukkung ce khy nawh Paul ce ak leek na ngaihdingnaak pe nawh doen aham ingkaw a pyikhqi ing a ngoengaihnaak awm sai peek thai aham awi pehy.

²⁴ Khawnghi iqyt nu a di awh Felix ce Juda nu a zu Jesu Khrih awh cangnaak akawng ce kqawn sak nawh ngai pehy. ²⁵ Paul ing dyngnaak, yh thainaak ingkaw ak law hly kawi awidengnaak akawng ak kqawn peek awhtaw, Felix ing kqih nawh, “Ce tloek mai cang seh! Cet hlah. A tym leek ka huh awh nik khy law sak tlaih kawng,” tina hy. ²⁶ Paul ing kutbym ni pe ngai bit kaw, tinawh ang ngaih-uu a dawngawh Paul ce khy poepa nawh awi kqawn pyi hoeih hoeih hy.

²⁷ Kum hih a di awhtaw, Felix ce Porcius Festa ing thaw hy, cehlai Felix ing Judakhqi kaw a zeel sak aham a ngaih

dawngawh Paul ce thawngim aw h cehta hy.

25

Festa Haiawh Awidengnaak

¹ Ce a qam khui a pha lawnaak nyn thum voei a law aw h, Kaiserea khaw aw hkawng Jerusalem na Festa ce cet hy, ² cawh khawsoeih boeikhqi ingkaw Juda a hqam cakhqi ce a haiawh cun unawh, Paul ami thawlh saknaak akawng ce kqawn pe uhy. ³ Festa a venawh, a mingmih ak kawngaih sai pe nawh cekkhqi a kut aw h Paul ce a hlah peek aham qeennaak thoeh khak uhy, kawtih cekkhqi ing Paul ce him aham lam aw h thlang ana mah sak hawh uhy. ⁴ Festa ing, “Paul ve Kaiserea khaw aw h khawh na aw m hy, a di hlanawh kai aw m cena cet kawng nyng. ⁵ Na mimah anglakawhkaw a hqamca thlang pynoet ingawm nik bawng unawh cawhkaw thlang ce thawlh naak a taak awhtaw nami oelh khak khak aham aw m saw,” tinak khqi hy. ⁶ Cekkhqi a venawh khaw kqet nyn nu hqa nyn nu a aw m coengawh, Kaiserea khawna ce cet nawh a khawngawi nyn aw h awidengnaak a taak aw h Paul ce a haina khy sak hy. ⁷ Paul a law aw h, Jerusalem nakawng anuk law Judakhqi ing chung unawh Paul ce thawlh puk uhy, cehlai a thawlhnaak am tu pe thai uhy. ⁸ Cekcoengawh Paul ing ak cangnaak awi ce kqawn hy. “Judakhqi a anaa awi ing ak kalh na bawkim ing ak kalh na Kaisara ing ak kalh na ikaw aw m am sai nyng,” tina hy. ⁹ Festa ing Judakhqi ak kawngaih ce sai aham a ngaih aw h, Paul a venawh, “Jerusalem na cet nawh vawhkaw thawlh ami nik puknaak aw h ve ka haiawh dyih aham nak ngaih nu?” tina hy. ¹⁰ Paul ing, “Awideng aham aw m nyng seiawm Kaisara a haiawh ni dyih aham ka ngaih. Namah ing ak leek cana na sim hawh amyihna Judakhqi ak khan aw h ikawmyih a thawlhnaak aw m am sai nyng. ¹¹ kai ing

ni thihnaak khoek dy awh thawlhnaak ka sai vik awhtaw, thih aham ap tha na nyng. Cehlai vawhkaw Judakhqi ing thawlh ami nik puknaak ve ama thym awhtaw, u ingawm kai ve a mingmih a kut awh amni pe thai kaw. Kaisar a haai awh dyi vang nyng,” tina hy. ¹² Festa ing cawh kaw awi ak kqawnkung khqi mi a ming doet qu coeng awh, “Kaisara a haiawh dyih aham thoeh hyk ti. Cedawngawh Kaisara a venna cet kawp ti,” tina hy.

Festa Ing Agrippa Sangpahrang Doet Hy

¹³ Khawngghi kawlhkalh a di awh Festa hqip aham Agrippa sangpahrang ingkaw Bernice ce Kaiserea na law hy nih. ¹⁴ Khawngghi cawh a ni hawnaak hawh dawngawh, Festa ing Paul akawng ce sangpahrang a venawh kqawn pehy. “Vawh thawng ak tla thlang pynoet Felix ing cehta hy. ¹⁵ Jerusalem khaw na ka ceh awh, Juda khawsoeih boeikhqi ingkaw a hqamcakhqi ing anih ce thawlh sak unawh thih sak aham thoeh law uhy. ¹⁶ Kai ing, thlang pynoet ing amah thawlh ak pukkhqi mi hqum qu unawh ak cangnaak awi kak kqawn hlanawh thlang a kut awh peek aham taw Rom phung amni. ¹⁷ Kai a venawh ami law awh, a mingmih ak awi ce yih a eng kaana a khawngawi nyn awh awidengnaak sai nyng saw cawhkaw thlang ce khy sak nyng. ¹⁸ Anih thawlh amik pukkhqi ce dyi unawh thawlh amik puk awh kak poeknaak amyihna ikaw thawlhnaak ami thawlh saknaak tang tang awm am awm hy. ¹⁹ A mimah a bawknaak awh awipungnaak ingkaw ak thi hawh Jesu ce Paul ing hqing tlaih hy a ti dawngawh a ming oelh qunaak na awm hy. ²⁰ Cemyih awipungnaak ce ikawmyihna kqawn aham awm am sim nyng; cedawngawh Jerusalem na cet nawh cawh awideng aham ak ngaih hly nu tinawh doet nyng. ²¹ Cehlai paul ing Kaisara ak awi tlyknaak ce a thoeh dawngawh, Kaisara a

venna a ceh hlan dy ak nep na khoem aham awi pe nyng,” tina hy.

²² Cawh Agrippa ing Festa a venawh, “Kamah qoe ing anih ce awi doet aham ngaih nyng,” tina hy. Anih ing, “Khawngawi awh doet bit kawp ti,” tina hy.

Agrippa Haiawh Paul

²³ A khawngawi nyn awh Agrippa ingkaw Bernice ce ani sui ani sak ing thoeih ang cam qu hqet nih nawh thlang kqeng anglakawh qam uk boeikhqi, khawk khui sawikung a hqamcakhqi mi lut hy nih. Cawh Festa ing awi pe nawh Paul ce law pyi uhy. ²⁴ Festa ing, “Agrippa sangpahrang ingkaw vawhkaw ak awm thlangkhqi boeih, vawhkaw thlang ve hu uhyk ti, ve ak thlang ak camawh Jerusalem ingkaw Sisarea khaw awhkaw Juda thlangkhqi boeih ing ka venawh qeennaak thoeih law uhy, ve ak thlang ve a hqing aham am tyng hy ti unawh khy uhy. ²⁵ Kai ingtaw a thihnaak khoeikaw thawlhnaak am sai hy tice hu nyng, cehlai Kaisara boei a venawh ceh aham a thoeih dawngawh Rom na ceh sak aham kqawn hawh nyng. ²⁶ Cehlai anih akawng Kaisarar a venawh ikawmyihna ca ka qee peek hly tice ak leek na am sim hlan nyng. Cedawngawh tuh nangmih boeih a haiawh law pyi nyng, awipui khyt na, nang Agrippa sangpahrang a haiawh, vawh kawng qee hly kawi awm ak awm hly khoem hy voei nu ti nyng. ²⁷ Ikawtih thawk tla thlang pynoet thawlh amik puknaak akawng ak nep cana a sim kaana tyih sawhqat ham taw am nep hy tinawh poek nyng,” tina hy.

26

Paul Agrippa Haiawh

¹ Cekcoengawh Agrippa ing Paul a venawh, “Tuh awhtaw namah akawng kqawn thai hawh hyk ti,” tina hy.

Cedawngawh paul ing a kut ing vaih khqi nawh ak cangnaak awi ce kqawn hy. ² “Agrippa sangpahrang, Judakhqi ing thawlh ami nik puknaak awh kak cangnaak awi kqawn aham na haiawh kang dyih thai dawngawh ka zoseen hy tinawh poek nyng, ³ Judakhqi phunglam ingkaw dum a lai ben awikaa na sim soeih adawngawh, kak awih kqawn ve kawdungnaak ing na ning ngai law peek aham qeennaak thoeh law nyng.

⁴ Judakhqi boeih ing ka naasen ca awhkawng ka khawsaknaak ce sim uhy, ka mik a keh cyk ca awhkawng ka qam khui ingkaw Jerusalem awh ka khawsaknaakkhqi sim uhy. ⁵ Kai ve khawqyt ami ni sim hawh dawngawh ami ngaih mai mantaw, kai akawng ve kqawn thai uhy, ka mimah bawknaak benawh ak kyi khyt, Farasi benna awm nyng. ⁶ Ka pakhqi venawh Khawsa ing awi a taaknaak amyihna ngaih-unaak ka taaknaak a dawnawh tuhngawi awh kai ing awidengnaak hu nyng. ⁷ Vawhkaw awikamnaak a soepnaak a tym ce lamtoen doena pilnam hlaihih tloek ing khawthan khawkdai Khawsa bi ce bi uhy. Aw sangpahrang vawhkaw ngaih-unaak a dawngawh Judakhqi ing kai thawlh nik puk uhy. ⁸ Ikawtih Khawsa ing thlakthi thawh sak tlaih hy tice ikawtih am namik cangnaak hy voei?

⁹ Kai ingawm Nazareth Jesu ang ming ve ang coengnaak thai khuina oelh aham anak poek nyng. ¹⁰ Cedawngawh Jerusalem khaw awh awm cemyihna ce ana sai nyng. Khawsoih boeikhqi a saithainaak ce haw na nyng saw thlakciim khawzah ce thawngim awh thla nyng, cekkhqi ce a thih sak awh, a mingmih ami thih ce ana ngaih pyi nyng. ¹¹ A mingmih toel aham sinakawk pynoet coeng pynoet awh cet nyng saw, Jesu ang ming ce kqawn seet sak ngah ngah nyng. Cekkhqi ak khan awh kak kaw a so

soeih dawngawh, cekkhqi thekhanaak aham qam chang dy dyna cet nyng.

Paul A Thangthai Awhkaw

¹² Ceamyihna qam chang na ka ceh awh, hypoet taw khawsoeih boeikhqi a sathainaak haw na nyng saw Damaska khaw na cet nyng. ¹³ Khawnghyp awh, Aw sang-pahrang, lam ka ceh huili awh, khan na kaw vangnaak ce hu nyng, cawhkaw vangnaak cetaw khawmik anglakawh awm vang khqoet hy, ce ing ce kamah ingkaw ka ceh pyikhqi ce nik coei pheng khqi hy.

¹⁴ Dek na tlu boeih unyng, cawh Aqamaic awi na awi ak kqawn law ce za nyng, ‘Saul, Saul, kawtuh nani the nani kha naak? Hling na suih ce namah aham ni a tlawh hy,’ ni tina hy.

¹⁵ Cawh kai ing, ‘Nang ve a u nu, Bawipa?’ tina nyng.

“Bawipa ing, ‘Kai taw nang ing na the na khanaak Jesu ni. ¹⁶ Tuh tho nawhtaw dyi lah. Nang ve ka tyihzawih pynoet na caksak aham na venawh dang hawh nyng, kai ing na huh cekkhqi ingkaw tuh awhkawng kai ing ka nim huh hly kawikhqi ak dyih pyikung dyihthing na awm kawp ti. ¹⁷ Nak thlangkhqi ingkaw Gentelkhqi kut khui awhkawng kai ing ni hul kawng nyng. ¹⁸ Cekkhqi amik dang sak nawh thannaak awhkawng vangnaak ak khuina hlat sak aham ingkaw, setan thaawmnaak kut khui awhkawng Khawsa benna hlat aham nang ve ni tyi kawng nyng, cawh ni cekkhqi ing thawlh qeenkhaw ngainaak ingkaw kai ak khuiawh cangnaak awh ciimnaak ak hukhqi anglakawh hun ce ami taak hly lawt,’ ni tina hy.

¹⁹ Cedawngawh, sangpahrang Agrippa, khawk khan nakaw ik-oeih ka huh ce am oelh thai nyng. ²⁰ Lamma cyk awh Damaska khaw awhkaw thlangkhqi venawh, cekco-engawh Jerusalem khaw awhkaw thlangkhqi ingkaw Juda

qam awhkaw thlang boeih a venawh, Gentel thlangkhqi boeih a venawh awm, zutnaak ing Khawsa venna hlat unawh zutnaak ce them sainaak ing a ming dang sak thai aham awi kqawn pe nyng. ²¹ Vawh Judakhqi ing bawkim awh nim tu unawh him aham ni ngaih uhy. ²² Cehlai tuhngawi dy awh Khawsa ing nik pyi hy, cedawngawh tuhngawi awh thlak zawi thlak bau a haiawh awi kqawn aham dyi nyng. Tawnghakhqi ingkaw Mosi ing ak law hly kawi ik-oeih anak kqawn ce ak pleeng na awi ap kqawn nyng- ²³ Khrih ing a khuikha awh thlakthi anglak awhkawng lammacyk na tho kaw, ak thlangkhqi ingkaw Gentel thlangkhqi venawh vangnaak awi kqawn pe kaw, ti ceni kak khyppyi hy,” tina hy.

²⁴ Paul ing ak cangnaak awi ak kqawn huili awh Festa ing awi ce qawt pehy. “Paul, na cyih am awm voel hy ve! Ak sang na cyihnaak na cawngnaak ing ni qaw sak hawh hy,” tina hy.

²⁵ Cawh paul ing, “Ak leek soeih Festa, am qaw nyng. Kak awih kqawn ve thym nawh a kung a dawng awm hy. ²⁶ Sangpahrang ing vemyihkhqi ve sim hy, anih a venawh ngaihding na kqawn pe thai nyng. A kil awh ang hyp ik-oeih sai na ama awm adawngawh, vawhkaw kak kqawnkhqi boeih ve ama sim pynoet ca awm am awm hy tinawh sim nyng. ²⁷ Agrippa sangpahrang, tawngha khqi ve nak cangnaak nu? Cang na hyk ti tice sim nyng,” tina hy. ²⁸ Cawh Agrippa ing Paul na ce, “A tym ak tawica ak khuiawh kai ve Khrih thlang na ning coeng sak vang tinawh nak poek nawh nu?” tina hy. ²⁹ Paul ing, “A tym ak tawica awm khawk choet awm nang doeng kaana tuhngawi awh kai ak awi ak ngaikhqi boeih ing, vawhkaw thiqui kqawn kaana, kai amyihna nami awm thainaak aham Khawsa venawh cykcah nyng,” tina hy.

³⁰ Cawh sangpahrang ce tho hy, anih ak pyikung qam uk boei ingkaw Bernice ingkaw cawh ak ngawikhqi boeih ce tho uhy. ³¹ Ipkhui awhkawng ami ceh awh, “Ve ak thlang ing ve thih ham ingkaw thawngim tlaak aham kawi na ikaw awm am sai hlai hy,” ti qu uhy. ³² Agrippa ing Festa a venawh, “Kaisara a venna ceh aham ama thoe mantaw, ve ak thlang ve hlah aham awm mai hawh hlai hy,” tina hy.

27

Rom Na Cet Hy

¹ Italy qam na kaimih ka mi ceh aham awm hy, tinawh awi amik tlyk awhtaw Paul ingkaw thawng ak tlakhqi thlang vangkhqi ce Julia ak mingnaak, Augusta a qalkap zakhat ak ukkung a venawh ni pek khqi uhy. ² Adqamuttini khaw awhkawng lawng ing Asia qam awhkaw tuicunli a keng na ak awm khawkhqi benna ceh aham tuicunli awh cet unyng. Thesalonika khaw awh ak awm Makedonia pa pynoet ce kaimih a hu awh bat lawt hy.

³ A khawngawi nyn awh Sidon khaw awh dym unyng; Paul ing a ngoengaihnaakkhqi a thoe thainaak aham Julia ing qeennaak ing Paul ce a pyikhqi venna ceh sak hy.

⁴ Cawhkawng ce tuicunli awh cet tlaih bai unyng, khaw a hli dawngawh khawhli a dipnaak benna kawng Kupra tuilak cung ce poeng unyng. ⁵ Kilikia ingkaw Pamphylia tuikeng tuicunli ce poeng unyng saw Kilikia qam awhkaw Mura khaw awh dym unyng. ⁶ Ce a hunawh qalkap zakhat ukkung ing Italy qam benna ak cet Alexandria lawng ce hu nawh ce a lawng awh ce ngawi pahoei unyng. ⁷ Khawngghi ka mi di awh Kanidu khaw ce a kyinaak ak khuiawh kawng pha unyng. Khawhli ing ama ning dym sak thai khqi dawngawh Salmoni vang ben caqai awh ak awm khawhli

a sitnaak Krete tuilak cung benna cet unyng. ⁸ Tuikeng keng aw h a kyinaak ak khuiaw h kawng cet poe unyng saw, Lasea khaw venaw h ak aw m lawng dymnaak leek a mi ti a hun ce pha unyng.

⁹ Khawng h i a boeih aw h, Buhzeihnaak aw m a boeih haw h dawngaw h lawng ing ceh ve kqih aw m soeih soeih haw h hy. Cedawngaw h Paul ing cekkhqi venaw h ngai-htaaknaak aw i kqawn pek khqi hy. ¹⁰ “Koeinaakhqi, tuh ningnih ni cehnaak ve a kqih aw m soeih hy, ni cehnaak lawng ingkaw ik-oeihkhqi aham aw m kqih aw m naw h, nimah a hqingnaak aham dy aw m kqih aw m hy,” tinak khqi hy. ¹¹ Cehlai paul ing ak kqawn peek aw i ce qalkap zakhat ukkung ing ang ngai peek kaana, lawng ak mawngkung ingkaw lawng ak takung ak aw i ce ngai pe lat hy. ¹² Chikca aw h lawng dymnaak aham ama nep dawngaw h, thlang khawzah ing ceh poe aham ce ngaih uhy, Phoiniki khaw ce pha naw h caw h ce chikca hawnaak aham ngaih uhy. Caw hkaw lawng dymnaak cetaw Krete tuilak cung khaw tlaak ben nakaw thlung ingkaw kham benaw h aw m baw k hy.

Khawhli

¹³ Kham ben nakaw zil h ce ak heng cana a hli aw h, ami ngaihnaak amyihna ce aw m haw h hy, tinaw h amik poek dawngaw h lawng ami kingnaak qui ce hlam unaw h Krete tuikeng aw h ce cet poe unyng. ¹⁴ Iqyt aw m a di hlanaw h, thlungben khaw law benna kaw khawhli ce tuilak cung benna kawng hli law hy. ¹⁵ Lawng ce khawhli ing zawn naw h zil h ce ak tha a aw m dawngaw h hai benna ce am cet thai voel hy; lawng ce hlah hqoeng unaw h zil h ing a ngaih ngaih na zawn hy. ¹⁶ khawhli a sitnaak tuilak cung ak zawi ca Kauda ami ti ce ka mi poeng aw h, a kyinaak ak khuiaw h kawng loetnaak lawng ak zawica ce tu thai

unyng. ¹⁷ Cawhkaw lawng ak zawica ce lawng aw h amik dawh aw h, qui nuk thla unawh lawng aw h king qap uhy. Syrtis dizui ce lawng ing su hau kaw ami ti dawngawh, hizan ce daw k uhy, cedawngawh lawng ce khawhli ing a ngaih ngaih na zawn hy. ¹⁸ Ceamyihna khawhli ing ani zawn khqi dawngawh, a khawngawi nyn awhtaw lawng aw hkaw ik-oeih ak qihkhqi ce tui na khawng uhy. ¹⁹ Am thum nyn awhtaw, a mimah a kut qoe qoe ing lawng aw hkaw ik-oeihkhqi ce tui na khawng uhy. ²⁰ Khawngghi khawqyt aw h khawmik aihchi aw m am dang qoe nawh khaw a hli law khqoet khqoet awhtaw, loet kawng unyng tinawh poeknaak qoe qoe am ta voel unyng.

²¹ Buh a ai kaana khawngghi khawqyt ami aw m aw h, Paul ing cekkhqi a haiawh dyi nawh, “Koeinaakhqi, kai ing Krete benna kawng am ni ceh aham kak kqawn ce naming ngai mantaw vawhkaw khuikhanaak ingkaw sungnaak ve amni hu hlai voei uh. ²² Cehlai tuh awhtaw naming ngaih qep sak hlah uh, u a ca pynoet aw m am qeeng kawm uk ti, lawng vetaw see hawh kaw. ²³ Zan khawmthan kang mang aw h a bi ka bi peek ka Khawsa ak khan ceityih pynoet ce ka haiawh dyi nawh, ²⁴ “Paul, koeh kqih, Kaisara a haiawh awideng aham dyi ngai ngai bit kawp ti, nang mi lawng aw h amik cetkhqi a hqingnaak boeih ce Khawsa ing qeennaak ing nang a venawh ni pe hawh hy,’ ni tina hy. ²⁵ Cedawngawh koeinaakhqi namik kaw caksak uh, Khawsa aw h cangnaak ka taak dawngawh ak kqawn law amyihna aw m ngai ngai bit kaw. ²⁶ Han a tuilak cung aw h num taw ni taai lawk khqi ngai ngai bit kaw,” tinak khqi hy.

Lawng A Seetnaak

²⁷ Khawngghi hqanyn aw h ak phlinaak khawmthan aw h Adriatic Tuicunli aw h khawhli ing ani zawn khqi hui aw h,

thanlung awh lawng ak mawngkungkhqi ing hanawh kaw ceng nu zoe law voe voe hawh hy tinawh sim uhy. ²⁸ Tui tahnnaak ing tui ce ami tah awh dawng kqetkip dung hy. A khoeh a awm awh ami tah tlaih awh dawng khqukkip dung bai hy. ²⁹ lawng ing lungnu su hau kaw ami ti dawngawh, a kingnaak thi koeiloen pupthli ce thla unawh khawkdai ce cykcahnaak ing qeh unyng. ³⁰ Lawng awhkawng loet aham ami ngaih dawngawh, lawng ak mawngkhqi ing lawng ce tui awh nuk thla uhy, lawng ami kingnaak thi koeiloen amik nuk thlak amyihna sa qu unawh nuk kqum uhy. ³¹ Cawh Paul ing qalkap zakhat ukkung ingkaw qalkapkhqi venawh, “Ve ak thlangkhqi ve lawng awh ama mi awm mai mantaw, am loet hly tang uhyk ti,” tinak khqi hy. ³² Cedawngawh qalkapkhqi ing lawng ami kingnaak qui ce tlyk boet unawh lawng ce tui awh hlah hqoeng uhy.

³³ Khaw a dai law tawm awhtaw Paul ing cekkhqi boeih ce buh ai aham kqawn pehy. “Ni hu khawngghi pahqa hlaihphli khuiawh, buh a ai kaana ngaihkyi kawboet ing awm uhyk ti. ³⁴ Tuh awhtaw buh ai hlah uh. Buh nami ai awh ni khawngghi nami khah hly. Nangmih ak khuiawh u ingawm nami lu awhkaw lusam pin pynoet zani am hqui kawm uk ti,” tinak khqi hy. ³⁵ Cemyihna awi ak kqawn peek khqi coengawh, phaihpi ce lo nawh a mingmih boeih a haina Khawsa venawh zeelnaak awi kqawn hy. Cekcoengawh phaihpi ce thek nawh ai uhy. ³⁶ Cawh aming ngaih ding boeih nawh thlang vang ing buh ce ai uhy. ³⁷ Lawng awh ak ngawikhqi boeih taw thlang 276 law unyng. ³⁸ Buh ak phyi na ami ai coeng awhtaw, lawng ce a zangnaak bet aham cang ce tui awh khawng uhy.

³⁹ Khaw a dai law awhtaw, han a hun awhkaw dek hy voei nu tice am sim hlai uhy, dizui ce hu uhy. Cedawn-

gawh ang coeng thai awhtaw cawhkaw ceng awh lawng ce dym sak aham cai uhy. ⁴⁰ A kingnaak quikhqi tlyk unawh tuicunli awh cehta hyt uhy, Cekcoengawh lawng ami kaihnaak quikhqi awm hlam boeh boeh uhy. Zilh a law hawi unawh lawng ce ceng benna zawn sak uhy. ⁴¹ Cehlai lawng ing ceng awhkaw dizui ce su hy. Lawng a lu ing dizui ce a suk a dawngawh am tat thai voel hy, cehlai lawng a huben taw tuih tha a awm aih dawngawh ek boeh boeh hy.

⁴² Thawng ak tlakhqi boeih ce tui awh zo unawh cen kanglak kawm uh, ami ti dawngawh qalkapkhqi ing him boeh boeh aham cai uhy. ⁴³ Cehlai qalkap zakhat ak ukkung ing Paul ce hlyn aham a ngaih dawngawh cekkhqi ing aming cainaak ce kham pek khqi hy. Cedawngawh u awm tui ak zo thai taw lawng awhkawng ceng na tui awh ami zo aham awi pek khqi hy. ⁴⁴ Thlang vang tloek bai taw a vang thingpen ak khan ingkaw lawng ak keek awh awm aham awi pehy. Ceamyihna sai unawh thlang boeih ing ak soep cana ceng ce pha uhy.

28

Malta Khqi Khawboe

¹ Ceng ami pha boeih awhtaw, cawhkaw tuilak cung ce Malta tuilak cung ti uhy, tice sim unyng. ² Ce a tuilak awh ak awmkhqi boeih ing kaimih ce ni toek ni teng khqi uhy. Kaimih aham mai tih law unawh aawm unyng, khaw a nawh khaw ding hy. ³ Paul ing thikkohkhqi ce boem nawh mai awh a tih awh ak chy ak ngan khqui ce maih hlawk ang zaak awh ce cawn law hy, Paul ce a kut awh cuk nawh bat hy. ⁴ Ce a tuilak cung awh ak awmkhqi ing Paul a kut awhkaw khqui ak bat ce ami huh awh, “Ve ak thlang ve thlang ak him vani hy voei, tui awhkawng taw

loet hawh hlai hy, amak thym phu suinaak ing a hqing am ngaih nawh ni ve,” ti uhy.

⁵ Cehlai Paul ing khqui ce mai awh phum nawh a tlawh am za qoe hy. ⁶ Thlangkhqi ingtaw a kut ce hling kaw, tlu law kawmsaw thik tlang kaw tinawh poek uhy, cehlai ami qeh khing awh awm Paul taw ikawmyihna awm am awm hy, cawhtaw amik kaw ce thaw unawh anih ve khawsa va ni hy voei tinawh poek uhy.

Malta Awh Bibinaak

⁷ Ce a tuilak cung awh boei na ak awm Publiu a dum ce ce a venawh awm hy. Anih ing kaimih ce nik khy khqi nawh a im awh khaw thum voei ani awm sak khqi awh ak leek cana ni toek ni teng khqi hy. ⁸ A pa ce tlo nawh zaih hy, a sa tlo nawh tumthe awm tlo hy. Paul ing anih a venna cet hy, cykcahnaak taak pe nawh ak khan awh a kut a tloeng peek awh qoei hy. ⁹ Cawhkaw ik-oeih ce ami huh awh, ce tuilak cung awh amik awm thlak chang boeih awm law unawh qoeinaak hu uhy. ¹⁰ A mingmih ing kaimih ce nim kyihcah khqi uhy, cet hlah u sih ka mi ti awh kaimih a ngoengaihnaakkhqi boeih ce toen law uhy.

Rom Awh A Dytnaak Na

¹¹ Hla thum a di coeng awhtaw, ang ming phir, Alexandria khaw awhkaw lawng, chikca awhkawng tuilak cun-gawh ak awm hawh, ce a lawng ing cet unyng. ¹² Sirakuse khaw na thoeng unyng saw, cawh ce khaw thum voei awm unyng. ¹³ Ce a khaw awhkawng cet tlaih bai unyng saw Rhegium khaw pha bai unyng. A khawngawi nyn awh kham benna kaw khaw ce hli law nawh cawhkaw a khawngawi nyn bai awh Puteoli khaw ce pha unyng. ¹⁴ Ce a khaw awh koeinaakhqi thlang vang ce awm uhy, a mingmih ing khaw khqih nyn awm pyi aham kaimih ce nik khy khqi uhy. Cawhkawng ce Rom khaw na cet unyng.

¹⁵ Cawhkaw amik awm koeinaakhqi ing kaimih law hy ti aming zaak cawh, Appia hun awhkaw ik-oeih zawihnaak ingkaw savang im pakthum a awmnaak hun dyna kaimih ce ni do khqi uhy. Cawhkaw thlangkhqi ce Paul ing a huh awh Khawsa venawh zeelnaak awi kqawn nawh ang ngaih qep hy. ¹⁶ Rom khaw ka mi pha awh, Paul taw qalkap pynoet ing doen nawh amah poek awh awm thainaak ce pe uhy.

Rom Khaw Awh Judah Khqi

¹⁷ Khaw thum voei a awm coengawh Paul ing Juda thlang sawikungkhqi ce khy hy. Cekkhi boeih ce ami law awh, Paul ing cekkhi venawh: “Koeinaakhqi, nik thlangkhqi ing ami nu pa a phung ak kalh na ikaw awm am sai hlai nyng, Jerusalem khaw awh nim tu unawh Romkhqi kut awh ni pe uhy. ¹⁸ Cekkhi ing awi a mini deng awh thihnaak khoek na thawlhnaak ikaw am ka sai dawngawh hlah aham ni ngaih uhy. ¹⁹ Cehlai Judakhqi ing am ngaih unawh, Kaisara a ven pha aham kai ing thoe h nyng. Kak thlangkhqi ak khan awh thawlh puk aham amni. ²⁰ Vawh nangmih mi hu qu unawh awi kqawn aham nik khy khqi nyng. Israelkhqi ang ngaih-unaak awh ni kai ve thiqui ing khih na ka awm,” tina hy. ²¹ Cekkhi ing, Nang akawng awh ce Judah nakawng capat am hu unyng, cekcoengawh ce nakawng amik law koeinaa u ingawm nang a seetnaak ikaw ap kqawn hlan uhy. ²² Cehlai nang a huhnaak ikawmyihna a awmnaak tice zaak aham ngaih unyng, a hun hoei awhkaw thlangkhqi ingtaw vawhkaw thlangboel ak thai na ak awm ve ak che ngai na kqawn uhy,” tina uhy.

Paul Ak Awikqawn

²³ Khaw hypoet awh Paul ing hqum aham awi amik kqawn awh, Paul a awmnaak im awh thlang khawzah ce

law uhy. Mymcang awhkawng khawmy dy na cekkhqi venawh Khawsa qam awithang leek ce ak kqawn peek awh Mosi a anaa awi ingkaw tawngkhakhqi ak cauk awhkawng Jesu akawng ce aming zaksimnaak aham kqawn pek khqi hy. ²⁴ Ak awihkqawn awhkawng thlang a vang ingtaw am cang na uhy. ²⁵ A mimah ce oelh qu unawh, a hukhit na Paul ing vawhkaw awi ve ak kqawn awhtaw voei uhy: “Ciim Myihla ing nami pakdamkhqi venawh Isaiah hawnaak ing awitak ce vemyihna anak kqawn hy:

²⁶ Ve thlangkhqi venawh cet nawhtaw,
Za hlai voei uk ti am zasim kawm uk ti;
hu hlai voei uk ti, am hat kawm uk ti.

²⁷ ikawtih vekkhi ak kaw ve qep aih nawh; aming
hakhqi ingawm am za thai uhy,
ami mik ce him uhy.

Cemyih am mantaw hu kawm usaw,
za kawm uh, kawlung ing zasim kawm usaw hlat
kawm uh,
cawh kai ing qoei sak khqi hy kawng,’ tihy.

²⁸ Cedawngawh Gentelkhqi venawh Khawsa a hulnaak ce pha hawh nawh, a mingmih ing ngai kawm uh, tice nami sim aham ngaih nyng,” tinak khqi hy.

²⁹ Ve ak awi ak kqawn awh, Judakhqi ce a mimah ingkaw a mimah aming oelh qu doena cet uhy. ³⁰ Khaw kum hih khui cawh ce Paul ing im vat nawh awm hy. A venna ak law thlangkhqi boeih ce ak nep cana do hy. ³¹ Qaal leeknaak ing ak kangkung a awm kaana Khawsa qam a kawng ce ak kqawn awh Jesu Khrih akawng ce cawngpyi hy.

Tuivang Holy Bible
The Holy Bible in the Tuivang dialect of the Matu Chin language of
Myanmar (Burma)

Copyright © 2020 Batupei Christian Fellowship

Language: Tuivang (Chin, Matu)

Dialect: Tuivang

Copyright applies only in Myanmar. Outside Myanmar, this work is in the Public Domain.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-12-23

PDF generated using Haiola and XeLaTeX on 30 Dec 2021 from source files dated 30 Nov 2021

02ecb546-dab3-59d0-ad6b-9ceb54cb8e08